



BIBLIOTECA NAZ.
Vittorio Emanuele III

IV

D

42

NAPOLI

XXI.HI.23.

B.5.8.12

N



42

D E
SECRETARIO
SACRÆ CONGREGATIONIS
I N D I C I S
LIBRI DUO

*In quorum primo de ejusdem origine, prærogativis,
ac muniis agitur; in altero eorum series contine-
tur, qui eo munere ad hanc usque diem
donati fuere.*

AD REVERENDISSIMUM 'PATREM
FR. ANTONINUM BREMOND
ORDINIS PRÆDICATORUM
GENERALEM MAGISTRUM
AUCTORE JOSEPHO CATALANO
ORATORII S. HIERONYMI CHARITATIS
PRESBYTERO.



R O M Æ MDCCLI.
TYPIS ANTONII FULGONI APUD S. EUSTACHIUM.
SUPERIORUM FACULTATE.





REVERENDISSIMO PATRI
FR. ANTONINO BREMOND
 ORDINIS PRÆDICATORUM
 GENERALI MAGISTRO

JOSEPHUS CATALANUS
 SALUTEM



*Ublicij juris facturus Tractatum ,
 De Secretario Sacræ Congregatio-
 nis Indicis , ejusque origine , & mu-
 niis , atque prærogativis , Tuo & hunc quoque in-
 clyto Nomini , Reverendissime Pater , dedicandum
 censui . Quum enim id Munus a sua prima institu-*

tione ad hæc usque tempora hæreat, hæsurumque sit
 semper, Deo favente, præclarissimo, & de Sede
 Apostolica optime merito Ordini Prædicatorum, cu-
 jus Tu supremum regimen tenes, jam Tibi debeba-
 tur Liber, qui seriem, & gesta egregia illustrium
 Virorum comprehendit, quos ex eodem Ordine Sum-
 mi Romani Pontifices ad eam Dignitatem evexere.
 Quum autem is, qui nunc eo Munere summa cum
 laude fungitur, præstantissimus Pater Fr. Thomas
 Augustinus Ricchinus Cremonensis, quum Tui esset
 Socius pro Italiæ Provinciis, a Regnante Pontifi-
 ce Maximo BENEDICTO XIV. veræ virtutis
 æstimatore, plaudente Urbe, ac Litteraria Repu-
 blica, eo honore decoratus sit, vel ex hac alia ra-
 tione coactum me sensi ad dedicandum Nomini Tuo
 hoc Opus, quod quidem potissimum in gratiam totius
 Sacræ Indicis Congregationis, cui ab omnibus ve-
 neratio, & obedientia, ob supremam ejus in Orbem
 Catholicum auctoritatem, eidem a Christi in Terris
 Vicario collatam, debetur, ultro suscepi. Gratulor
 vero Tibi, Reverendissime Pater, quod ea præditus
 sis prudentia in eligendis Tibi Sociis in supremi re-
 giminis ministerio, ut ex eis non modo laudatus
 Pontifex Ricchinum ad Secretarii Sacræ Congre-
 gationis Indicis Munus adlegerit, sed & sapien-
 tissimus Sardinæ Rex præclarissimum Virum Patrem
 Fr. Pium Nattam Episcopum Albæ nominarit. Tan-
 ta profecto est Tua in regendo universo Prædicatorum
 Ordine sapientia, ut fama illius toto pene Or-
 be Terrarum diffusa, ædificato nuper, atque aperto
 magnifico Berolini Templo, ubi Catholica Religio-
 nis

nis exercitationes diu intermissæ, publice peragantur, non alios Serenissimus Princeps ibidem voluerit Sacramentorum Ministros, quam Tui Prædicatorum Ordinis Fratres, Halberstädiensis Cœnobii alumnos, quod istorum scilicet, qui Berolini Catholicis præsto erant, pietas, doctrina, prudentia, integritque mores omnibus explorati essent, atque perspecti, solitique semper fuissent Viri ipsi eximii, non sua, sed quæ Jesu Christi sunt, querere. Quod quidem Tuo zelo, Tuæ vigilantia, eximia pietati Tuæ, pii, doctique Viri adscribendum censent. Faxit Deus, ut Dominicana Familia, cui præsides, & Catholica Religionis, cui adlaboras, incremento, quamdiutissime vivas incolumis.

I M P R I M A T U R .

Si videbitur Reverendis. Patri Sacri Palatii
Apostolici Magistro .
F. M. de Rubeis Patriarcha Constantinop. Vicefg.

* * * * *

I M P R I M A T U R .

Fr. Joseph Augustinus Orsi Ord. Prædic. Sacri
Palatii Apostolici Magister .

A P P R O B A T I O I.

Quod, mandante Reverendissimo Patre Josepho Augustino Orsi Sacri Palatii Magistro, sedule expendi
ms. aliud Patris Josephi Catalani, quem vel tantum
nominasse, laudasse est, plane orthodoxum eruditissimum
Opus, cui Titulus: *De Secretario Sacræ Congregationis
Indicis Libri duo*, tam prudenti est œconomia compactum,
taliumque ornatum rerum notitia, ut qui legit, non modo
oblatam in eo sibi videat numeris omnibus absolutam histo-
riam Dignitatis adeo illustri Apostolicæ Sedis Ministri,
verum etiam tradita documenta, per quæ luculentius fiat,
quanta sit venerabilium Cardinalium Sacram Indicis Con-
gregationem constantium in discernendis, proscribendis-
que Libris noxiis maturitas, & solertia, quam certo eorum
Decreta Decretis annumeranda veniant Romanorum Pon-
tificum, quam isti in deligendo Secretario dictæ Congre-
gationis ex inclyta magni Patriarchæ Dominici Familia sa-
pientes, constantesque fuerint. Dubitandum propterea
non est, quin luce publica dignissimum sit, & haberi de-
beat. Si enim manibus omnium versabitur, peculiaris erit
utilitatis Ecclesiæ Catholicæ. Scilicet quotquot vere ob-
sequentes, ac humiles ejusdem se esse filios gloriari

run

runt in Domino, instructiores, alacrioresque efficiet ad oppugnandas validius, contemnendasve fidentius alias, si quæ forte eruperint posthac, scriptiones similes nefariis illis Urbe, atque Orbe fere toto studiosissime nuper disseminatis Literis livoris, contumeliarum, calumniarumque plenissimis, quibus vaser quidam, Doctör, si larvæ fidas, Sorbonicus, si loquentem, conantemque attendas, nequioris Doctrinæ, & Moralis neutiquam Christianæ Professor, veteres damnati Authoris libelli de immunitate Ciriacorum inscripti, aliorumque maledicorum, captioforumque hominum nenias recinens, ausus est per latus hodierni doctissimi, & religiosissimi Secretarii, tantopere de Romana, atque universa Ecclesia meritum Ordinem Prædicatorum, laudatam Congregationem, quodque scelestius est, ipsum sacratissimum Vicarii Jesu Christi caput insidiosè non minus, quam impudenter impetere. Ita censebam Romæ x. Kal. Febr. MDCCCL I.

Petrus Morettus Canonicus insignis Basilicæ S. Mariæ trans Tyberim.

APPROBATIO ALTERA

Qua tandem inopinata bonorum siderum consensione factum fuerit, ut, quum jam olim in vetitorum Librorum Indicem operam contulerint suam Viri duo ex Augustiniana familia celeberrimi, Hieronymus Cardinalis Seripandus, & Christophorus Patavinus, nunc demum & hac ætate unum aliquem ex ipso Ordine selectum videam, cui de istiusmodi Indicis historia publicum aliquod, ac solemne testimonii genus ferendum sit, prorsus ignoro. Id unum scio, non ita diu ante, jubente Reverendissimo Patre Sacri Palatii Magistro, traditum mihi fuisse novum, ac plane egregium Opus inscriptum, *De Secretario Sacræ Congregationis Indicis*, a Viro Cl. Josepho Catalano Oratorii S. Hieronymi Charitatis Presbytero diligenti studio, & magna cum eruditionis copia com-

po-

positum ea lege , ut illud ad examen vocarem ; tum quæ mea sententia esset , caste , sancteque proferrem . Hanc ego provinciam ea , qua par erat , animi integritate absolvisse me puto . Vidi , legi , expendi Opus distributum in Libros omnino duos . Nihil in eo deprehendere mihi licuit , quod aut Catholico homini displicere debeat , aut a Christianis moribus , Fideique præceptis alienum videri possit . Quinimo magnam inde utilitatem universæ Christianæ Reipublicæ expectandam esse conjeci . Adeo enim sincere , & accurate originem , munus , curam , diligentiam , fidem , pietatem , doctrinam , ac religionem eorum præstantissimorum hominum , qui ex inclyta Dominicana Familia a Secretis amplissimæ hujus Congregationis præsunt , exponit , ut quum hæc omnia boni quique , & probi Viri comperta habuerint , fore confidam , ut multo pronius , ac religiosius quam antea , Congregationis Indicis Decreta , & auctoritatem excipere , ac revereri velint . Postulat ergo & argumenti præstantia , & rerum , de quibus agit , utilitas , ut tam bonum Opus bonis auspiciis utatur , & prælo quamprimum Deo opitulante tradatur . Ita censebam . Romæ Idibus Februarii anno MDCCCL.

F. Augustinus Antonius Georgi Augustinianus Publicus in Romano Archigymnasio Sacræ Scripturæ Interpres , & S. C. R. Consultor .

I N D E X . C A P I T U M

L I B R I . I.

C A P . I.

*Prima prohibendi Libros pravam doctrinam continentes
origo.*

C A P . II.

*De vigilantia Summorum Romanorum Pontificum in de-
posito Catholicæ Fidei conservando, & hæreticorum
Libris profigandis.*

C A P . III.

*De Pontificum cura in discernendis Libris, quorum lectio
a Fidelibus esset vitanda, ac præsertim de S. Gelasii
Papæ I. in eam rem Decreto.*

C A P . IV.

*De primo prohibitorum Librorum Indice suprema Pauli
Papæ IV. auctoritate confectio.*

C A P . V.

*De Indice jussu Concilii Tridentini ordinato, variisque in
eo conficiendo Patrum sententiis, ac de F. Francisco
Forerio Dominicano Tridentinæ in eam rem Deputatio-
nis Secretario.*

C A P . VI.

*De variis aliis Librorum prohibitorum Indicibus jussu &
auctoritate Sacræ Congregationis Indicis confectis, ac
promulgatis studio, & cura Secretariorum ejusdem Sa-
cræ Indicis Congregationis.*

C A P . VII.

*De institutione Congregationis Indicis facta a Pio Papæ V.
deque Cardinalibus, Consultoribus, ac Secretario in ea
constitutis, & novis facultatibus a sequioribus Pontifi-
cibus eidem Congregationi concessis.*

C A P . IX.

*De præcipuo Secretarii Congregationis Indicis munere in
prohibitione Librorum.*

CAP.

C A P. X.

De summa Secretarii cura, ubi agitur de judicio Librorum magni momenti, & de clausula, donec corrigatur, & donec expurgetur, ab eodem ex Decreto Sacre Congregationis apponi solita in quorundam prohibitione Librorum.

C A P. XI.

Criminatio, & querimonia adversus Sacram Congregationem Indicis, ejusque Secretarium refellitur, quod Librorum prohibitio fieri soleat Auctore inaudito, & que notam infamiae inuret.

C A P. XII.

De æconomia Apostolica Sedis in vetandis aliquando Libris sanam etiam doctrinam continentibus, ob eorum lectionis abusum.

C A P. XIII.

De veneratione Decretis Sacre Congregationis Indicis debita, eorumque obligatione ubique, & apud omnes.

C A P. XIV.

De Secretarii Indicis cura in Libros, Typographosque, qui a Libris, quos iterum imprimunt, multa fraudulenter adimunt.

C A P. XV.

De Facultate Secretarii Indicis in expediendis licentiis pro legendis Libris prohibitis ad tempus triennii, veteribusque prorogandis ad aliud triennium; & de Regulis ab ipso ea in re servandis.

C A P. XVI.

De Secretarii Indicis munere in publicatione Decreti veterum Librorum, & de impudentissimo pseudodocitoris Sorbonici mendacio, quod perspicuo testimonio Cardinalis Quirini egregie refellitur.

C A P. XVII.

De munere Secretarii Indicis erga Consultores ejusdem Congregationis.

C A P. XVII.

De habitatione, ac Sociis, & emolumentis Secretarii Sa-

Sacra Congregationis Indicis .

C A P. XVIII.

De absentia Secretarii Congregationis Indicis, & vicibus ejus suppleri solitis, jussu tamen Summi Pontificis, ab aliquo Religioso ejusdem Ordinis, præsertim vero a Magistro Sacri Palatii, ac de oratione initio Congregationis recitanda .

C A P. XIX.

Pontificium Diploma refertur, quo Secretarius Indicis institui solet .

C A P. XX.

Diploma alterum Pontificium, quo Indicis Secretarius intra Ordinem suum Prædicatorum locum post Procuratorem Generalem habere dicitur .

C A P. XXII.

De Secretarii Sacra Congregationis Indicis Funere .

C A P. XXII.

Secretarii Sacra Congregationis Indicis munus, sicut & alia duo, nempe Magistri Sacri Palatii, & Commissarii Sancti Officii, a Romanis Pontificibus Maximis prudenti providentia fuisse in clyto Ordini Prædicatorum affixa, ostenditur .

L I B. II.

C A P. I.

De F. Francisco Forerio Ulysiponensi .

C A P. II.

De F. Joanne Baptista Lancio Regiensi, postea Sacri Palatii Apostolici Magistro .

C A P. III.

De F. Vincentio Bonardo Romano, postea Magistro Sacri Palatii, ac demum Episcopo Hieracensi .

C A P. IV.

De F. Paulo Pico a Burgo Sancti Sepulchri, postea Episcopo Vulturariensi .

C A P. V.

De F. Thoma Pallavicino Bononiensi .

CAP.

G A P. VI.

De Fr. Francisco Magdaleno Capiferreo Romano.

C A P. VII.

De Fr. Joanne Baptista de Marinis Januensi, postea Ordinis Prædicatorum Generali Magistro.

C A P. VIII.

De Fr. Raymundo Capisucco Romano, postea bis Magistro Sacri Palatii, & deinde S. R. E. Cardinali.

C A P. IX.

De Fr. Hyacinto Libello Tiphernate, postea Magistro Sacri Palatii, ac demum Archiepiscopo Avenionensi.

C A P. X.

De Fr. Vincentio Fano Viterbiensi.

C A P. XI.

De Fr. Thoma Camotto Pedemontano.

C A P. XII.

De Fr. Jacobo Riccio Romano, postea Procuratore Generali Ordinis Prædicatorum.

C A P. XIII.

De F. Julio Maria Bianchi Veneto.

C A P. XIV.

De Fr. Gregorio Selleri Perusino, postea Sacri Palatii Magistro, & deinde S. R. E. Cardinali.

C A P. XV.

De Fr. Augustino Pipia Sardo, postea Magistro Generali Ordinis Prædicatorum, & deinde S. R. E. Cardinali.

C A P. XVI.

De Fr. Dominico Perez Matritensi.

C A P. XVII.

De Fr. Aloysio Nicolao Ridolfi Florentino, postea Sacri Palatii Magistro.

C A P. XVIII.

De Reverendissimo Patre Fr. Josepho Augustino Orsi Florentino, nunc Magistro Sacri Palatii Apostolici.

C A P. XIX.

De Reverendissimo P. F. Thoma Augustino Ricchinio Cremonensi, qui nunc Secretarii Indicis munere fungitur.

LIBER I
DE SECRETARIO
SACRÆ CONGREGATIONIS
INDICIS
CAP. I.

*Prima prohibendi Libros pravam doctrinam
continentes origo.*

I.



Er vetustus est Ecclesiæ mos, & Christianæ Religioni cœvus damnandi improbatæ lectionis Libros. Apostolorum tempore, refert Sanctus Lucas Actorum Cap. xix. multos ab Apostolis conversos, Libros curiosos, & vanos contulisse, & combussisse coram omnibus; aitque S. Clemens, sive alius antiquissimus Scriptor Lib. i. Constitutionum Apostolicarum, Cap. vii. Apostolos prohibuisse initio Fidelibus Libros gentilium, & falsorum Prophetarum. Scribit etiam Eusebius Lib. vii. *Historiæ Ecclesiasticæ*, Cap. vi. Dionysium Episcopum Alexandrinum, qui claruit anno circiter ccl. a Fidelibus reprehensum, quod Libros hæreticorum legeret.

II. Crevit deinde magis magisque Fidelium zelus contra ipsos hæreticorum Libros, curabantque maxime Ecclesiæ Præsules, in eos Libros inquire, ne simpliciores legentes impia scripta a recta Fide declinarent. Libri quidem Arii ab Episcopis in Oecumenico i. Concilio Nicæno damnati sunt, antequam Rescriptum de ea re edidisset Constantinus Magnus datum ad Episcopos, & omnes Fideles ex Nicephoro Lib. vii. Cap. xvi. Constantinus au-

A

tem

tem id executioni mandari jussit, propolita pœna capitis, siquis Libros Arii occultasset, ut patet ex ejus epistola apud Socratem Lib. I. Cap. VI. & Nicephorum Lib. VII. Cap. XXV. Scribit vero etiam Socrates Lib. I. Cap. XXIV. Marcellum Ancyranum damnatum fuisse, quod Libros suorum errorum comburere nolisset; non enim recipiebantur ad pœnitentiam hæretici, nisi prius Libros suos combussissent.

III. Per eadem quoque tempora S. Epiphanius in Synodo Cypri coacta vetuit, Libros Origenis legi, ut memoratus Socrates Lib. VI. Cap. IX. Historiæ suæ refert; permisitque Concilium Carthaginense IV. anni CCCXCVIII. Can. XVI. solis Episcopis, ut tempore necessitatis Libros hæreticorum legant. Non diu postea cum Nestorii hæresis in Concilio Ephelino damnata fuisset, Libri quoque ejusdem Nestorii in ipso Concilio interdicti fuere, & a Theodosio Imperatore exuri jussi, ut Liberatus Diaconus refert Cap. X. sui Breviarii, extatque adhuc Theodosii Sanctio in Lege, *Damnato*, Cod. *De hæreticis*. Circa idem tempus prodit Lex Honorii, atque Theodosii, qua jubentur Mathematici omnes suos Libros, in quibus aliquid est adversum Catholicæ Religioni, sub oculis Episcoporum cremare, uti videre est in Lege, *Mathematicos*, Cod. *De Episcopali audientia*. Pari ratione in Concilio Chalcedonenſi damnantur Libri Eutychetis, & ab Imperatoribus Valentiniano, & Martiano, severa Lege prohibetur, ne ullus eos legere, aut habere audeat, sed omnes diligentissime quæſiti crementur, ut patet ex Concilio Chalcedonenſi Actione III. & ex Lege, *Quicumque*, §. *Nulli*, & §. *Omnes*, Cod. *De hæreticis*.

IV. Notat hæc eruditissimus Bellarminus in suis Controversiis, Lib. III. *De laicis*, Cap. XX. viderique de eadem re possunt Altaſerra, & Fileſacus, quorum primus Lib. IV. Vindiciarum Ecclesiasticæ jurisdictionis Cap. III. variis allatis exemplis diſerte ostendit, *ad Episcopos pertinere examen, & censuram librorum conscriptorum de Fide, & Religione*. Alter vero in Libro, *De Sacra Episcoporum auctoritate*, Cap. I. §. 7. expresse etiam docet, *Librorum im-*

improbata lectionis, & qui scævum aliquod dogma contineant, ut loquuntur Imperatores, jus ad Episcopos semper spectasse. Sed & illud præsertim notandum, quod post recensitum Constantini Magni Edictum contra Arii Libros idem Auctor subdit: Oportuit siquidem Libros istos a Sacris Ecclesiæ Doctores, & Pastoribus disquiri, atque expendi, tum ob pravam doctrinam rejici, & damnari, deinde ab Imperatore Edicto publico, flammis ultatricibus, addici, aut saltem eorum lectionem interdici.

CAP. II.

*De vigilantia Summorum Romanorum Pontificum
in deposito Catholice Fidei conservando,
& hæreticorum libris profigandis.*

I. **S**ACROSANCTUM Fidei depositum, sine qua Deo place-
re, aut æternam salutem consequi nemini licet, ut
salvum in Ecclesia Dei perpetuo conservaretur, posteris-
que inviolatum traderetur, pastorem Romanorum Pon-
tificum vigilantiam summo semper studio, & contentione
laborasse, sapientissime affirmat Clemens Papa VIII. in sua
Constitutione, quæ incipit, *Sacrosanctum*, edita die XVII.
Octobris anni MDXCV. legiturque initio sui Indicis, quem
Clementinum appellant: *Ipsi enim*, Romani scilicet Pon-
tifices, *a Christo Domino*, ut laudatus Clemens Papa mox
subjicit, *hujus tam pretiosi depositi Auctore, & illud fide-
liter custodiendi, & bonum semen Patrifamilias ab ini-
mici hominis zizaniis discernendi, & Ecclesiam salutare
doctrina edificandi, præcipuam curam, summamque po-
testatem in Beatissimo Petro Apostolorum Principe accepe-
re.* Memorat & mox idem Clemens eam in rem exempla
S. Gelasii I. & Gregorii IX. Sed jam longe ante ipsos, con-
suevisse Romanos Summos Pontifices Librorum hæretico-
rum pravam, ac perniciosam doctrinam continentium le-
ctionem vetare, docet nos celebre S. Leonis exemplum,
ac testimonium, qui in Epistola XCII. ad Turribium Au-

striensem Episcopum Cap. xv. & xvi. interdixit lectionem Librorum hæreticorum quorundam, & addit, eos Episcopos, qui eos in domibus Fidelium haberi sinerent, hæreticos censendos.

II. Sed audiamus nunc ipsa S. Pontificis verba: *Curandum ergo est, & Sacerdotali diligentia maxime providendum, ut falsati Codices, & a sincera veritate discordes, in nullo usu lectionis habeantur. Apocryphæ autem Scripturæ, quæ sub nominibus Apostolorum multarum habent seminarium falsitatum, non solum interdiciendæ, sed etiam penitus auferendæ, atque ignibus concremandæ. Quamvis enim sint in illis quædam, quæ videantur speciem habere pietatis, numquam tamen vacuæ sunt venenis, & per fabularum illecebras, hoc latenter operantur, ut mirabilium narratione seductos laqueis cuiuscumque erroris involvant. Unde si quis Episcoporum, vel apocrypha haberi per domos non prohibuerit, vel sub Canoniarum nomine eos Codices in Ecclesiis permiserit legi, qui Priscilliani adulterina sunt emendatione corrupti, hæreticum se noverit iudicandum; quoniam qui alium ab errore non revocat, seipsum errare demonstrat. Hæc & alia S. Leo Magnus Pontifex Maximus in epistola xciii. ad Turribium, quæ legi quidem ab omnibus potest; quod icirco dixi, quod nuperus Auctor notitiæ Romani Indicis Librorum prohibitorum, quæ extat in Libro, cui Titulus, *Della Biblioteca volante*, Scanzia xxiii. Romæ edito anno mcccxxxix. pag. 114. tantopere Codicem Vallicellanæ Bibliothecæ sæculo ix. exaratum exaltet, ex quo locum ipsum fere ad verbum S. Leonis descripsit, gratiasque agere eruditissimo Josepho Blanchino Congregationis Vallicellani Oratorii Presbytero minime omittat, quod ipsi eam notitiam dederit. Sane agendæ potius gratiæ ipsi Blanchino ob alia beneficia ab eodem Christianæ, ac Litterariæ Reipublicæ collata, ob editionem scilicet tot mss. Codicum, quos & egregiis Præfationibus, ac Notis illustravit, ac præsertim ob vulgatum superiori anno Opus insigne, quod inscriptum est: *Evangeliarium quadruplex*.*

CAP.

CAP. III.

De aliorum Pontificum cura in discernendis Libris, quorum lectio a Fidelibus esset vitanda, ac præsertim de Gelasii Papæ I. in eam rem Decreto.

I. **Q**UAM vis & Sacræ Synodi, & Summi Pontifices jam olim passim Libros hæreticos, pravorumque damnarint, sunt tamen, qui putant, hujusmodi Librorum Catalogi, seu Indicis usum cœpisse labente seculo v. ubi, ut ajunt, Gelasius Papa in Concilio lxx. Episcoporum habito Romæ anno cxcvi. hæreticorum Indicem proposuit, idque notavit Bellarminus Lib. 111. *De laicis*, Cap. xx. Num. vi. sic inquit: *Gelasius in Concilio lxx. Episcoporum, ut habetur Distinctione xv. Canone, Sancta Romana, proposuit Indicem hæreticorum, quorum Libros a Fidelibus vitandos esse dicit.* Verum, ut ex verbis Decreti manifestum est, in eo quidem dumtaxat agitur de lectione publica, sive de lectione in Ecclesia tempore Divini officii, ad instructionem, & ædificationem populi. Postquam enim Acta Martyrum multis encomiis memorata Romana Gelasii Synodus extulisset, ita subjicit: *Sed ideo secundum antiquam consuetudinem singulari cautela in Sancta Romana Ecclesia non leguntur, quia & eorum, qui conscripserunt, nomina penitus ignorantur, & ab infidelibus, aut idiotis superflua, aut minus apta, quam rei ordo fuerit, scripta esse putantur.* Atque hæc satis ostendit, quod alias notavit Vanespen Tomo 1. Juris Ecclesiastici univerci, Titulo xx11. Cap. iv. *hoc unum voluisse Synodum, a publica lectione, & Divino Officio amovere, quicquid vel speciem falsitatis, aut aliquam fabulæ mixturam habere videbatur; quod adhuc manifestius circa finem Decreti indicatur his verbis: Ceterum qui Libri in Ecclesiasticis per anni circulum a nonnullis legantur, pro Fidelium ædificatione, adnotandum censuimus.*

II. At vero probari adhuc potest Bellarmini opinio agentis, Gelasium Pontificem proposuisse Indicem Librorum,

rum, a quorum lectione deberent Fideles abstinere; id enim non obscure innuit Clemens Papa VIII. ubi in citata sua Constitutione, quæ incipit, *Sacrosanctum*, sic inter alia inquit: *Quo circa sanctæ memoriæ Gelasius Primus, & Gregorius IX. aliique complures Romani Pontifices Prædecessores nostri, zelo zelati pro Domo Domini exercituum, ut hanc Fidei Catholicæ, doctrinæque integritatem, salvam, incorruptamque in Ecclesia Dei retinerent, Apostolici animi magnitudine, pro muro Domus Israel adversus ejusdem Fidei hostes, se ipsos opponentes, ne illorum dolis, & insidiis imprudentes, & simpliciores homines caperentur, lucem a tenebris, prava a rectis sejunxerunt, quæ sequenda, quæ cavenda essent, Christianis fidelibus declarant; probatos, laudabiles, orthodoxos libros ab adulterinis, perniciosis, & apocryphis, singulari diligentia distinxerunt; postremo hæreticorum impia dogmata, & noxia, ac venenata scripta, Conciliorum Decretis, Pontificiis Constitutionibus, aut alio opportuno censurae genere condemnarunt.*

III. Sane uti post alios notat Pagius in Vita S. Gelasii Papæ I. Num. iv. Gelasius ipse in Autumno anno cdxcv. vel verosimilius anno cdx cvi. secundam Romæ Synodum celebravit. Cum enim Ecclesia jam a pluribus annis, multis referta Libris apocryphis medicam manum averet, quæ sinceræ a supposititiis discerneret, laudatus Pontifex convocato Romæ Concilio, ordinem librorum, quem Romana Ecclesia susciperet, aut detestaretur, vel dubios tantum haberet, digessit; Decretumque illud de Scripturis, & Opusculis Sanctorum Patrum, quæ in Ecclesia Catholica recipiuntur, jam valde nostri præsertim temporis hæreticos urget, qui Traditionem rejiciunt, & Librorum Canonicorum numerum pro libito, ac sectarum suarum commodo mutilant. Job enim, Tobix, Judith, Machabæorum Libri, Epistola ad Hebræos, Apocalypsis Joannis, Petri Epistola ii. Joannis iii. ac Judæ i. in eodem Decreto memorantur. Uno verbo omnes tam Novi, quam Veteris Testamenti Libri.

IV. Itaque Catalogus, sive Index ille Librorum a Gel-

Iasio Papa in prædicta Synodo Romana propositus, nequam dici potest *Index librorum prohibitorum*, juxta usitatam modernam phrasim, nimirum, Index exhibens Libros omnibus tam privatim quam publice legi prohibitos, qui quidem Librorum Index ante medium circiter seculum decimum sextum minime reperitur. Tum enim cum invalescentibus Lutherana & Calviniana hæresi, Libri plurimi mentito nomine Auctoris, atque hæretico sermone conspersi ederentur, qui nec facile a Libris Catholicis discerni possent, atque hinc multi simplices incauta horum Librorum lectione seducerentur, varii cœperunt a Theologis confici Catalogi, seu Indices Librorum, in quibus ipsi notabant Libros, quos vel ab hæreticis confectos, vel hæresi conspersos credebant. Rogatu primum, ac mandato Caroli V. Imperatoris Facultatem Theologicam Lovaniensem confecisse Indicem Librorum hæreticorum, & de hæresi suspectorum, qui & auctoritate ejusdem Caroli anno MDXLVI. publicatus fuit, docet idem Vanespen loco citato Num. v. ubi & illud subdit, quod cum assidue plures hæreticorum Libri prodirent, pluresque hæresi respersi notarentur, rursus alium fusiorem Librorum Indicem Sacra ipsa Facultas continuavit, quem addito speciali Edicto publicari idem Imperator Carolus V. mandavit anno MDLVI. Videri hi Indices possunt una cum Cæsaris Edictis in prima Parte Edictorum Flandriæ Lib. I. Rubrica v11.

C A P. IV.

*De primo prohibitorum Librorum Indice suprema
Pauli Papæ IV. auctoritate confecto.*

I. **A**T vero cum isti Indices non essent summæ auctoritatis, quæ ubique Fideles obligaret, Libri etiam hæreticorum Italica lingua exarati in Italiam disseminarentur, zelantissimus Christianæ Catholicæ Religionis Paulus IV. Pontifex Maximus præcepit anno MDLVII. iis, qui Sacræ Inquisitionis contra hæreticam pravitatem erant Romæ præpositi, ut & ipsi Indicem Librorum prohibitorum conficerent, confectusque fuit prædicto anno MDLVII.

ut

ut tradit ad ipsum annum Spondanus Num. v. ubi hæc habet: *Cum vero non minus fere idem Pontifex inter bellica curaret Ecclesiastica, incorruptam, quantum in se erat, Religionem conservare volens, plurimæque mala ex impiorum Librorum lætitiæ provenire cognoscens, Librorum Indicem per Inquisitores fieri curavit, quem deinde anno MDLIX. impressum publicavit, Libros eo contentos gravi anathemate, vel legi, vel haberi prohibens, primusque existens, qui universalem omnium perniciosorum librorum cujuscumque argumenti, etiamque profani, a quibuscumque etiam Religione Catholicis Scriptorum, vel etiam a suspectis typographis de quacumque arte editorum, Indicem contexere studerit, cum ad eum usque diem librorum prohibitiones tam a Pontificibus, quam Imperatoribus factæ, nunquam excessissent terminos librorum hereticorum; aliive pestilentes legi prohibiti fuissent, nisi quorum Auctores etiam damnati exitissent. Quod tamen prudentissima cautione a Paulo præstitum intelligitur, cum soleant etiam multi alii libri præter hereticos, mores corrumpere, & falsas opiniones inducere; soleantque hæretici Scriptores, & typographi aliorum argumentorum tractationibus sua venena immiscere.*

II. Labitur autem in eo Spondanus, & post eum etiam Vanespen, cum locis citatis ajunt, Indicem librorum prohibitorum confici jussum a Paulo IV. anno MDLVI. absolutum deinde fuisse, ac publicatum ejusdem Pontificis auctoritate anno MDLIX. Duo siquidem confecti & absoluti fuerunt sub laudati Pauli IV. Pontificatu prohibitorum Librorum Indices, alter anno MDLVI. alter vero anno MDLIX. Certe in priori Indice tametsi nullum extet Decretum, ita tamen a tergo faciei Libri legitur.

Index alphabetico ordine distinctus est: singula insuper alphabeti elementa serie non vacant.

In primis nomina, siue vulgatiore cognomina disponuntur eorum, qui tanquam ex professo errantes, & in errorem mittentes, cum universis inscriptionibus ipsorum, cujuscumque argumenti sint, pro damnosissimis habentur.

His

His succedunt Libri a notis Auctoribus editi ea ratione rejecti, quod, vel ad hæresim, vel ad aliquod præstigioſæ impietatis, aut obſcenæ alicujus turpitudinis genus, vel omnino ad intolerabiles errores ſubinde allicere, ſatis ſuperque diu exploratum eſt.

Poſtremo loco redactæ ſunt inſcriptiones Librorum, qui ut plurimum ab incertis hæreticis conſcripti peſtilentiſſimis doctrinis reſerti ſunt.

III. Itaque diſtinctus erat hic Pauli IV. Index in tres Claſſes. Prima exhibebat nomina eorum, quorum omnia Opera cujuſcumque argumenti etſi profani omnino vetantur, inter quos & quorundam nomina Catholicorum occurrunt. Secunda Claſſis Libros ſingulatiim damnatos continebat, dum alii ipſorum Auctorum Libri minime prohibebantur. Tertia tandem Claſſis complectebatur ſcripta quædam anonyma, adjecta clauſula generali vetante Libros omnes anonymos editos ab anno MXXIX. Sane ad calcem tertiæ Claſſis illud expreſſe edicitur, ut *Libri omnium enarratorum hæreticorum, ſive Auctorum ubicunque, & quandocunque excuſi, ſcripti, vel exſcripti fuerint, ab univerſis ſub Cenſuris, & panti in Decreto S. D. N. expreſſis caveantur.* Sed hoc Decretum cujus fit mentio, jam ibi non extat. Legitur deinde pag. 65 Catalogus Bibliorum, quæ fuerant ab hæreticis Pariſiis, Antuerpiæ, Baſileæ, Lugduni, aliisque in locis impreſſa; tum vero pag. 69. alius Catalogus legitur LX. Typographorum, quorum omnium Libri, quos typis ſuis ipſi vulgarant, prohibentur, a quocumque demum Auctore, aut idiomate prædiſſent.

IV. Spectant hæcenus dicta Indicem quidem a Paulo Papa IV. editum anno MDLVII. edidit enim & ipſe alium Indicem labente anno ſequenti MDLVIII. die nempe xxx. Decembris, & ſub ipſo initio ſequentis anni MDLIX. uti notavit Auctor Bibliothecæ volantis, *Scanzia xxiiij.* pag. 122. ubi etiam hunc recenset novi ejus Indicis titulum: *Index Auctorum, & Librorum, qui ab Officio Sanctæ Romanæ & Universalis Inquiſitionis caveri ab omnibus, & ſingulis in univerſa Chriſtiana Republica mandantur, ſub Cenſuris*

*ris contra legentes, vel tenentes Libros prohibitos in Bulla, quæ lecta est in Cæna Domini, expressis &c. Romæ apud Antonium Bladum anno MDLIX. in 4. & in 12. in quorum altero, ad calcem Decreti legitur: die xxx. Decembris MDLIX. (sed legendum ait memoratus Auctor, MDLVIII. præfata litteræ affixæ, & publicatæ ad valvas Basilicæ Principis Apostolorum &c. Duo itaque Indices confecti fuere a Paulo IV. quem etiam primum fuisse qui e Romanis Pontificibus Indicem ipsum ediderit, Scriptores passim testantur, ii præsertim, qui Vitam & gesta ejusdem Pauli IV. Papæ enarrant, inter quos Andreas Victorellus in suis ad Ciaconium Notis, Tomo III. col. 816. ita de ipso Pontifice scribit: *Cardinalis Theatinus sub Julio III. Indicem Librorum non legendorum conficere cœperat, at Romanus Pontifex delectus, primus fuit suo sæculo, qui universalem perniciosorum Librorum Indicem contexere, & ad usum revocare studuit. Ante illum nulla Pontificia, aut Cæsarea Lex propositis panis caverat in universum, ne Libri hereticorum, aut alii pestilentes legerentur.**

V. Teste Spondano ad annum MDLVII. Num. v. illud in hoc Pauli Indice rigidius visum, quod pœna legentibus libros eo catalogo comprehensos, ac prohibitos denunciata, erat excommunicatio latæ sententiæ, Pontifici reservata; privatio, atque incapacitas quorumque munerum, ac Sacerdotiorum; perpetua infamia, cum aliis pœnis arbitrariis. Quo factum est, ut Pius IV. Pauli successor rigorem hunc temperans, totum illud Indicis Librorum negotium ad Concilium Tridentinum retulerit, ut infra dicemus. Interim tamen, ut idem Spondanus narrat, Petrus Paulus Vergerius, infamis ille Apostata, adversus hunc Pauli IV. Indicem, aliosque Librorum hæreticorum jam antea a Theologis Parisiensibus, Lovaniensibus, & Hispanincis promulgatos, ita Latine, atque Italice debacchatus est, ut quamvis nusquam non insaniat potius quam scribat, in Libellis tamen contra ejusmodi Catalogos furori suo omnes habenas laxaverit. Cujus, ac similium amentiam apposite tetigit, contuditque Jacobus Gretserus Societatis Je-

Jesu Theologus præstantissimus in suis Commentariis de Librorum hæreticorum, & noxiorum prohibitione.

C A P. V.

De Indice jussu Concilii Tridentini ordinato, variisque in eo conscribendo Patrum sententiis, ac de F. Francisco Forerio Dominicano Tridentinæ in eam rem Deputationis Secretario.

I. **Q**uod ad Concilium Tridentinum attinet, cum post suspensionem decem circiter annorum rursus sub Pio IV. omni suspensione sublata, ejus resumtio in Sessione habita die xvi i i. Januarii anni MDLXII. communi Patrum assensu declarata esset, habita fuit Congregatio die xxv i. ejusdem mensis, in qua Præsidibus Concilii inter alia propositum fuit, *ut Libri a diversis Auctoribus post hæreses natas editi, una cum Catholicorum contra eos. Censuris examinarentur, quo Synodus quid super illis habeat decernendum, statuat.* Varias fuisse super hoc Articulo Patrum sententias, ex Actis quidem ejusdem Concilii refert Vanespen Parte 1. Juris Ecclesiastici universi, Titulo xx i i. Cap. iv. Num. ix. Et quidem inter alia Archiepiscopus Granatensis ab ea occupatione Patres dehortatus fuit, quippe longissima, & quæ Synodum abstraheret ab altioribus negotiis, magisque indigentibus ipsius proxima cura. Bartholomæus de Martyribus Archiepiscopus Bracarenensis adjecit, *posse id committi Academicis.* Petrus Contarenus Paphensis Episcopus, non mediocri affectus benevolentia, ut rem narrat Pallavicinus Lib. xv. Historiæ Concilii Tridentini, Cap. xix. Num. x. erga Paulum IV. cui & familiaris intimus fuerat ante Pontificatum, & a quo postea Episcopatum acceperat, suadebat, ut nulla fieret in Indice Pauli mutatio: *Esse verius recentium ingeniorum intemperantiam, quam Religionis studium, velle decessorum opera reformare, non quo illa meliora redderentur, sed quo ipsi præstantiores ostentarentur.* Caverent, ne

sanctiones Majorum illi revocantes, posteros stimularent ad eorum exempla sequenda in eorundem Decretis abolendis. E contra Daniel Barbarus Patriarchæ Aquileensis adjutor monuit, Indicem ipsum Pauli IV. plurima correctione indigere, cum eodem modo proscriberet opus licentiæ juvenilis, & opus hæreticæ pravitatis. Christophorus Patavinus censuit, novum ab initio non esse Indicem constituendum, sed Indicem Pauli reformandum; monuitque deinde, quosdam etiam ex Libris esse, qui inter bona plurima, mali aliquid continebant, & hos emendandos quidem esse, non omnino refellendos; cum ea sit terrenarum rerum conditio, ut is, qui mallet omne bonum, quod purum non est, eliminare, & non potius illas defæcandas studere, genus humanum omni bono privaret.

II. Inter has Patrum dissensiones, & disputationes, tandem plerisque consentientibus, ut aliquibus conficiendi Indicis cura demandaretur; ac rogatis Patribus, ut Librorum Censores, qui eam curam susciperent, designarent, communi suffragio Præsidentibus Concilii horum electio data fuit: *Facta vero, ait Spondanus ad annum MDLXII. Num. XVII. a Patribus potestate Legatis Apostolicis deligendi nonnullos, qui Indicis Librorum conficiendo, cujus curam Pontifex, Pius IV. ad Concilium remiserat, vacarent, designati fuere ab iis Georgius Drascovitius Episcopus Quinqueecclesiensis, Orator Cæsareus pro Regno Hungariæ, Joannes Trivisanus Patriarcha Venetus: IV. Archiepiscopi, (inter quos primas tenebat post Patriarcham Bartholomæus de Martyribus Archiepiscopus Bracharensis, Ordinis Prædicatorum) IX. Episcopi, Abbas unus Cassinensis, duo Generales, Minorum de Observantia, & S. Augustini; sed ita ut non ante finem Concilii Index publicaretur, ne Protestantes magis exasperarentur. Ubi nota summam Concilii Tridentini Patrum prudentiam, qui, ubi potuerunt, omnem semper præciderunt occasionem Protestantes exasperandi, nullumque non moverunt lapidem, ut sapientissima utentes oeconomia jam alias a pervetustis Sanctis Patribus adhibita, eos ad Catholicam Fidem, & unitatem Ec-*

Ecclesiæ revocarent . Porro Secretarius ejus Deputationis in Indice conficiendo fuit F. Franciscus Forerius Lusitanus Ordinis Prædicatorum , ut videre est in ipsius Præfatione in Indicem Librorum prohibitorum . Dicitur Deputatio Tridentina, quod , ut ex dictis hætenus constat , & ut jam notavit eruditissimus Hyacinthus Libellus Indicis olim Secretarius in sua ad Lectorem Admonitione præfixa Indici Tridentino, quam legere est in Indice Librorum prohibitorum jussu Alexandri Papæ VII. edito anno MDCLXIV. pag. 228. *Sacra illa, & Oecumenica Synodus solerter advertens quantum noceat Christifidelibus Librorum malorum lectio, plures Episcopos doctrina, & pietate conspicuos deputavit, quorum cura, adhibitis item nonnullis Doctoribus, omnium Librorum damnatae lectionis Index accurate conficeretur . Tum vero mox etiam subdit idem Libellus : Et hæc dicta est Deputatio Tridentina, cui, ut dixi, a Secretis fuit Franciscus Forerius, quem cum laude commemorat in Apparatu Sacro Possevinus .*

III. Patrum resolutionem de Indice conficiendo, edito Decreto, publicavit Synodus Tridentina Sessione XVI. habita die XXVI. Februarii anno MDLXIII. declaravitque, se censuisse, *ut delecti ad hanc disquisitionem Patres de Censuris, Librisque, quid facto opus esset, diligenter considerarent, atque etiam ad eandem Sanctam Synodum suo tempore referrent, quos facilius ipsa possit varias, & peregrinas doctrinas, tanquam zizania a Christianæ veritatis tritico separare, deque his commodius deliberare, & statuere, quæ ad scrupulum ex complurium animis eximendum, & tollendas multarum querelarum causas, magis opportuna videbuntur.* Post hunc Patrum delectum, & publicatum hoc Decretum, nihil de memorati Indicis negotio in Concilio ulterius actum legitur usque ad illum diem, quo finis Concilio impositus fuit, in continuatione scilicet Sessionis XXV. quando inter alia, etiam Decretum Patribus prælectum, & ab ipsis probatum fuit, in quo prius relatis, quæ Sessione XVI. decreta erant, ita citato loco, ubi agitur de Indice Librorum &c. subditur : *Audiens nunc,*

nunc, nempe Sancta Synodus, *huic operi ab eis*, quibus scilicet opus conficiendi Indicis fuerat demandatum, *extremam manum impositam esse, nec tamen ob Librorum varietatem, & multitudinem, possit distinde, & commodè a Sancta Synodo dijudicari, præcipit, ut quicquid ab illis prælitum est, Sanctissimo Romano Pontifici exhibeatur, ut ejus judicio, atque auctoritate terminetur, & evulgetur.* Duo igitur, ut idem Vanespen observat, in Tridentina Synodo circa Indicem Librorum acta sunt. Primum, cura illius conficiendi demandata quibusdam delectis Patribus fuit cum relatione ad Synodum, quo ipsa commodius deliberare de eo, atque statuere posset. Alterum, ut omnium eorum, quæ a delectis illis Patribus acta erant, relatio ad Sanctissimum Romanum Pontificem fieret, ut ejus judicio opus illud terminaretur, atque evulgaretur.

IV. Licet autem in Tridentina Synodo solummodo actum esset de conficiendo Indice Librorum hæreticorum, vel de hæresi suspectorum, aut alias perniciosorum, nec aliud delectis Patribus commissum legatur, quo scilicet facilius ipsa Synodus *posset varias, & peregrinas doctrinas, tanquam zizania a Christianæ veritatis tritico separare*, ipsi tamen Prælati ad hoc opus deputati, quos supra memoravimus, animadvertentes, ut ait laudatus Forerius in citata Præfatione, *in Indice Romæ jam pridem confecto nonnulla parum explicite posita, quæ interpretatione indigerent, re multum diuque deliberationibus agitata, ac Viris etiam ex omni natione Theologicæ Facultatis scientissimis in Consilium adhibitis, subiectas Regulas componendas judicarunt, ut quod ejus fieri posset, doctorum hominum commodis, & studiis, salva veritate, ac religione, prospiceretur.* Porro prædictum Indicem cum Regulis subiectis, quæ sunt numero x. Pontificiis tandem Litteris in forma Brevis, quæ incipiunt, *Dominici Gregis*, editis sub die xxiv. Martii anno MDLXIV. adeoque tribus a soluta Synodo mensibus, probavit, atque ab omnibus observari mandavit Pius Papa IV. postquam scilicet dixit, se cum Indicem doctissimis, probatissimisque Prælatis legendum, examinandum-

dumque tradidisse, atque etiam ipsum per se legisse. Sane Provinciam edendi hunc Indicem commisit laudatus Pius Paulo Manutio, qui eum mox edidit Romæ in ædibus Populi Romani, hoc eidem præfixo Titulo: *Index Librorum prohibitorum cum Regulis confectis per Patres a Tridentina Synodo delectos, auctoritate Sanctissimi Domini Nostri Pii IV. Pontificis Maximi comprobatus*. Extant in hoc Indice memoratæ Pii IV. Litteræ, & celebris Admonitio, seu Præfatio doctissimi Patris F. Francisci Forerii Dominicani, qui tunc erat a Secretis Tridentinæ Deputationis.

V. Quod formam hujus Indicis spectat, in eo unaquæque Alphabeti Litera tres Classes habet ad exemplum Indicis Pauli IV. In prima Classe non tam Libri, quam Librorum Scriptores continentur, qui aut hæretici, aut nota hæresis suspecti fuerunt. Ut enim ait laudatus Forerius Tridentinæ Deputationis ad conficiendum Indicem Secretarius in memorata sua Præfatione, *horum Catalogum fieri oportuit, ut omnes intelligant, eorum scripta, non edita solum, sed edenda etiam, prohibita esse*. Monet tum etiam Forerius, non in omnes hujusmodi Auctores a Tridentinis Patribus inquisitum fuisse, sed iis pene contentos fuisse, qui in Romano Catalogo descripti fuerant. In secunda Classe, teste eodem Forerio, referuntur Libri, *qui propter doctrinam non sanam, aut suspectam, aut quæ offensionem etiam in moribus Fidelium asferre potest, rejiciuntur, etiamsi Auctores, a quibus prodire, ab Ecclesia nunquam desciverint*. Tertia tandem Classes, ut idem Scriptor docet, *eos Libros complectitur, qui sine Scriptoris nomine exierunt in vulgus, & doctrinam continent, quam Ecclesiæ Romana tanquam Catholica Fidei, aut morum integritati contrariam, refutandam, ac refellendam esse decernit*. Non enim omnes Libros, qui nomen Auctoris non præferunt, damnandos putarunt; quandoquidem sæpe Viros doctos, ac Sanctos novimus, ut Respublica quidem Christiana ex eorum vigiliis fructum caperet, ipsi vero inanem gloriam evitarens, Libros optimos sine nomine edidisse. Hæc Forerius, quæ quidem si conferantur cum his, quæ de Indice

dice Pauli IV. superius dicta sunt, illud nos plane docent, Patres ad Indicem concinnandum delectos, licet Pauli IV. Indicem non quidem in omnibus probarint, ejus tamen in multis normam tenuisse.

VI. Porro cum ex dictis superius constet, Synodum Tridentinam nullum Indicem Librorum vetitorum composuisse, sed dumtaxat Patribus quibusdam ejus curam demandasse, & quidem expresse, *cum relatione ad Synodum*, ut facta relatione, ipsa demum commodius deliberare, & statuere posset; ac tandem instante Synodi fine, opus a Patribus delectis confectum ad Romanum Pontificem remisisse, *eo quod ob Librorum varietatem, & multitudinem, non posset distincte, & commode a Sancta Synodo dilucidari*; illud profecto sequitur, quod & jam observavit Vanespen loco citato, hunc Indicem, non alio ex capite posse dici Tridentinum, nisi quod Synodus quibusdam Patribus ejus conficiendi curam demandaverit, atque hi, durante Concilio, huic operi ultimam manum apposuissent, aut saltem, ut loquitur Clemens VIII. in Bulla, quæ incipit, *Sacrofanctum*, edita anno MDXCV. *in negotio illo non parum essent progressi*; aut denique, quia totum illud negotium remissum fuit ad summum Romanum Pontificem. Fuit his Pius IV. de quo superius diximus.

VII. Sed audiamus tandem uti ipsam rem narrat laudatus Pontifex Clemens VIII. in citata sua Constitutione, *Sacrofanctum*. Causam enim ibi recenset, cur suum Synodus Tridentina Indicem confecerit, probatum deinde a Pio IV. Pontifice: *Sed cum nostris hisce calamitosiss, inquit, & novissimis temporibus antiquus humani generis hostis a sua malitia nunquam recedens, ad eandem Catholicam doctrinam, & veritatem labefactandam, pestiferas hæreses, & detestabiles errores, aut novos conflasset, aut veteres ex inferis excitasset, Sacra Tridentina Synodus pessilentem noxiorum Librorum copiam, quæ plus nimio creverat, coercere, aut auferre cupiens, primum quidem doctissimos aliquot Viros delegit, qui de tota ea re cognoscerent, & deliberarent; deinde vero cum in negotio illo*

NON

non parum progressi essent, justis de causis eadem Synodus permota, ad ipsam Apostolicam Sedem, integram rem deferendam statuit. Quid circa eam rem egerit Pius IV. qui tunc universam regebat Ecclesiam refert, idem memoratus Pontifex Clemens VIII. his verbis: Itaque felicitis recordationis Pius Papa IV. Prædecessor noster, qui tunc ad Ecclesiæ gubernacula sedebat, Prælati quibusdam doctrina, & prudentia præstantibus adhibitis, Indicem Librorum prohibitorum, & Regulas quasdam per suas Litteras in forma Brevis promulgavit, & ejusmodi noxiorum Librorum detrimendis depellendis opportune providit. Litteræ Pii Pontificis IV. editæ fuerunt die xxiv. Martii anni MDLXIV. earumque initium est: Dominici gregis custodia.

C A P. VI.

De variis aliis Librorum prohibitorum Indicibus jussu & auctoritate Sacræ Congregationis Indicis confectis, ac promulgatis studio, & cura Secretariorum ejusdem Sacræ Indicis Congregationis.

I. **P**RÆTER memoratos superius vetitorum Librorum Indices a Paulo IV. Pontifice primum, ac deinde a Generali Synodo Tridentina ordinatos, a Sacra Congregatione Indicis jussu Clementis Papæ VIII. concinnatus, comprobatusque ab eodem Pontifice fuit novus Index, cui Titulus: *Index Librorum prohibitorum cum Regulis confectis per Patres a Tridentina Synodo delectos auctoritate Pii IV. primum editus, postea vero a Sixto V. auctus, & nunc demum auctoritate Clementis VIII. recognitus, & publicatus: instructione adjecta de exequendo prohibitionis Decreto, deque sincere emendandi, & imprimendi Libros ratione.* Romæ apud Impressores Camerales MDXCVI. Indicem ipsum, cum in dies crescerent pravam doctrinam continentes Libri, atque iccirco prohibiti, primum fieri curavit Gregorius XIII. ipsumque commisit Sacræ Indicis Congregationi a S. Pio V. uti dicemus inferius Cap. VII.

institutæ, cui interfuit Cardinalis Montaltus, qui fuit postea Sixtus Papa V. quique cum ante obierit, quam Index ipse perfectus fuisset. Clemens VIII. edendum illum tandem curavit, ut idem Clemens testatur suo Diplomate in forma Brevis dato anno MDCXV. & Indici ipsi præfixit.

II. Ergo in citato Diplomate, quod incipit, *Sacro-sanctum*, Clemens Papa VIII. postquam de Indice Tridentino, ejusque approbatione a Pio Papa IV. facta disseruit, ita deinde de novo Indice, quem conficiendum Sixtus V. curaverat, perfectique tandem Clemens ipse, ediditque in lucem, statim subjicit: *Ceterum licet illa pro temporis ratione prudenter fuerint tunc constituta, tamen cum Satanæ astutia, in ejusmodi Librorum editione, nova in dies mala crescerent (nam post illud tempus alii etiam Libri perniciosi, partim conscripti atque editi, partim qui scripti erant, & antea delituerant, in medium prodire, quorum lectione simpliciores, & incauti homines in errores induci facile poterant:) propterea pie memoria Sixtus Papa V. Prædecessor noster, multis illustratis, atque ad Regulas adjectis necessariis rebus, mandavit, ut nonnulli alii ejusdem generis Libri eidem Indici adderentur. Verum cum idem Sixtus, re minime absoluta, ab humanis excesserit: Nos animarum salutem, quantum cum Domino possumus, consulentes, quod jam pridem utiliter captum, & a multis diu desideratum erat, hoc tempore omnino perficiendum, atque in lucem edendum duximus. Fusc de ipso Indice disserit laudatus Pontifex; qui quidem Index, ut notat eruditus Echard Tomo II. Scriptorum Ordinis Prædicatorum ad annum MDCXXXI. pag. 428. prodiit curis Fratris Pauli Pichi a Burgo S. Sepulchri, qui tunc temporis Secretarii Congregationis Indicis munereungebatur, ut dicemus suo loco inferius, Lib. II.*

III. Rursus alter Index prodiit Romæ anno MDCXXXI ex Typographia Cameræ Apostolicæ cum hac Epigraphæ in fronte Libri: *Elenchus Librorum omnium tum in Tridentino, Clementinoque Indice, tum in aliis omnibus Sacræ Indicis Congregationis particularibus Decretis hætenus*

*nus prohibitorum ordine uno alphabetico per Fratrem Franciscum Magdalenum Capiferreum Ordinis Prædicatorum Sacræ Congregationis Secretarium digestus. Nuncupavit hunc Librum Capiferreus Urbano Pontifici VIII. uti ex ipsa dedicatoria Epistola constat initio Libri præfixa, qui licet typis mandatus fuerit jussu quidem, & approbatione Sacræ Congregationis Indicis, uti ex ejusdem Actis liquet Tomo IV. pag. 54. eidem tamen Congregationi placuit, ut non ejus nomine, & Decreto, sed tantum nomine Secretarii tanquam privati Auctoris publicaretur. Legenda est hujus Scriptoris Epistola ad Lectorem, ubi sic inter alia inquit: *Arduum ergo negotium benigne Lector debito omnibus amore, ex officio, quo fungor, communi utilitati uti potui, lenivi, communemque laborem in me solum transvexi, ut tu sine labore, vel hoc solo Elencho, quicquid alibi multis, lectione, tempore, molestia, vix, aui ne vix quidem poteras comparare, Libros erroribus, hæresibusque infames uno prospectu haberes ante oculos, evitareque; sic enim semper quæ tantum utilia sunt addisces ad gloriam Dei, & animæ salutem, quæ omnium scopus esse debet. Uttere tu ergo, frueri, & alieno labore quiescens, in Dei charitate profice. Ita ille, de quo videsis quæ dicemus nos Lib. II. ubi de ipso Secretario agemus.**

IV. Alius Index prodiit etiam Romæ Typis Cameræ Apostolicæ anno MDCLXIV. sub hoc Titulo: *Index Librorum prohibitorum Alexandri VII. Pontificis Maximi jussu editus*; sed curis tamen Fratris Hyacinthi Libelli Secretarii Congregationis Indicis, qui etiam ipsum Indicem Apostolico laudati Alexandri Papæ Diplomate munitum, quod incipit, *Speculatores*, sua ad Lectorem Præfatione ditavit, sic inter alia inquires: *Qui hunc Indicem habet, nihil illi deesse videtur, quod ad perfectam, & absolutam Librorum prohibitorum cognitionem desiderare possit, solumque ad illum refertur auctoritas, & robur Brevis Apostolici hac in materia editi, qui superius legitur.* Tum vero mox subjicit: *Ceteri vero Indices privata opera, ac privato consilio factos scias, quo commoditati utentium, prout cui-*

que de nomine Auctoris, aut materiae notiores Libri sunt, providentur; & maxime bibliopolarum, quorum inprimis interest, promptam, & expeditam habere malorum Librorum scientiam, & ut habeant quamexactissimam, publicæ utilitatis ratio magnopere desiderat, ne facile lolium inter spicas, inter medicamenta venena versentur. Recusum fuisse hunc Indicem Alexandri VII. auctoritate probatum memorati F. Hyacinthi Libelli Secretarii Congregationis Indicis curis, notavit etiam Echard citato Tomo II. ad annum MDCLXXXIV. pag. 701.

V. Teste eodem Echard in prædicto Tomo ad annum MDCCIII. pag. 762. curis F. Jacobi Ricci Congregationis Indicis Secretarii prodiit Romæ ex eadem Cameræ Apostolicæ Typographia anno MDCLXXXI. *Index Librorum prohibitorum Innocentii XI. Pontificis Maximi jussu editus:* Sed de his videri possunt quæ infra dicemus Lib. II. ubi seriem eorum describemus, qui a Secretis Sacræ Indicis Congregationis fuere.

C A P. VII.

De institutione Congregationis Indicis facta a Pio Papa V. deque Cardinalibus, Consultoribus, ac Secretario in ea constitutis, & novis facultatibus a sequioribus Pontificibus eidem Congregationi concessis.

I. **Q**Uamquam nulla extet hodie Constitutio S. Pii V. quæ nos doceat, institutam ab ipso fuisse Congregationem Indicis, quia scilicet illa vel in aliquo archivo latet, vel deperdita omnino est, adubitari tamen nequit, quin ipse S. Pius anno MDLXXI. Congregationem instituerit S. R. E. Cardinalium deputatorum super reformatione Indicis Librorum improbatæ lectionis, & emendatione Librorum impressorum, & imprimendorum. Constat & id quidem ex Regestis ejusdem Congregationis a laudato Pontifice institutæ, in quibus etiam hi quatuor sequentes recensentur Cardinales ab eo deputati, nempe,
Cla-

Clarevalensis Ordinis Cisterciensis, Theanensis Ordinis Prædicatorum, de Montalto Ordinis Minorum Conventualium, qui fuit postea Sixtus Papa V. & Justinianus Ordinis Prædicatorum. Deputati quoque fuere ab eodem Pio Pontifice sequentes Consultores, nempe, Episcopus Regiensis Ordinis Prædicatorum, Episcopus Signinus Ordinis Eremitarum S. Augustini, Sacrista Pontificis, Magister Sacri Palatii, ac Procuratores Generales Ordinum, Minorum de Observantia, & Conventualium, Eremitarum S. Augustini, Carmelitarum, & Servorum Virginis. Secretarius autem Congregationis deputatus fuit F. Antonius Possius, quod diu scilicet Tridenti in Concilio commoratus, notitiam haberet Deputationis Indicis, de qua dictum superius est.

II. Ceterum, si nos modo primam spectemus originem, primus Tridentinæ Deputationis Indicis Secretarius fuit F. Franciscus Forerius Dominicanus, uti jam non uno in loco notavimus. Quamquam vero Tridentina Deputatione in Indicis Congregationem a S. Pio V. erecta, ejusdem Secretarius ab ipso Pontifice deputatus Possius fuerit, ad illud tamen munus deinceps Summi Pontifices non alios assumpserunt, nisi Fratres Ordinis Prædicatorum, ut infra ostendemus ex eorum Catalogo, qui ad hanc usque diem a Secretis Congregationis Indicis non interrupta serie ex eodem laudato Ordine extitere. Interim audiendus hoc loco doctissimus F. Hyacinthus Libellus Secretarius olim Indicis, qui in sua ad Lectorem Admonitione præfixa Indici Tridentino, quem descripsit in Libro, cui Titulus, *Index Librorum prohibitorum Alexaudri VII. Pontifici Maximi jussu editu.* pag. 228. ita ad nostram rem inquit: *Hanc postea Deputationem, Tridentinæ Synodi scilicet ad conscribendum Indicem, de qua nos diximus supra, Cap. III. in Indicis Congregationem Pius V. crexit, Secretario eidem assignato Antonio Possio, ad quod munus deinceps Summi Pontifices Viros ex Ordine Prædicatorum assumpserunt.*

III. Errat vero inter alios Cardinalis de Luca, Relationis Romanæ Curie, Discursu XIX. ubi ait, Sixtum Pa-
pani

pam V. Congregationem Indicis erexisse. Erecta etenim fuit ipsa Congregatio a S. Pio V. uti vel ex ipsa ejusdem Sixti V. Constitutione LXXIV. intelligere licet, qua quidem non aliud edicit, quam ampliores facultates se Cardinalibus tribuere, *qui ad Libros prohibendos, expurgandosque delecti sunt.* Sed jam longe ante Sixtum V. Gregorius Papa XIII. anno 1. sui Pontificatus, Christi vero MDLXXII. peculiari Diplomate dato die XXI. Septembris, quod incipit, *Ut pestiferarum opinionum*, ipsi Congregationi Indicis jam institutæ hæc concessit facultates: *Decernentes, vobis, seu majoris vestrum parci, ut etiam adhibitis spectatæ fidei viris, Sacræ Theologiæ, & Canonum peritis, secularibus, & Regularibus (quibus solis, & ad hunc effectum dumtaxat, Libros prohibitos tenendi, & legendi licentiam tribuere possitis) omnes, & quascumque obscuritates, & difficultates in ipso Indice, & ejus Regulis exortas, & in posterum emergentes, declarare, aperire, & definire, Libros hæreticorum, aut suspectos, aut quoquo modo improbatorum Scriptorum expurgare, quos permittendos esse censueritis, permittere, in eo Indice non comprehensos reponere, permittos tollere, venales, qui vendebantur ubique locorum etiam prohibere, prohibitos, ac peritorum opera expurgatos, & a vobis probatos legendos, & tenendos permittere, quæ videbuntur addere mutare, supplere & emendare &c.* Itaque jam ante Sixtum V. erecta non modo fuerat Indicis Congregatio, sed & eidem ante Sixtum ab illius prædecessore Gregorio XIII. concessæ amplæ facultates fuerant.

IV. Fateri autem illud cogimur, laudatum Sixtum V. tametsi non sit ipse Auctor Sacræ Congregationis Indicis, novam eidem formam præbuisse, amplioresque facultates Cardinalibus, qui eandem constituunt, tradidisse, ut ex prædicti Pontificis Diplomate addiscimus dato die XXI. Januarii anni MDLXXXV. ubi de ipsis Cardinalibus loquens, sic inter alia inquit: *Has illis facultates tribuimus, ut librorum catalogos, & Indices, eorumque Regulas recognoscant, & examinent ceterorum Auctorum Libros prohibi-*

tos, & suspensos diligenter excutiant, & prout expedire judicaverint, permittant. Libros, qui post Indicem jussu Concilii editum prodierunt, Catholica Doctrina, Christianorumque morum disciplinæ repugnantem expendant, & recognoscant, ac ubi nobis retulerint, nostra auctoritate rejiciant. Committimus quoque eidem Congregationi, ut Theologis, Canonistis, aliisque peritis Viris ad hoc negotium adhibitis eam ob rem tantum, non vero aliis Libros vetitos tenendi, legendique, etiam absque nostra licentia impertiat facultatem. Nulla hic mentio erectionis Congregationis Indicis a Sixto V. Papa factæ, sed de ampliori facultate dumtaxat agitur concessa Cardinalibus ipsius Congregationis ab eodem Pontifice. Errant itaque Auctores passim, qui putant, & scribunt, Sacram Indicis Congregationem a memorato Sixto Papa V. institutam primum fuisse. Constat enim evidentissime ex hætenus dictis, jam ante illum fuisse erectam.

V. Facultates Congregationi Indicis hucusque concessas novo muniti robore Clemens Papa VIII. peculiari ea de re Brevis edito die VII. Octobris anni MDXCV. cumque non multo post in ipsa Sacra Congregatione Indicis die xxx. Julii anno MDXCIX. orta difficultas fuisset de concedendis licentiis legendi Libros prohibitos, Cardinalis Baronius, qui eidem Congregationi præerat, anno MDC. die xx. Januarii Congregationi retulit, *viva vocis Oraculo sibi facto, Sanctissimum Papam Clementem Octavum declarasse, quod Illustrissimi Cardinales pro tempore deputati super Congregatione Indicis plenam habeant potestatem, ac facultatem, nedum super Libros impressos, vel imprimendos suspendendos, prohibendos, & corrigendos, permittendos, concedendos, verum etiam super Auctores Librorum, & eosdem imprimentes, & legentes, vel personas quomodocumque, aut qualitercumque Indicis materiam, aut Libros concernentes, dummodo in causa hæresis nullatenus se intromittant.* Legitur hoc Baronii testimonium Tomo 1. Actorum ipsius Sacræ Congregationis Indicis, pag. 128.

CAP.

C A P. VIII.

De auctoritate Sacræ Congregationis in Libros non modo impressos, sed & in imprimendos, ac de qualitatibus quibus Librorum Censores præditi esse debent.

I. **I**nter alia privilegia Sacræ Indicis Congregationi concessa a Summis Pontificibus, recenseri quoque & illud, ut ipsa Sacra Congregatio præcipuam habeat auctoritatem in Libros non modo impressos, verum etiam in imprimendos, docet nos Clementis VIII. Constitutio, quæ incipit, *Sacrofanctum*, data die decima septima Octobris anni MDXCV. ubi privilegium ipsum, quod Sacræ Congregationi concessum ait a prædecessoribus Romanis Pontificibus Maximis, novo munit robore, sic inter alia inquires: *Quo autem facilius negotium cum prohibitionis, tum expurgationis, & impressionis Librorum peragatur, eas omnes facultates, privilegia, & indulta, quæ recolende memoriæ Pius V. Magistro Sacri Palatii primum, deinde Gregorius XII. & Sixtus V. Cardinalibus Congregationis prædictæ concesserunt, quorum tenores hic volumus haberi pro expressis, confirmamus, & quatenus opus est, innovamus in his omnibus, quæ additis in hoc Indice non adversantur. Volumusque propterea, ac decernimus, ut si quæ in posterum dubitationes, aut controversiæ circa ipsum Indicem, illiusque Regulas, aliaque illis addita emerferint, ad Congregationem supradictorum Cardinalium, Nobis, aut Successoribus nostris, si rei gravitas id postulaverit, consultis, declarentur, & decendantur. Quorum auctoritatem cum permittendis, tum prohibendis, expurgandis, & imprimendis Libris, aliisque ad eam rem pertinentibus explicandis, volumus esse præcipuam &c.*

II. Eam esse præcipuam Sacræ Congregationis auctoritatem in Libros non modo impressos, verum etiam in imprimendos, constat etiam ex Decreto ejusdem Congregationis Feria II. die III. mensis Februarii anno MDCLIX. edito in Palatio Apostolico Quirinali ab Eminentissimis,
& Re-

& Reverendissimis Dominis S. R. E. Cardinalibus ab Alexandro Papa VII. Sanctæque Sede Apostolica ad Indicem Librorum eorundemque permissionem, prohibitionem, expurgationem, & *impressionem* in universa Republica Christiana specialiter deputatis, Præfecto B. Cardinali Spada, Secretario autem Hyacintho Libello Ordinis Prædicatorum, qui Decreto subscripsit, quod eodem anno impressum fuit typis Camera Apostolicæ. Operæ autem pretium duxi Decretum ipsum hoc loco describere, quo non solum magis magisque pateat memorata Sacræ Congregationis Indicis auctoritas in Libros impressos, & imprimendos, verum etiam, ut illud demonstremus, quod superius innuimus de qualitatibus, quibus præditi esse debent Librorum Censores. Est vero Decretum hujus tenoris.

III Sacra Congregatio animadvertens, foedam ac pestiferam malorum Librorum segetem summa cum fidelium offensione, ac periculo in vinea Domini quotidie crescere, ac propagari, ejusque vitii culpam apud illos residere potissimum, quorum curæ pravi hujusmodi seminis extirpatio committi solet, dum in probandis novorum operum impressionibus cautelas, & monita, præsertim vero per novissimam Lateranensem, ac Tridentinam Synodos comparata in exequendo suo munere adhibere non curant; statuit gravissimo huic incommodo, & ni mature subveniatur, in certissimam pestem animarum, atque perniciem erupturo, quantum, adjuvante Domino, sperari ab ope humana fas est, convenienti remedio occurrere, ac providere, ne impuri impotentium ingeniorum foetus passim, & sine delectu prodire in publicum, inque hominum luce, qua prorsus indigni sunt, versari cernantur. Quapropter, habito prius verbo cum Sanctissimo Domino Nostro omnes, & singulos Patriarchas, Archiepiscopos, Episcopos, eorumque Vicarios, & Officiales, Inquisitores hæreticæ pravitatis, Regularium cujuscunque Ordinis Superiores, omnesque alios, qui Librorum editioni, publicationi, impressioni assentiendi ordinariam, aut delegatam auctoritatem exercent, admonendos decrevit, prout tenore præ-

D

sen-

sentium districte illos, & serio admonet, ut dent operam diligenter, ne ad examen Librorum hujusmodi personas affectui Auctorum quomodolibet addictas, præsertim vero propinquitatem illos, aut alia (quantumvis a longe petita ea sit) veri, & sinceri judicii corruptrice necessitudine contingentes admittant. Super omnia autem ab oblati sibi in hanc operam per eosdem Auctores Censoribus caveant, sed iis demum utantur, quos doctrina, morumque integritate probatos ab omni suspitione gratiæ intactos, ac si fieri potest, Auctoribus ipsis ignotos, & unius boni publici, Deique gloriæ studiosos cognoverint. Quo vero ad Auctores Regulares cujuscumque Ordinis, & Instituti sint; illud præterea inviolabiliter observandum injungit, ne eorum scripta, vel opera aliis ejusdem Instituti Regularibus a præfatis imprimendi facultatem impertientibus (exceptis tamen quibuscumque eorundem Auctorum Regularium Superioribus Regularibus, quos Sacra Congregatio in eo duntaxat Librorum examine, quod intra illorum Ordinem fieri debet, hac parte præsentis Decreti comprehendere non intendit) examinanda committantur; sed Viri in id extra eam familiam, atque alterius Ordinis, pii, doctique, & a partium studio, atque ab amoris, & odii stimulis prorsus remoti eligi debeant. Admonet præterea omnes, & singulos, quibus hoc munus examinandorum librorum pro tempore deputari contigerit, ut memores officii sui, memores fidei, qua digni ab Ecclesia judicantur, debitum operi sibi credito studium, diligentiam, Religionem adhibeant, nec ea detrimenta, atque incommoda, quibus a noxiorum Scriptorum lectione fidelium animas affici necesse est, in se ipsos, suasque conscientias redundare patiantur, neve gravissimarum Dei offensarum, ac peccatorum inde orientium rationi se se tam in hoc seculo Apostolicæ Sedis, quam in extremo severi judicii examine obnoxios esse velint. In quorum fidem manu, & sigillo Eminentissimi, ac Reverendiss. DD. Cardinalis Spadæ Episcopi Prænestrini Sacræ Congregationis Indicis Præfati, præfens Decretum signatum, & munitum fuit. Datum

tum Romæ in Palatio Apostolico Quirinali, die, & anno supradictis.

B. Card. Spada Præf.

Fr. Hyacinthus Libellus Ordinis Prædic.

Sac. Congreg. Secretarius.

C A P. IX.

*De præcipuo Secretarii Congregationis Indicis munere
in prohibitione Librorum.*

I. **M**Unus præcipuum Secretarii Congregationis Indicis est, convocare Congregationem, in qua legit denunciationes, vel accusationes Librorum, qui ad Congregationis Tribunal deferuntur, eosque ad Relatores, vel Consultores transmittit, ut in ipsos censuram ferant. Hos vero Relatores, & Consultores, præmissa ad Eminentissimos Cardinales Congregationis scheda, qua & eorum nomina, & Libri referendi titulus continetur, stata Congregationis die, quæ fit in Palatio Apostolico, introducit, ibique illi relationem, & censuram suam legunt; iisque statim dimissis, Eminentissimi Patres iudicium ferunt, quod a Secretario in tabulas refertur. Idem præterea Secretarius Acta ipsa Congregationis Summo Pontifici exponit, quo ab ipso approbentur, & confirmantur, eaque sic approbata, & confirmata, in sequenti Congregatione Cardinalibus denunciat.

II. Cum itaque hæc sint Secretarii Congregationis Indicis partes, Libros nempe, qui accusantur, vel denunciuntur, dumtaxat ad Censores transmittere, & postquam illi Libros ipsos in Congregatione retulerint, Decretum, quod uni Cardinales pronunciarunt, in tabulas referre; profecto jam patet, quanta sit Petri a Valle Clausa, seu Theophili Raynaudi calumnia non modo Secretario Congregationis Indicis, ipsique Congregationi, sed etiam Summo Pontifici impacta, ubi in Libro, *De immunitate Cyriacorum*, quem adversus Dominicanos scripsit, non est

veritus dicere, quod Decreta, quæ ad nos deferuntur Congregationum Romanarum, regit *unus Secretarius Dominicanus omnium litterarum rudis, vere Opilio Arcadicus*. Notavit hæc olim, consutavitque doctissimus æque, ac religiosissimus Scriptor Ordinis Prædicatorum Vincentius Baronius in Epistola sua parantica ad P. Raynaudum, quam vindicationibus Familiæ suæ Dominicanæ, & doctrinæ Thomisticæ præfixit.

III. Sed hi plane irriti conatus sunt, tanta enim est quorundam adversus Dominicanos invidia, ac livor, quod eorum Ordini Summi Pontifices ob probatam diu eorundem fidem, cultum, atque obsequium erga Apostolicam Sedem, tria illa præclarissima officia commiserint, nempe Magistri Sacri Palatii, Secretarii Indicis, & Commissarii Sanctæ Inquisitionis, ut latrare semper, ac fremere, seditionemque adversus ipsos Dominicanos concitare non cessent. Certe unus ex malignantium grege fuit nuper nescio quis pseudodoctor Sorbonicus, qui in epistola sua ad Amicum Belgam, ubi dolet, Bibliothecam Jansenianam Patris de Colonia fuisse a Sacra Indicis Congregatione proscriptam, non contentus Reverendissimum ejusdem Congregationis Secretarium, Virum doctissimum, ac religiosissimum Patrem F. Thomam Augustinum Ricchinium lacerasse, ita etiam in Nota ad eandem Epistolam non est veritus scribere: *Ricchinus nunc Romanæ Indicis Congregationis Secretarius, idest, pro suo arbitrio dominus, & moderator. Nonne tibi videtur optime consultum esse Catholice Ecclesiæ in Libris corrigendis, & proscribendis, tantorum negotiorum Ricchinio domino, ac moderatore! Atqui præterea est, cur graviora metuamus, nisi tandem aliquando missis Fratribus, hujusmodi Curie Romanæ Munera ad graves, & doctos Prælatos devolvantur.*

IV. Antiqua hæc maleficatorum hominum vota sunt, qui invidia abrepti omnem moverunt lapidem, ut Dominicanis memorata superius munia diu fideliterque exercita eriperent. Nota plane sunt Petri a Valle Clausa commenta, quibus refertus est illius Liber, cui Titulus, *De im-*

mu-

munitate Cyrlacorum, ubi non modo Dominicanos passim impetit, sed Cardinales quoque Sacrarum Congregationum, &, quod horrendum est dictum, Romanos ipsos Pontifices. Ut enim ille posset illudere Decretis omnibus, quæ ex Congregatione Indicis, vel ex aliis prodeunt, quibus interfunt aliqui Dominicani, ait, semper esse illa privata, & perversa judicia Dominicanorum, non Decreta Pontificum, aut Congregationum, quasi qui præfunt hujusmodi Congregationibus, aut Summus Pontifex, qui illos delegit, & Decreta eorundem confirmat, ita sint solidi, ut patiantur, se oculis obductis ad nutum Dominicanorum agi, & suo nomine muniri quæcumque ob odium Dominicanorum moliuntur. Potuitne maleferiatus homo apertius aut atrocius grassari in Summi Pontificis, & Cardinalium auctoritatem, & illos inscitæ, ac pene insanæ accusare, quod ab uno, ut perperam loquitur, Fraterculo per giron sinant se quasi muta animalia duci?

V. Notavit hæc jam ante nos Vincentius Baronius in sua sex Dominicanorum defensione, Lib. II. Sectione 1. §. ultimo prope finem, ubi audaciam temeritatemque memorati Auctoris refellit, iustaque expostulatione ita deinceps in eum invehit: *Putasne, manifestius apud hæreticos trahuci Summum Pontificem, Eminentissimos Principes, quasi socordes, & officii sui ignaros, ut cum Congregationibus præfint, atque ubi statuerunt de propositionibus Sa, dixisti, illa fuisse Joannis Mariæ (loquitur de F. Joanne Maria Brisichellenfi Magistro Sacri Palatii) judicia inscitæ, vel malignitatis, vel utriusque referta, & opponis illis Hispanicæ, & Lusitanicæ Inquisitionis judicia, quæ rescindant Romana? Non est nova hæc fraus, & temeritas. Dicitum est, totam Cantabricam Nationem intercessisse Censuræ Romanæ Librorum Poæ, eodem forte prætextu, quod odio Dominicanorum immerito damnatus sit. Quid in Ecclesia, quid in Fide tutum erit, cum in promptu habeant hoc responsum Hæretici? Adscribent privatorum iudiciis quæcumque in se fulmina vibrantur, & dicent, esse inimicorum propria, non judicia publica Ecclesiæ.* Hæc Baronius

nus adversus temeritatem Petri a Vallè Clausæ, & hæc eadem nos adversus pseudodoctoris Sorbonici audaciam, atque insolentiam. Quid enim iste in sua impia Epistola ad Anicum Belgam scripsit, nisi quod olim prædictus Auctor fuerat commentus?

VI. Porro invehitur passim Raynaudus adversus Bristchellensem Magistrum Sacri Palatii, quod ejus Edicto edito die VII. Augusti anno MDCIII. quod legitur ad calcem Indicis Librorum prohibitorum Alexandri VII. Summi Pontificis jussu editi anno MDCLXIV. pag. 294. inter prohibitos libros recenseantur *Emmanuelis Sa Aphorismi Confessoriorum hætenus impressi etiam in Urbe, nisi denuoprodeant impressi Romæ de mandato Magistri Sacri Palatii emendati, & castigati*. Carpit etiam Raynaudus Joannem Baptistam Marinum Sacræ Congregationis Indicis Secretarium, quasi is auctor fuerit Decreti a Sacra Indicis Congregatione editi die IX. Septembris anni MDCXXXII. ubi inter damnatos, & prohibitos Libros notata etiam sunt *Joannis Baptistæ Pozæ Societatis Jesu Cantabri Opera omnia*. Opponit quidem Raynaudus Decretis Romanis Hispanicæ, & Lusitanicæ Inquisitionis Judicia, quæ Romana ipsa Decreta rescindunt. Sed ridenda hæc objectio, nec audienda Hispanica, & Lusitanica Inquisitio, ubi nempe auderet Romanarum Congregationum Judicia rescindere. Quis enim Inquisitioni Hispanicæ, Lusitanicæque tantam potuit conferre auctoritatem, ut valeret Romana Judicia rescindere? Ante Raynaudum insolentissime in Sacræ Indicis Congregationis Decreta investus est quidem memoratus Poza, inique ferens, suum Elucidarium Romæ proscriptum. Legenda Defensio ab eodem de eo Libro edita, supplicesque libelli ad Urbanum VIII. Papam, in quibus non uno in loco exaltans Hispanam Inquisitionem, judicia Romanarum Congregationum deprimit, conaturque etiam probare in sua Apologia secunda, *non temere factum a summa Hispaniarum Inquisitione, cum decrevit, prohibitionem Sacræ Congregationis de Indice non obligare in subiectis sibi Ditionibus, & Provinciis*.

VII. Jam

VII. Jam non defunt qui Pozam, & Raynaudum imitati hodie quoque exultent, Libros complures, ac præsertim Cardinalis Norisii, Romæ probatos, ab Hispanicæ Inquisitionis Indice fuisse nuper prohibitos. Scimus nos profecto quod factum est, sed quo jure, quave causa id factum sit, norunt alii; num etiam factum adprobent cordati, ac sapientes Viri, in aperto res est. Certe in sua Epistola, quam scripsit pseudodoctor Sorbonicus, sat suum contra Sacram Indicis Congregationem, ejusque Sententiam livorem ostendit, sed quemadmodum olim Petrus a Valle Clausa consutatorem habuit eruditissimum Fr. Vincentium Baronium, ita & iste Romanum Philalethem in celebri illa Epistola ad Theologum Lovaniensem de justa Bibliothecæ Jansenianæ proscriptione, quæ tota est in defendendis Sacræ Congregationis Indicis Decretis, & refellenda eorum petulantia, qui Cathedram sibi erexere, ex qua suo arbitrio judicia adversus Auctores, quos sibi adversarios noscerent, tametsi hi de Ecclesia Catholica optime meriti essent, proferebant. Digna lectu Epistola est, meruitque iccirco, ut brevi temporis spatio iterum atque iterum typis committeretur in Italia, Gallia, Germania, & forte aliis etiam locis.

C A P. X.

De summa Secretarii cura, ubi agitur de judicio Librorum magni momenti, & de clausula, donec corrigatur, & donec expurgetur, ab eodem ex Decreto Sacræ Congregationis apponi solita in quorundam prohibitionibus Librorum.

Antiquus plane est Sacræ Congregationis Indicis mos, ut quotiescumque in ipsa Congregatione de Libro agitur, ubi res graves doctrinam Fidei, vel morum spectantæ continentur, contrariæque sunt de eo Relatorum, vel Censorum opiniones, censuræ ipsorum per Secretarium Indicis ad Cardinales Congregationis mittantur, ut diligentius, maturiusque ab ipsis Cardinalibus expendantur

tur, additoque tertio, aut etiam quarto Relatore, seu Censore, de ipsius Libri damnatione, vel absolutione, ac dimissione in prima nova, ac plena Congregatione tractetur. Non raro autem contigit, Sacræ Indicis Congregationis Decreto sanciri, ut ejusmodi Libri proscribantur quidem, sed ea tamen conditione, *donec corrigantur*, seu *expurgentur*. Tum vero si pro Libri expurgatione Sacræ Congregationi supplex porrectus fuerit libellus, ea ipsa emendatio Auctori, aut Oratori committi solet, ea quidem lege, ut ad Sacram Congregationem transmissa, ejusdem probari Decreto possit.

II. Ad hæc demonstranda exemplo sint, quæ ab anno MDCCLXII. ad annum MDCCLXXI. contigerunt, quæque ex Tomo III. Collectionis Judiciorum Caroli du Plessis pag. 483. & seq. atque ex Monito ms. initio prædicti Tomi III. in Bibliotheca Casanatensi excepi. Ergo anno MDCCLXII. delata fuit, ut ait du Plessis loco citato, *Censura Sacræ Facultatis Theologicæ Duacensis in quasdam propositiones de Gratia depromptas ex dictatis Philosophicis Dominorum Legrand, & Marechal &c.* In qua Censura Contensonius & Maussolieus docti æque ac pii Dominicani, non modo veluti spurii Thomistæ, sed etiam Janseniorum sectatores indicantur, ipseque etiam S. Thomas parum reverenter habebatur. At vero Monitum audiamus, quod manu, citato Tomo exaratum, scitu dignum operæ censui hoc loco describere. Est autem hujusmodi: *In hoc volumine a pag. 483. ad 489. extat Censura Duacensis Facultatis in quasdam propositiones de gratia depromptas ex dictatis Philosophicis Dominorum Lengrand, & Marechal primorum Collegii Duacensis Professorum; quæ Censura proscripta est, donec corrigatur, ex Decreto Sacræ Congregationis ad Indicem die xvi III. Julii MDCCLXXI. indeque inserta Indici Librorum prohibitorum.*

III. A quibus autem ea Censura maxime fuisset expurganda, idem Monitum docet ex Actis Sacræ Congregationis Indicis, ex quorum Libro xvi II. hæc ait se excerptisse: *Die xxxi. Augusti MDCCLXXIII. provolutus ad pedes San-*

Sanctissimi Secretarius petiit ab ipso, quid decernendum judicaret circa Censuram Duacensem, cujus iudicium sibi reservavit. Cui respondit, se una cum Commissario Sancti Officii decrevisse, ut prohiberetur, donec corrigatur, cum in parallelo facto inter doctrinam Dominorum Legrand, & Marechal, in quo multa leguntur doctrinae Thomistarum, quas uti damnatas in Jansenio supponit, cum tamen non sint damnatae; non enim omnia a Jansenio prolata, damnata fuere ab Ecclesia, & a Summis Pontificibus, sed tantum ea, quae leguntur in quinque famosis propositionibus proscriptis. Tum etiam corrigatur in scripturis illatis & expressis in ipsa Censura contra Maussolium & Contensium, & praecipue contra D. Thomam, qui in eodem Articulo ab ipsis Censoribus allato abunde se explicat, Christum mortuum fuisse pro omnibus, & singulis peccatoribus, licet tantum efficaciter mortuus sit pro electis, uti respondet ad 2. ibidem. Quapropter mandavit Secretario, ut una cum aliis Libris prohibitis, sive ab hac Congregatione prohibendis poneretur etiam Censura Duacensis, cum addito, donec corrigatur. Quod quidem Summi Pontificis iudicium antedicto Sacrae Congregationis Decreto die xviii. Julii editum fuit.

IV. Pergit praedicti Moniti Auctor, aitque, Sacram Duacensem Facultatem ad calcem memoratae Censurae profiteri, Censuram suam, & omnia, quae in ea continentur, Sanctae Sedis Apostolicae iudicio se se ex corde submittere, improbaretque & corrigere paratissimam esse quidquid improbandum, aut corrigendum supremo Christi Vicario visum fuerit. Notat haec quidem Auctor Moniti, statimque addit, ipsam Duacensem Facultatem secundum praecellaram hanc protestationem Romam misisse dominum Canonicum Tussanum Theodorum du Many, ut quid sua in Censura esset reprehensione dignum doceretur, atque adeo corrigendum, delendumve. Ut id autem facile praestiterit ipsa Sedes Apostolica, ex illius habemus Responso, quod laudatus Auctor Moniti citato loco descripsit ex iisdem Sacrae Congregationis Indicis Actis relatis citato Lib. xviii.

cujus ea sunt verba: *Feria tertia die 3. Aprilis MDCCXXXI. Fuit etiam lectus supplex libellus Canonici Tuffani Theodori du Many pro correctione habenda Censuræ Duacensis prohibitiæ, donec corrigatur, xvij. Julii MDCCXXXIX. cui responsum fuit, ut ipsi Doctores Universitatis Duacensis corrigant, auferendo omnino parallelum in ipsa expositione doctrinæ aliquorum Doctorum cum doctrina Jansenii & quia in eodem parallelo sunt plures doctrinæ Thomistarum, quæ tanquam prohibitiæ, & damnatæ in Jansenio exponuntur. Et pariter auferatur ab ipsa Censura id quod dicitur de doctrina D. Thomæ, & Maussoliei, & Contensonii; & postea ad Sacram Congregationem remittatur correctio ita peracta, ut ab ipsa examinetur, an bene. Hactenus tamen ad hanc usque diem inquit Auctor Moniti, nulla ejusdem Censuræ ad Apostolicam Sedem transmissa est de ea re emendatio.*

V. Miror autem, prædictum Judiciorum Collectorem, qui pag. 483. & seq. Censuram Duacensem retulit, Sacræ Congregationis Indicis Decretum, quo prohibita eadem Censura est, *donec corrigatur*, minime retulisse; tum vero præsertim quod pag. 590. ubi agit de rebus gestis anno MDCCXXXIII. scribit: *Benevolos Lectores monitos velim, quædam Decreta Romanarum Inquisitionum in hoc libro exscripta esse, non quod jurisdictionem huic Tribunali in Galliis attribuamus, sed ne eruditi Theologi ignorent quæ a Romanis Censoribus reprobata sit, tum ut ad verum dignoscendum citius perveniant.* Debuit ergo eam ob causam quam recenset, Decretum ipsum Sacræ Congregationis Indicis describere ad Lectorum eruditionem; nam alias quod ait de Romanarum Congregationum Decretis in Galliis minime recipi solitis, hoc parum refert, suam enim ubique ipsa Decreta habent auctoritatem, tum potissimum quod a Summis Pontificibus approbari solent. Quicquid sit, perperam quidem Viros illustres pietate & doctrina Contensonium, & Massolieum Duacensis Facultas carpsit, meritoque iccirco illius Censura vetita fuit, donec corrigeretur, auctoritate etiam Summi Pontificis.

Im-

Immunes autem Auctores ipsos fuisse ab omni labe Janse-
niani erroris, jam præter alios ostendit Vir doctissimus
Fulgentius Bellelli in suo Libro, cui Titulus: *Mens Augu-
stini*. Quanto autem Romæ in pretio haberetur Maussolie-
jus, testis est marmorea inscriptio, quæ extat in Templo
S. Mariæ ad Minervam posita prope lateralem insignis ejus
Templi portam.

VI. Sed his omiſſis, tametsi non semel contigerit, ut
correctio librorum vetitorum a Sacra Congregatione com-
mittatur Auctori ipsorum, ea nempe lege, ut facta ab Aucto-
re correctio approbetur postea ejusdem Congregationis
Decreto; consuevit tamen ipsa Congregatio, ubi libros
vetuit, ex benignitate, eorundem Auctori rationem Cor-
rectionis peragendæ præscribere. Hinc cum Sacra ipsi In-
dicis Congregationi a Theophilo Raynaudo supplicatum
fuiſſet pro facultate corrigendi tres libros a se editos, & ab
eadem Sacra Congregatione prohibitos, vel suspensos,
quorum Tituli sunt. I. *De Martyrio per pestem ad Marty-
rium improprium, & proprium vulgare comparato*. II. *Er-
ror popularis de Communione pro mortuis*. III. *Erotemata
de bonis ac malis libris*. simulque idem instituiſſet, ut sibi
ratio traderetur ad cujus præscriptum correctionem hujus-
modi recte instituere, ac exequi oporteret, nec ullam a
se moram, quominus omnia, quæ Eminentissimis, ac Re-
verendissimis Dominis Cardinalibus Congregationis viſa
fuerint, emendaret, futuram ostenderet; eadem Sacra
Congregatio, collaudata prius pietate Viri, ac docili in
comparendo ad salutaria Ecclesiæ monita ingenio, & vo-
luntate, referente Cardinale Brancaccio, auditisque vo-
tis Consultorum ad id specialiter deputatorum, faculta-
tem corrigendi dictos libros a memorato Theophilo Ray-
naudo petitam omnino ei concedendam judicavit, Decre-
to de ea re edito Feria III. die XVI. mensis Septembris an-
ni MDCLIX. quod ms. legi inter Opera ejusdem Auctoris in
Bibliotheca Casanatensi, ubi etiam habetur, Sacram Con-
gregationem correctionis ab eo peragendæ rationem hu-
jusmodi esse debere decreviſſe.

VIII. Ergo quod correctionem spectat ejus Libri, qui inscriptus est, *De Martyrio per pestem &c.* jussit Sacra Congregatio, ut primo Titulus mutetur in hunc: De Martyrio per pestem ad Martyrium improprium, & proprium Ecclesiasticum comparato. Disquisitio Theologica Theophili Raynaudi Societatis Jesu Theologi. *Cætera deleantur.* Secundo pag. 497. *addantur hæc verba:* Hæc sunt, quæ pro commendanda Charitate eorum, qui inter ministrandum peste contractis vitam amittunt, dicenda occurrunt. Cui Charitati, qua major adversus proximum nulla est, cum propter Deum impenditur, eximia fortitudinis, & Martyrii nomen convenit; non tamen in ea acceptione, qua Patres Doctores Ecclesiæ vocant illos, qui in pugna, & certamine cum Tyranno propter Deum vitam non resistentes ponunt, suntque magis explicite, & formaliter testes, & ideo per excellentiam, sive antonomastice Martyres appellantur, qui soli cultum Martyrum nomine in acceptione apud Ecclesiam hætenus usitata censentur. Illi privilegio hoc gaudent, ut gratiam ex opere operato consequantur, & ab omni poenæ reatu absolvantur. Quod privilegium ad istos non ea probabilitate extendi potest quoad illos, quos neque certum est, sed probabile tantum, hoc privilegio gaudere. *Tertio expungatur id quod Auctor scribit, eum futurum Martyrem, cui mors intentaretur, si ipsam sententiam de Conceptione B. Mariæ Virginis immaculata improbaret, isque mallet mortem prius acceptare eam ob causam, ut re ipsa eam exciperet.*

IX. Sequitur deinde Correctio Libri inscripti: *Error popularis de Communionem pro mortuis.* Mandatque Sacra Congregatio, ut primo in Titulo deleantur verba: *Error Popularis.* Secundo, num. 28. *deletis illis duobus §. usque ad numerum 29. supponantur hæc, aut similia verba:* Fateor quidem, Orationem tunc temporis fufam, esse utilem defunctis, ut mox dicebam, quia fructuosior est tunc quam regulariter sit quovis alio tempore, cum tunc homo sit in optimo statu ad precandum, tum ratione augmenti gra-

gratiæ susceptæ vi Sacramenti, vi cujus opera digna evadunt, tum quia ferventius tunc quis orare solet, Deum suum specialiter sibi præsentem alloquens, & quodammodo complectens; tum quia major tunc est spei locus, orationes nostras exaudiendas esse. Ceterum Communio ex opere operato, & formaliter vi Sacramenti semper inutilis est defunctis. Unde responsio hæc prima licet sufficiens ad retinendum usum inductum communicandi pro mortuis, tanquam iis suffragantem simpliciter, est tamen inidoneus, si fructus ex opere operato, & vi Sacramenti intendatur. *Tertio deleti titulo numeri 36. ponantur verba Auctoris usque ad versiculum*, deinde sistendo, *in eodem numero 35. & his verbis*, deinde sistendo, *deleantur quæ sequuntur usque ad numerum 42. Quarto in numero 42. prædicto deleantur a verbo*, quamvis autem, *usque ad numerum 43. Quinto in numero 56. deleatur a verbo*, secunda nihilo fortior est, *usque ad versiculum*: Non sane parum honorifice. *In numero 57. substitui possunt hæc, vel similia verba*: Secunda nihilo fortior est, Deus enim, & venerabilitas Sacramenti ex veris ejus fructibus, non ex fictitiis desumenda est &c. *Sexto, numero 58. in fine addantur hæc, aut similia verba*: Demum explicetur, in quo sensu defunctis fructuosa esse possit Sacra Communio.

VIII. De correctione tandem Erotematum, *De bonis ac malis libris*, ita statuit Sacra Congregatio: *Primopag. 5. dele a verbis*, admovisse Indici, *usque ad finem §. Hæc, vel similia verba addantur*: Clemens VIII. eidem Indici extremam manum admovit. *Secundopag. 8. dele illa verba*: Sed quia ita fert eorum fatum confixioni patentes. *Tertia pag. 135. in §. Eidem S. Cyrillo, deleantur illa verba*, imposita S. Cyrillo quo ad Divinitatem. *A numero 501. usque ad numerum 509. deleantur omnia, quæ pertinent ad damnationem Libri, Authore inaudito; & in fine numeri 508. ponantur hæc, vel similia verba*: Alia tamen est ratio aliorum Librorum, qui cum duplici titulo vetari soleant, scilicet per modum medicinæ ad avertendum: Fidelibus malum, quod ex eorum lectione haurire possent; & per:

& per modum pœnæ, ut Auctor, qui peccat in abusu doctrinæ, in eodem genere puniatur. Sæpe Auctores immerito queruntur, dum minime auditi condemnantur. Hoc enim iis certe deberetur, si ageretur causa contra illos ut reos. Verum ubi per Librorum prohibitionem bono Fide-
 lium consulitur, etiamsi aliqua inde nota in ipsos deriveretur indirecte, monitio illa necessaria non est.

IX Sequuntur deinde aliorum locorum correptiones; *pagina 249. dele*, tum ut occurreret, *usque ad illa verba*, nova sententia; *pag. 293. dele*, Michaelis Ralardei, *usque ad finem*; *pag. 294. dele*, placet non omittere, *usque ad finem* §. & adde hæc vel similia verba: Plura possem asserre exempla hujusmodi ineptarum censurarum, sed & libens omitto; *ibidem a numero 516. usque ad numerum 528. dele*; *pag. 304. dele*, ejusdem generis, *usque ad finem* §. *pag. 325. dele ab illis verbis*, necnon Bellarmini, *usque ad finem* §. *pag. 329. deleatur a verbis*, sane in nullius, *usque ad finem* §. In Indice deleantur illa verba: Benedicti Secundi retractatio iniquæ sententiæ; *item illa*: Doctores omnes etiam simul sumpti fallibiles; *item illa*: Henriquez male notatus; *illa*: Julianus Toletanus exsolutus iniqua damnatione; *illa tandem*: Sa non bene notatus, & illa doctrina vere probabilis manet talis etiam damnata.

X. Hæ sunt correptiones Raynaudo a Sacra Congregatione præscriptæ, quæ etiam, ut legitur in citato ms. folio, quod extat inter ejusdem Auctoris Opera in Casanatensi Bibliotheca, *Libros prædictos ita correctos, atque emendatos decernit ab omnibus retineri, ac legi, atque iterum, servatis alias servandis, imprimi posse*. Et hic nota summam Sacræ Congregationis Indicis caritatem in concedenda Auctoribus suorum Librorum correptione, & expurgatione, ut illos iterum correctos, expurgatosque valeant typis committere. Cæterum, ut alios omittam, merito fuisse eum Raynaudi Viri cæteroqui eruditissimi Librum, qui inscriptus est, *Error popularis de Communione pro mortuis*, ubi scilicet perperam conatur ostendere, inutilem esse defunctis Eucharisticam vivorum Commu-
 nio-

nionem, maleque concludit, *simpliciter negandum prodesse mortuis*, a Sacra Indicis Congregatione proscriptum, vel ipsa prædicti Libri inscriptio nos docet, in quo etiam Auctor non erubuit scribere, *conjugales amplexus utiliores esse animabus Purgatorii Communionem quamlibet pia, & devota*. Confutavit inter alios hunc Librum Vincentius Baronius in suo Apologetico Lib. I I I. pag. 482. & seq. ubi etiam monet, occasionem scribendi eum Librum fuisse æmulationem in Patres S. Andreæ de Valle, Theatinos scilicet Clericos Regulares in ea Domo habitantes, quod non posset ferre frequentiam populi in ipsa Ecclesia. Tunc enim temporis, centum nempe ab hinc annis, ut idem Baronius notavit, ad S. Andreæ Ecclesiam singulis hebdomadæ secundis feriis confluebat *quicquid ex prima nobilitate virorum ac mulierum Romæ habet pietas Christiana*. Ibi dies feriales videntur versi in solemnissimos totius anni; eo conveniunt Cardinales, Principes &c.

XI. At his omisiss, ut magis magisque videas, quanta sit Sacræ Indicis Congregationis conniventia erga Auctores, eorumque Libros, non semel contigit, ut correctionem etiam Librorum illorum permetteret, qui magna ex parte erroribus scaterent. Quod ut aliquo exemplo ostendam, Decretum describam ab ipsa Congregatione editum anno MDCLXIII. die xxv. Januarii de correctione Libri, qui inscriptus est, *Josephina Lucernensis, in qua Lucernæ Helvetiorum S. Joseph Vir Maria &c. centum elogiis illustratur, atque propugnatur, præside Jacobo Reiff*, Constantiæ anno MDCLVII. Deceverunt siquidem Cardinales, Librum ipsum, auditis prius de more Relatoribus, corrigendum esse juxta hanc formam: *Deleantur Elogium primum, secundum, tertium, quintum, sextum, decimum, septimum, vigesimum quintum, vigesimum sextum, vigesimum octavum, trigessimum, trigessimum primum, trigessimum nonum, quadragessimum secundum, quadragessimum octavum, quadragessimum nonum, quinquagesimum septimum, quinquagesimum octavum, sexagesimum primum, sexagesimum quartum, sexagesimum octavum,*
se-

septuagesimum quintum, totaque quaestio singularis posita in fine Operis; sicque Librum prædictum correctum atque emendatum, ut in Actis legitur Reverendissimi Secretarii Fr. Hyacinthi Libelli pag. 214. iidem Eminentiſſimi, ac Reverendiſſimi Domini, servatis alias servandis, iterum imprimi, ac vulgari permiserunt: impressos vero, ac vulgatos, deleſis, ut supra, delendis, licite, ac libere retineri, & legi posse declaraverunt.

C A P. XI.

Criminatio, & querimonia adversus Sacram Congregationem Indicis, ejusque Secretarium refellitur, quod Librorum prohibitio fieri soleat Auctore inaudito, eique notam infamia inuret.

PERPERAM carpi a nonnullis illum Sacræ Congregationis Indicis stylum, prohibendi Libros, *Auctore inaudito*, constat plane ex illa ejusdem Sacræ Congregationis doctrina, in Capite præcedenti relata; ubi nempe egimus de correctionibus ab illa Theophilo Raynaudo præscriptis, apponendis in Opusculo, *De bonis ac malis libris*. Postquam enim Sacra Congregatio prædicto Auctori mandavit, ut a numero 501. usque ad 509. deleterentur omnia, quæ pertinent ad damnationem Libri, *Authore inaudito*, jussit quoque, ut in fine numeri 508. hæc, vel similia verba ponerentur: *Alia tamen est ratio Librorum, qui cum duplici titulo vetari soleant, scilicet per modum medicinae ad avertendum Fidelibus malum, quod ex eorum lectione haurire possent, & per modum pænæ, ut Auctor, qui peccat in abusu doctrinae, in eodem genere puniatur. Sæpe Authores immerito conqueruntur, dum minime auditi condemnantur; hoc enim iis certe deberetur, si ageretur contra illos ut reos. Verum ubi per Librorum prohibitionem bono Fidelium consulitur, etiamsi aliqua inde nota in ipsos derivetur indirecte, monitio illa necessaria non est.*

II. Hinc immerito, perperamque in supplici ad Urbem

banum VIII. libello pro causa Elucidarii sui, quod Romæ prohibitum fuerat, conquerebatur Poza pag. 83. a tergo, *inconsulta Hispania, & illius suprema Inquisitione, & doctissimis Viris, inaudito Authore, contra formam Juris Divini, & humani*, suum Librum fuisse prohibitum. Iterum repetit, contra jus Divinum, ac naturale, se inaudito, suos Libros fuisse Romæ a Sacra Congregatione confixos, *Authore inaudito*, iraque percitus *illos ipsos Censores Theologos, qui Opus*, prædicti nempe Elucidarii, *condemnarunt, cogi postulat, ut in scriptis exhibeant damnationis fundamenta; id si palam facere detrectent, manifestum esse ait, parum ipsos de prima illa Censura considerare, sed tutius arbitrari agnitam delere, & meliorem surrogare*. Addit & alia, quæ tædet describere, ac præsertim illud, non debuisse Hispani Auctoris Libros Romæ vetari, quos suprema Hispaniæ Inquisitio, & Censores probassent, exageratque *infinita, & quidem amplissima in S. R. E. collata ab Hispanis beneficia, quæ trabali clavo, omni memoria figenda sunt &c.* Veneror equidem Hispanam Inquisitionem, egregiamque Hispanæ Gentis in Sanctam Romanam Ecclesiam pietatem, sed longe magis recolenda est Romanarum Congregationum Auctoritas, & Romanæ Ecclesiæ erga Hispanam Gentem pietas, quæ dicere eidem merito potest illud Apostoli: *Quid habes, quod non accepisti; & si accepisti, quid gloriaris quasi non acceperis?*

III. Sed non est nostri instituti hanc rem fusius explicare. Certum est, errasse & in eo Pozam, ubi lato calamo conatur probare, infamiæ notam semper inuri Auctori ob ejus Libros Romæ confixos. Plures enim Libri non modo Laicorum, Regulariumque, sed & Episcoporum, aliorumque sanctitate, & doctrina illustrium, & a priscis Conciliis, & a Sacra Indiscis Congregatione improbatum sunt, nulla iniusta illorum Auctoribus infamiæ nota, tum potissimum, quia non solum non dolo malo Libri ab eisdem exarati, verum etiam subjecti supremæ Apostolicæ Sedis iudicio fuisse putantur. Hinc tamen in Concilio Generali IV.

Lateranenſi Libellus B. Joachimi Abbatis adverſus Petrum Lombardum , ejuſque opinionones de Trinitate damnatus ſit, haud tamen Auſtor illius damnatus , quia nimirum iſ ſe, & ſua ſcripta iudicio Romanæ Eccleſiæ ſubjecit . Vide quæ de hac re ſcripſimus nos Tomo III. Conciliorum in Commentario ad Canonem II. ubi etiam Num. 4. pag. 244. Honorii Papæ III. Epiſtolam recensuimus anno Chriſti MCCXXI. datam adverſus eos , qui de Joachimo Abbate , atque ejus Monafterio Florenſi , ob damnationem illius Libri, obloquebantur . Ex quo addiſcimus , perperam queri Pozam , ob ſuum vetitum Romæ Librum notam non ſibi modo , ſed & Societati Jeſu, cujus erat alumnus , imo & Hiſpaniæ toti fuiſſe inuſtam , quaſi inclytæ Societati Jeſu, & illuſtri Nationi Hiſpanæ, quæ ſemper ſapientiſſimis Auſtoribus , & de Catholica Eccleſia optime meritis abundavit , Libri Pozæ damnatio ſummum, & irreparabile dedecus , & ignominiam attulerint .

IV. Porro ut vel Raynaudus ſcitiffime docet in Opere, *De malis, ac bonis Libris, deque juſta, aut injuſta eorumdem confixione*, edito Tomo XI. editionis Lugdunenſis anno MDCLXV. in Claufula ejusdem Operis, pag. 377. Num. 571. humilitas tenenda eſt ab Auſtoribus poſt ſuorum Librorum confixionem : *Abſit*, inquit, *ut contra ſtimulum calcitrare, & impatientius, excepta confixione, obfirmari in errore, & calces Cenſoribus illidere inducant in animum.* Notanda verba, quæ ſubdit: *Quo in genere Michael Bajus æternum quibuſvis Scriptoris exemplum ſapientiæ, & virtutis ſtatuit, cum confixis a Franciſco Toletio per Pontificem ad id deleſto nonnullis ejus Libris, oblataque Cenſura, an acquieſceret, rogatus: malle ſe, dixit, porcos paſcere, quam cujuſcumque per Eccleſiam deleſti iudicio de ſcriptionibus ſuis, pervieaciter obluſtari. Muniendus humilitate eſt animus, ſubjicit etiam mox Raynaudus, & exprimenda imitatione S. Auguſtini demiſſo, qui paratum ſe profitebatur etiam ab indoſtoribus corrigi. Quanto igitur magis paratum eſſe quemque oporteat, ut ab iis corrigatur, quibus juſ ſit, & qui merito porrigere ſup-*
po-

ponuntur. Tales profecto sunt Romanæ Sacræ Cardinalium Congregationes, quorum decreta temere, & non sine animarum perniciæ, hæreticorum plausu, & Christiani populi scandalo contemnere aliqui non verentur, libellis etiam famosis ipsas non modo Congregationes Cardinalium, sed quod horrendum est dictu, Caput ipsum Ecclesiæ, Sanctissimum Christi in Terris Vicarium, Romanum Pontificem Maximum sugillantibus, grandi non sine impietate palam editis, ac toto Orbe dispersis. Hujusmodi profecto est Epistola pseudodoctoris Sorbonici ad Amicum Belgam, quam tamen egregie confutavit Romanus Philaethes in sua ad Theologum Lovaniensem Epistola, quæ est, *De justa Bibliotheca Janseniana proscriptione*; quæ quidem Epistola ob omnigenam, qua referta est, eruditionem, & ob Romanarum Congregationum, ac præsertim Summi Pontificis defensionem adversus calumnias pseudodoctoris Sorbonici, non modo semel & iterum in Italia, sed & in Germania, & in Galliis, ac aliis locis, merito fuit typis mandata.

C A P. XII.

De Oeconomia Apostolica Sedis in vetandis aliquando Libris etiam doctrinam continentibus ob lectionis eorum abusum.

I. **M**Orem fuisse Ecclesiæ, ut multa sancte pieque a Majoribus nostris instituta, quod lapsu temporis non pauci in suarum, & aliarum animarum perniciem eisdem abuterentur, prudenti œconomia abrogaret, innumeris pene exemplis comprobari posset. Hujusmodi sunt vigilæ, & pernoctationes in Templis, & Cœmeteriis, quas Sanctus Hieronymus in Commentariis ad S. Matthæi Evangelium, Cap. xxv. ex traditione Apostolica inductas esse affirmat. Ad eas olim Viri, ac mulieres præsertim in Vigilia Paschæ, ut est apud S. Clementem, sive alium ejus nomine Auctorem priscum, Lib. v. *Constitutionum*, Cap. xxx. & Lactantium, Lib. xii. *Institutionum*, Cap. xix. *de nocte*

conveniebant, vacantes piis colloquiis, & Sacris Lectionibus, ac Concionum auditioni, ut habet S. Augustinus Lib. vii. *Confessionum*, Cap. viii. & Hymnis a S. Ambrosio additis, eodem teste Augustino. Sed ipse tandem vigilæ, quæ vel S. Hieronimi ævo, ut ipse testatur adversus Vigilantium scribens, *culpa juvenum*, & *vilissimarum mulierum* infamabantur, ea nominatim ex causa, per consuetudinem fere universalem, decem nocte Natalis Domini, abrogatæ penitus sunt, ne per occasionem hujusmodi pernoctationum sive ex laicis, sive ex Sacro Ordine haud impeccabili, impurus quispiam designaret aliquid pugnans cum loci sanctitate, ut contigisse plerisque ethnicorum Sacerdotibus, ex S. Cyrillo Lib. vii. in Julianum sub finem res suo tempore gestas in Templo Saturni describente, utique per spurcum Sacerdotem Tyrannum nomine, & ex Rufino S. Cyrilli suppare Lib. iv. *Historiæ Ecclesiasticæ*, Cap. xxv. notissimum est.

II. Usam quoque fuisse Ecclesiam prudenti œconomia in rebus, quæ doctrinam Catholicam spectant, jam notavimus nos Tomo II. Conciliorum in Commentario ad Canonem lxxxv. Trullanum, ubi explicuimus Sacri Trifagii originem, ejusque additamentum, quo in nonnullis locis post illud: *Sanctus Immortalis*, dici solitum erat: *Qui crucifixus es pro nobis, miserere nostri*. Lectorem enim ad prædicti Commentarii calcem monuimus, quod circa eam appendicem accidit, idem contigisse circa eam propositionem: *Unus de Trinitate crucifixus est*. Eam enim duo Summi Pontifices Felix III. & Hormisda veluti Eutychis errori faventem rejecerunt; duo vero alii Summi quoque Pontifices, Ioannes XI. & Agapetus cum tota Ecclesia tanquam Catholicam probarunt, ubi scilicet accessio illa ad solum Filium dirigeretur pro nobis incarnatum, & in carne crucifixum. Ex quo vides, ea etiam, quæ Dogma Catholicum spectant, ubi periculum malæ interpretationis subesset, consuevisse ab Ecclesia interdicti. Videtis de hac re peculiarem Tractatum Scriptoris undequaque doctissimi S. R. E. Cardinalis Noris.

III. His

III. His præmissis, jam non mirum videri debet, si Librifanam doctrinam continentes eam ob causam aliquando vetentur, quod multi eorum lectione abutantur. Certe Regula IV. Indicis denegans absolutionis beneficium iis, qui Sacra Biblia vulgari idiomate conscripta legunt, ac retinent, non accepta a Superioribus facultate, definit haud dubie lectionem istam, retentionemque illegitimam, peccatum esse læthale. Sapienter autem, & prudentissime id esse ab Ecclesia constitutum jam pridem adversus Novatores, & novissime adversus Quesnellum, & Jansenianæ Factionis homines perditos a Clemente Papa XI. in sua celeberrima Constitutione, *Unigenitus*, quotquot in eam Constitutionem scripsere luculenter demonstrarunt ad Propositionem lxxx. atque alias sequentes ejusdem Quesnelli. Quamvis enim in quamcumque linguam vertantur Sacræ Litteræ suapte natura sanctæ sint; perspecta tamen hominum malitia, periculosa, ac perniciofa sunt hujusmodi traductiones, utpræ ceteris ostendit præstantissima Societas Jesu Theologus, & Sacri Collegii, atque Ecclesiæ Catholicæ decus eximium Cardinalis Bellarminus. Quare in re ad salutem non necessaria consulendum potius est multorum profectui traductiones ipsas interdicens, quam paucorum utilitati eas cum gravi multitudinis incommodo, atque periculo permittendo. Parvulis enim, rudibus; feminis, infirmis in Fide, libertinis, & impiis tutum non est Scripturas divinas evolvere, ac referare. Unde sapientissimo consilio earum lectionem iisdem interdictam voluerit, & complura Episcoporum Concilia, & Summorum Pontificum Decreta; cum experientia constiterit, multa inde orta esse scandala, & abusiones.

IV. Similem fere ob causam inter vetitæ lectionis Libros relatum fuit celebre illud Novemvirale *Consilium delectorum Cardinalium, & aliorum Prælatorum de emendanda Ecclesia S. D. N. D. Paulo III. ipso jubente, inscriptum, & exhibitum*, Romæ editum typis Antonii Bladi anno MDXXXV. cuius inter alios mentionem facit Spondanus ad annum MDXXXV. Num. VIII. ubi delecti illi Car-

Cardinales , & Prælati recensentur , qui fuere Gaspar Cardinalis Contarenus , Joannes Petrus Cardinalis Theatinus , Iacobus Cardinalis Sadoletus , Reginaldus Cardinalis Polus , Fridericus Fregosius Archiepiscopus Salernitanus , Hieronymus Aleander Archiepiscopus Brundusinus , Joannes Matthæus Gibertus Episcopus Veronensis , Gregorius Cortesius Abbas S. Georgii Venetiarum , & Fr. Thomas Badia Magister Sacri Palatii . Hoc Consilium , quod nihil continet Fidei , vel bonis moribus absonum , vetitum quidem legitur in Indice Pauli IV. Papæ auctoritate confecto , tametsi is Pontifex unus ex illis Cardinalibus delectis fuisset , nempe dictus ante Pontificatum Joannes Petrus Cardinalis Theatinus , quod nempe Theatinam Ecclesiam in nostro Regno Neapolitano administrasset . Unde etiam Theatini hodieque dicuntur Clerici Regulares , quos idem Pontifex , cum esset Episcopus Theatinus , una cum S. Cajetano Thieneo Presbytero Vincentino , & duobus aliis eximiiis Viris instituit , uti addiscimus ex Litteris Clementis Papæ VII. ad eisdem datis die XXIV. Junii anno Domini MDXXIV.

V. Porro viso eo Consilio , in quo præcipua reformationis capita ad recte universæ Ecclesiæ disciplinam , & œconomiam , ipsiusquemet Summi Romani Pontificis , & Episcoporum officium pertinentia continebantur , explicari satis nequit , quam lætati sint hæretici , ac pene triumphos egerint ; sed frustra tamen , neque enim reformationem in pluribus necessariam esse , negarunt unquam Catholici , quæ etiam desiderabatur summopere ab ipso Pontifice Maximo laudato Paulo III. de cogendo Tridentino Concilio deliberante ; sed salva tamen Fide Catholica , salva Ecclesiæ Unitate , salva Summi Pontificis , & Romanæ Sedis Apostolicæ , cui omnes obedire tenentur , auctoritate , ac reverentia ; quæ tamen omnia convellebant nati sæculo XVI. Novatores , qui accepto prædicto Consilio , veluti victores illud mox ediderunt Argentorati anno MDXXXVIII. a littera A ad G , addita scilicet a Joanne Sturmio ad Cardinalem Contarenum Epistola insultationibus , & sarcasmis re-

redundante . Etiam Lutherus, ut testatur Surius in suo brevi rerum in Orbe gestarum Commentario ad annum Christi MDXXXVIII. pag. 320. Consilium ipsum, seu Reformationem *vertit Germanice, & a margine sua adscripsit Scholia, non alio magis, quam talē Viro digna; ipsos autem Reformationis Auctores, quorum etiam, Sturmio futente, erat multa eruditio, & vitæ integritas, non est veritus adpellare perditos, ac deploratos nebulones*. Sed non mirum videri debet, erat enim Lutheri os maledictione plenum, & amaritudine, & dolo; ejusque audaciam imitatus Sturmio, jam minime a conviciis, & conuelliis abstinuit; id quod in eo reprehendit doctissimus Cardinalis Sadoletus.

VI. His accedunt & impudentissima Sleidani mendacia, qui recitatum delectorum Patrum Consilium, seu Reformationis consultationem, quam etiam ait aliquot Cardinales clam obtulisse Pontifici, Paulo nempe III. addit mox, Nicolaum Archiepiscopum Capuanum omnis Reformationis impatientem, a Pontifice submissum, *ut certo creditur*, inquit, magna contentione reclamasse, nequid omnino reformaretur, itaque passos esse Patres, atque Pontificem, sibi persuaderi, nequid mutaretur. Rursus addit, eundem ipsum Nicolaum emissio clauculum in Germaniam Libello, voluisse Pontificem, atque Reformatores, illos præbere deridendos. Ita enim ait, plerosque id accipere; alios putare dicit, non nescio Pontifice exiisse Libellum, ut sic aliquid potius studium appareret emendationis. Narrat hæc quidem de Sleidano Surius loco citato, & post eum Spondanus ad annum MDXXXVII. Num. VIII. qui etiam impudentissimi hominis in Pontificem calumniam egregie confutant. Ait porro Sleidanus, *certo credi*; ait, *plerosque ita accipere*; ait, *alios putare*. Qui tandem illi sunt, nisi Sleidanus, & ejus similes, Romani Summi Pontificis, & Ecclesiæ Catholicæ obrectatores? Sed ut magis magisque pateat Sleidani calumnia, scite obseruat Spondanus, perperam ab eo dici, Reformationem ipsam verbis quidem fuisse conceptam, non tamen representatam, nec

nec in publicum educatam fuisse; cum nihilominus in Germaniam eam asportatam esse (missam clauculum ut idem ait, ut studium appareret emendationis) necesse fuerit, quandoquidem & ipse ejus Capita enumerat, & Lutherus vernaculo, ac Sturmius Latino sermone parvis suis Commentis, uti jam superius dictum est, ei detraxisse reperiuntur; quorum etiam calumniandi, & convitiandi temeritatem Cochleus in Actis Lutheri anni MDXXXIX. & Sadoletus Cardinalis retulerunt.

VII. Summa itaque fuit Sleidani impudentia, & calumnia in Summum Pontificem, ubi scribit, ipso instigante, Archiepiscopum Capuanum reclamasse, *nequid omnino reformaretur*, conceptamque verbis Reformationem per simulationem; ut sic aliquid Pontificis studium de reformanda Ecclesia appareret, minime fuisse promulgatam. Verum quod a Papa ejus Reformationis Capita non fuerint tunc promulgata, primum est conjicere, quod alias notavit Spondanus, nempe, *id contigisse, quoniam decreverat Pontifex ea in publico Concilio, quod indixerat, proponere, quo pleniori, & acceptiori auctoritate cunctis facilius insinuaretur. Et quamvis id demum factum non sit, quæ tamen ad rem pertinere existimata sunt, fuere singulis Synodi Tridentinæ Sessionibus sub Titulis, De reformatione, proposita, & subsequuta est assatum omnium Ordinum, & Curie Romanæ reformatio post celebrationem Concilii sub Pio V. & Successoribus Pontificibus.* Certe præposuit eadem ipsa Capita Petrus Crabbe Ordinis Fratrum Minorum alumnus in sua Conciliorum editione Synodo Tridentinæ velut ejus exordium, negarique non potest, non pauca ex illis Capitibus in Concilii Tridentini Decretis, quæ ad reformationem spectant, inveniri.

VIII. Præter Lutherum, Sturmium, Sleidanum, aliosque hæreticos ejus ævi, jam & sequioris quoque heterodoxi ea Reformatione abusi sunt, inter quos Wilielmus Craschavv Anglus veluti magnum quid adversus Summum Pontificem prolaturus, eandem Reformationem rursus prælo excudit anno MDCIX. Londini in 4. typis Felicis Kyngston,

ston, & Richardi Boyle, præfixo Titulo: *Consilium delectorum &c. ante annos LXX. in Concilio Tridentino primum editum, deinde Romani Antichristi tyrannico jussu suppressum, nunc autem ab interitu vindicatum, & de novo recusum.* Ex dictis constat aperte, hunc Anglum mentiri, non enim primum in Concilio Tridentino Consilium ipsum delectorum Petrum editum fuit. Sed nec erat, cur recoqueret putidissimam Petri Pauli Vergerii apostata infamis calumniam, quam Paulo IV. impexit in Annotationibus in Indicem Librorum prohibitorum ejus Pontificis jussu evulgatum, Tomo 1. Operum adversus Papatum ab illo editorum, ubi impudentissime hæc scribit: *Cum ergo Paulus IV. sibi, ac suæ Romanæ Synagogæ insista esse, ac infligi quotidie ex isto Libello vulnera non levia, propter liberiores scilicet illas, quas recitavi voces, & confessiones, hunc quoque Libellum, si Deo placet, projecit nunc inter eos, quos velit a nemine legi, hoc est inter hæreticos. Sed quod caput est, & pluris quam omnia, ipsemet Paulus IV. fuit unus eorum, qui concinnarunt, & distarunt Libellum. Quis non stomachetur? Quis non horrescat?*

IX. Stomachari oportet qui hæc legat, atque exploratas habeat justissimas causas, ob quas Consilium illud de emendanda Ecclesia a Paulo IV. e Fidelium manibus ereptum sit, atque in Indicem Librorum damnata lectionis relatum. Nam præterquamquod id eo consilio prudentissime factum est, ne quod vulgo ferebatur, ejusdem Consultationis Articuli Pontificia auctoritate muniti crederentur, confirmatique, antequam Concilio Generali proxime convocando subjiceretur, quod scitissime animadvertit Religiosissimus æque ac doctissimus Cardinalis Quirinus in Epistola refutatoria Joannis Georgii Schelhornii, qui in Epistola sua ad ipsum Quirinum scripta eandem calumniam Vergerii, & Crashavii iterum recoxit; certum ex dictis superius, exploratumque omnibus est, pessime usos fuisse hæreticos ea Novemvirali Consultatione, & quidem non modo ut Summo Pontifici, Curiaque Romanæ insultarent, sed ut Catholicos, Fidelesque simpliciores ad suas partes

traherent . Ceterum , ut taceam varias antiquiores ipsius Consultationis factas vel ab ipsis Catholicis editiones , ubi scilicet scrupulus abutendi ipsa sublatus fuit , eandem edidit in Historiam Seculi xv i . Natalis Alexander ubi de Paulo III. agit , ut nequaquam dici possit , quod hæretici hariolati sunt , eam fuisse præ pudore suppressam .

X. Placuit hæc fusius describere ob excitatam nostro hoc ævo de ipsa Consultatione inter laudatum Eminentissimum dignitate & doctrina S. R. E. Cardinalem Quirinum Sacræ Indicis Congregationis Præfectum , & Georgium Schelhornium , qui summa non nisi temeritate Pauli IV. Papæ , & laudatæ Congregationis œconomiam in prohibendis Libris , morem decessorum suorum protestantium sequutus perperam conatur impetere . Sed & ex nostra narratione illud jam addisci potest , licet Libri nullum errorem contineant , prudenti eosdem consilio a Sacra Congregatione interdici , sive ad vitandos tumultus , sive alias ob causas sapientissimis Cardinalibus notas . Hinc non mirum si anno elapso MDCCCL. prohibita a laudata Sacra Congregatione Indicis fuerit Epistola critico-apologetica posthuma vulgari idiomate scripta sub nomine Ægidii Mariæ Giuli Societatis Jesu Theologi de studiis ejusdem suæ Religionis Lucæ edita anno MDCCCL. typis Josephi Salani , & Vincentii Juntini , licet nulla fortasse ex ipsa Epistola appareat causa , cur prohibitionem meruerit .

C A P. XIII.

De veneratione Decretis Sacræ Congregationis Indicis debita , eorumque obligatione ubique , & apud omnes

I. **S**Ummam esse Cardinalium dignitatem , atque auctoritatem in Ecclesiam Catholicam , perspicue ostendimus Tomo I. Commentariorum in Cæremoniale S. R. E. Lib. I. Tit. VIII. ubi varia loca Summorum Pontificum , ac Patrum attulimus ad eam rem magis magisque comprobendam . Eandem dignitatem etiam supra Episcopos omnes agno-

agnovit non uno in loco S. Bernardus, præsertim vero in Libris, *De Consideratione ad Eugenium Papam*, Tertium scilicet ejus nominis, ubi eos vocat collaterales, coadjutores Papæ, ac Orbis Judices. Olim quidem licet Pontifices in gravioribus negotiis convocarent Concilia Episcoporum, quibus tamen Cardinales Presbyteri intererant, verum cum auctis Ecclesiæ opibus, cœpissent Pontifices indigere Consiliariis, & Adjutoribus, nec possent tam sæpe evocari Episcopi, Conciliis prætermisissis, res tota reducta est ad Senatum Cardinalium, idque multo commodius, quod magis in promptu sint. Audiendus Sanctus Bernardus, qui in Epistola CLXXXVIII. ad Episcopos, & Cardinales Romanæ Curia: ita scribit: *Nulli dubium, quin ad vos specialiter spectet tollere scandala de Regno Dei, surgentes succidere spinas, sedare querelas. Sic enim præcepit Moyses, cum montem subiit, Habetis, inquit, Aaron, & Ur vobiscum; siquid natum fuerit quæstionis, referetis ad ipsos: Illum loquor Moysen, qui venit per aquam, & non in aqua solum, sed in aqua, & sanguine. Et ideo plusquam Moyses, quia & in sanguine venit. Et quoniam pro Ur, & Aaron stat zelus, & auctoritas Romanæ Ecclesiæ super populum Dei, ad ipsam merito referimus, non quæstiones, sed læsiones Fidei, & injurias Christi. Patrum probra, atque contemptus, præsentium scandala, pericula posterorum. Legite, si placet, Librum Petri Abailard, quem dicit Theologia, & videte qualia ibi de Sancta Trinitate dicantur, & alia innumera Catholicis auribus, & mentibus insueta, &c.* Tum vero mox ad eosdem Cardinales hæc habet, quæ & rem nostram spectant: *Agite pro loco, quem tenetis; pro dignitate, quam polleitis; pro potestate, quam accepistis.*

XI. Si itaque ex testimonio S. Bernardi tanta est Cardinalium in discutiendis, ac proscribendis Libris potestas, quia scilicet, ut idem S. Doctor docet Lib. IV. *De Consideratione*, Cap. V. eliguntur ipsi a Papa, de toto Orbe judicaturi, multo major dici debet eorum Cardinalium auctoritas, qui ab ipso Papa, Sanctaque Sede Apostolica ad Indi-

cem Librorum, eorundem permissionem, prohibitionem, expurgationem, & impressionem in universa Republica Christiana specialiter deputati sunt. Tales profecto sunt Cardinales præpositi Sacræ Indicis Congregationi, eaque formula se inscribunt, ubi aliqua promulgant Decreta, falsumque est, quod scribit Poza in secunda Apologia pro suo Elucidario, noluisse Apostolicam Sedem *hanc Generalem Inquisitionem*, loquitur de Inquisitione Hispanica, *pro subiectis sibi Provinciis, aliis indigere Præpositis, & Præfectis*. Temerarium autem est quod mox subjicit, nempe, *non temere factum esse a Suprema Inquisitione Hispaniarum cum decrevit, prohibitionem Sacræ Congregationis de Indice non obligare in subiectis sibi Ditionibus, & Provinciis*. An unquam Hispanica Inquisitio Apostolicæ Sedi obsequentissima id genus Decreta ediderit, me latet, nec curo eam rem investigare; illud mihi certe compertum est, teneri omnes ubique, ne excepta quidem Hispania, ad servanda laudatæ Sacræ Indicis Congregationis Decreta. Porro, ut in Actis legitur, Secretario F. Thoma Camotto, pag. 83. propositis die IV. Decembris anni MDCLXXIV. in ipsa Congregatione ex parte Episcopi Malacensis Dubiis, quorum primum erat, An Decreta Sacræ Congregationis obligent etiam in Regnis Hispaniarum? Alterum vero, An Episcopi procedere possint contra transgressores horum Decretorum? *Sacra Congregatio respondit ad 1. id non posse verti in dubium, cum Decreta hujus Congregationis obligent universos Christianos. Ad 2. quod Episcopi possunt procedere contra transgressores, utendo propria auctoritate.*

XII. Exempla id genus & alia afferri possent complura, sed supervacanei esset laboris, ea velle describere in re perspicua, tum præsertim quod Decreta ipsa a Sacra Indicis Congregatione edita, ad Summum Pontificem per Secretarium delata, ab eodem approbantur, & publicari jubentur. Hinc, licet non defuerint Auctores congesti a Francisco Valente Tomo II. *Concordiæ*, Sect. IV. agentes, Romanarum Congregationum Decreta non habere vim legis, nemo autem negavit, quin illa obligent, ubi edita sunt

sunt consulto, & approbante Pontifice, ut cavetur in Bulla LXXVII. Sixti Papæ V. & ubi constet vere ea fuisse edita, & sigillo, atque subscriptione Eminentissimi Cardinalis Præfecti, & Secretarii Congregationis munita. Ita sane præscripsisse Urbanum VIII. quoad declarationes Cardinalium Concilii Tridentini Interpretum, notavit Barbosa in Summa Apostolicarum Constitutionum, in eo Titulo qui inscriptus est: *Congregatio pro interpretatione Concilii Tridentini*, Num. 8. Vide eruditum Gonzalez in Apparatu Commentariorum ad Decretales, Num. 57.

C A P. XIV.

De Secretarii Indicis cura in Libros, Typographosque, qui a Libris, quos iterum imprimunt, multa fraudulenter adimunt.

I. **A**Ntiquum æque ac recens quorundam Typographorum Venetorum hoc vitium est, in quod Sacra ipsa Indicis Congregatio anno MDCVI. Secretarium ejusdem agente diligentissimo Fratre Paulo Pico, janracriter meritoque invec̃ta suit, ubi scilicet hoc Decretum edidit, quod legitur in calce Indicis Librorum prohibitorum jussu Alexandri VII. Pontificis Maximi anno MDCLXIV. Romæ editi, pag. 298. & sequenti: *Cum Joannes Baptista Ciottus Senen. Joannes Antonius, & Jacobus de Francis, Bibliopolar, & Librorum Impressores Venetiis, ex Tomo quinto Disput. De Censuris, P. Francisci Suarez Jesuitæ, hoc anno ab eis impresso, multa fraudulenter adimere, illumque sic mutilare impressum edulgare præsumpserint, falsi crimen incurrendo: Illustissimi, & Reverendissimi Domini Cardinales super Librorum prohibitione, permissione, expurgatione, & impressione, in universa Republica Christiana specialiter deputati, ad prædictorum Impressorum, & Bibliopolarum temeritatem, & audaciam coercendam eisdem prohibuerunt, & præsentis Edicto prohibent, ne in futurum cujuscumque generis libros imprimere possint*
nec.

nec prædictum Tomum quovis modo vendere, seu quemvis contractum de eo inire valeant, sub pœna excommunicationis lata sententiæ, a qua non nisi a Sancta Sede Apostolica, præterquam in mortis articulo absolvi possint. Inhibentes omnibus, & singulis Bibliopolis, mercatoribus, & aliis quibuscumque personis, ubicumque existentibus, ne prædictum Tomum, aut alios libros a prædictis in posterum edendos vendere, aut retinere præsumant, sed locorum Ordinariis, seu hereticæ pravitatis Inquisitoribus consignare teneantur sub excommunicationis lata sententiæ, ac quingentorum ducatorum de Camera incurrendis, & arbitrio eorumdem Illustrissimorum, & Reverendissimorum Dominorum Cardinalium Congregationis Indicis applicandis pœnis. Præcipientes omnibus, & singulis personis cujuscumque status, gradus, conditionis, dignitatis, & præeminentiæ, qui præfatum Tomum retinent, ut in eo suppleant quæ fraudulenter fuerunt adempta. Mandantes Ordinariis locorum, seu Inquisitoribus, ut hujusmodi Edictum faciant publicari, & post decem dies ab ejusdem publicatione, omnes adstricti, & obligati sint, ac si personaliter unicuique esset intimatum; cujus transumpta etiam impressa, & sigillo cujusvis personæ in dignitate Ecclesiastica constitutæ munita, plenam fidem ubique locorum, in Judicio, & extra faciant, ac si ipsummet Originale esset exhibitum. Actum Romæ in Generali Congregatione Indicis, Septimo Nonas Augusti, Anno a Nativitate Domini Nostri Jesu Christi MDCVI. Sequitur mox subscriptio: Fr. Paulus Picus Ordinis Prædicatorum Sacræ Congregationis Indicis Secretarius.

II. Si recentiores complures Venetas Librorum editiones decurramus, constabit eas cuique legenti in multis fuisse mutilatas, adeo ut nec ipsa Conciliorum Labæana editio Venetiis facta, ab ea mutilatione fuerit immunis. Laudanda profecto Gallorum Typographorum fides, qui Libros, uti illos Auctores scripserunt, typis suis committunt, & ubi aliquid in eisdem occurrerit diversum a Gallicæ Nationis doctrina, seu praxi, haudquaquam mutilant, sed

sed Nota aliqua illud corrigunt. Ita plane factum est, ut alias omittam, in Editione posthuma egregii Operis Antonii Dadini Altaerræ, quod inscriptum est, *Ecclesiasticæ Jurisdictionis Vindiciæ adversus Caroli Fevreti, & aliorum Tractatus de abusu susceptæ*, ubi inter alia Editor ejus Operis in Præfatione postquam dixit, Altaerram Juri, vel potius Consuetudinibus antiquis Ecclesiæ inhærentem tenaciter, nec ultra progressum, multa in hoc Opere asseruisse, quæ mutata sunt in Foro, utilitate ita suadente, sic statim ad nostram rem subdit: *Tamen ne inde aliqui sibi fiant, hanc in Judiciis etiam Ecclesiasticis formam esse servandam, & ne inde aliqui causam controversendi quod nunc usu contrario introductum est, accipiant, visum est notare aliqua, quæ possint aliquos Juris nostri tenaces offendere, quæ ad calcem hujusce Præfationis subjungere curavimus. Poterant hæc in manuscripto obliterari, & revera pleraque delenda, & obliteranda fuissent; sed visum est Opus Altaerræ integrum exhibere, ne mutilum, & mancum in aliquibus videretur, quia in plerisque Virorum doctissimorum, & clarissimorum Bibliothecis hujusce manuscripti exemplum invenitur, necnon in Bibliotheca Regia, &c. Si itaque vel manuscripti Libri edendi sunt integri vel ob eam causam, quod aliquod eorum exemplum manuscriptum alicubi invenitur, multo magis integri edendi Libri illi, quorum jam aliæ factæ sunt editiones. Certe si eam Typographi fidem violent, merito eorundem Typographorum editiones contemnuntur.*

C A P. XV.

De Facultate Secretarii Indicis in expediendis licentiis pro legendis Libris prohibitis ad tempus triennii, veteribusque prorogandis ad aliud triennium; & de Regulis ab ipso ea in re servandis.

I. **F**acultas expediendi novas licentias in triennium pro legendis, ac retinendis vetitis Libris, eas peten-

tentibus, veteresque prorogandi, & confirmandi ad aliud triennium, servatis scilicet Regulis Indicis, & ejusdem Congregationis Decretis, jam in qualibet Congregatione Secretario ipsius conceditur, qui propterea singulis Sabbatis ex vedire eas solet solo in iisdem suo nomine apposito, & Cardinalis Præfecti sigillo. Profecto solent & ipsæ licentiæ concedi non modo a Congregatione Indicis, verum etiam a Congregatione S. Officii, & a Magistro Sacri Palatii; sed juxta hanc tamen instructionem, seu regulas, quas mihi hodiernus Sacræ Congregationis Indicis Secretarius Vir Clarissimus F. Thomas Augustinus Ricchini communicavit.

II. Itaque prima Regula est, ut in concedendis licentiis legendi, ac retinendi Libros prohibitos exacte servetur in posterum, prout hætenus servatum fuit, Decretum felicitis recordationis Urbani Papæ VIII. editum die xxx, Octobris anni mdcxxx. adeo ut licentiæ legendi, ac retinendi omnes, & quoscunque Libros, quos in præfato Decreto concedi prohibetur, nullatenus concedantur, nempe Libros, qui contra Religionem Catholicam ex professo tractant, Libros Nicolai Macchiavelli, & Caroli Molinæ, necnon eos, qui de Astrologia Judiciaria principaliter, vel incidenter agunt, etiam si ea, quæ in eis continentur, non certo eventura asserantur. Regula altera Magistrum Sacri Palatii spectat; ut nimirum possit is quidem uti facultate sibi a Sede Apostolica attributa concedendi hujusmodi licentias; sed cum limitatione tamen, quæ a Sacra Congregatione Sancti Officii emanavit die xix. Januarii anni mdcxxxiii. nimirum in Urbe tantum, & exceptis Libris, qui tum in Congregationis Sancti Officii, tum in Urbani VIII. Papæ Decretis excepti sunt.

III. Quo vero tam a Sacris Congregationibus Sancti Officii, & Indicis, quam a Magistro Sacri Palatii cum debita circumspeditione & cautela, ut par est, in re adeo gravi procedatur, tertia regula est, ut licentiæ, quæ alias ab eisdem concedi possunt, non concedantur, nisi prævia attestatione in scriptis exhibenda super matura ætate, doctri-

strina, & probitate Oratorum, seu licentias petentium, necnon super veritate expositorum in precibus, quodque illis Librorum prohibitorum lectio, nullum fidei, pietatis, sanæque doctrinæ damnum, attestantis judicio, allatura sit. Attestatio autem, juxta memoratam Instructionem, quoad Religiosos fieri debet a Generali, seu Procuratore Generali suorum Ordinum respective, quoad Seculares vero, ab Episcopo, aut Vicario Generali, aut quoad utrosque, si quandoque justis de causis ita videbitur, ab alio saltem Viro fide digno. Ceterum quarta Regula cautum est illud, ut actu studentibus, sed qui nondum suorum studiorum cursum expleverint, lectio Librorum prohibitorum nunquam permittatur, nec juvenibus, præsertim eorum Librorum lectio, qui immunda, seu obscena ex professo tractant, narrant, aut docent.

IV. Regula quinta præscribit, ut Oratores, qui licentias petunt, exprimere in precibus debeant, quod lectione Librorum prohibitorum, quos petunt, indigeant, causamque indigentia exponant, ad dignoscendum, an ea causa censenda sufficiens sit. Pro causa vero sufficienti minime habeatur, quod nempe Oratores ea licentia indigeant ad majorem sui eruditionem; sed indigentia causa esse debet, vel ad effectum confutandi, vel quod munere aliquo funguntur, ratione cujus, vere opus habent licentia legendi vetitos Libros, quos petunt. Quamobrem vetat hæc Regula concedi licentiam, nisi pro Libris ad idem munus spectantibus, prævia tamen attestazione, de qua superius dictum est. Rursus cautum est ex Regula sexta, ut his, quibus pro indigentia sui muneris Libros aliquos prohibitos legere, ac retinere conceditur, haud de cætero quasi accessorie ad majorem sui eruditionem tribuatur facultas legendi Libros Grammaticos, Poeticos, Rhetoricos, Historicos, & Philosophicos. Quinimo Libri de Historia Sacra tractantes, & periculosam Philosophiam docentes, non nisi cum speciali, & magna cautela permittantur. Quemadmodum nec eos, qui agunt de Dogmatibus Fidei, legere, ac retinere fas sit, ne sub pretextu quidem eos confutandi,

H

nisi

nisi his, qui in Theologia, ac Sacrarum Litterarum Studiis sunt magnopere versati.

V. Hactenus Regulæ in memorata Instructione contentæ, quarum septima, & postrema illa est, ut quæ in concedendis licentiis in ipsa Instructione præscribuntur, etiam in confirmandis jam concessis serventur. Atque hic est mos, qui hodieque adamussim servatur a Secretario Congregationis Indicis, de quo nos præsertim in hoc Opere nostro præsentī agimus.

C A P XVI.

De Secretarii Indicis munere in publicatione Decreti veterum Librorum, & de impudentissimo mendacio pseudodocitoris Sorbonici, quod perspicuo testimonio Cardinalis Quirini egregie refellitur.

Librorum, qui per varias Congregationes interdicti sunt, Decretum, atque Elenchum ex antiquo instituto vulgare solet ipsæ Sacræ Congregationis Indicis Secretarius, ac consuetis in Urbe locis publicatum, & affixum ad Inquisitores Generales transmittere, quo illi suis in locis publicari faciant. Hinc ubi anno elapso MDCCCLIX. die xx. Septembris vetita fuit ab ipsa Sacra Indicis Congregatione Bibliotheca Jansenistica P. de Colonia, hoc affixum fuit in variis Urbis locis Decretum: *Sacræ Indicis Congregationis Decreto damnatus, & prohibitus fuit ubicumque, & quocumque idiomate impressus, imprimendusve Liber, cui Titulus: Biblioteque Janseniste, ou Catalogue alphabetique de Livres Jansenistes, Quesnellistes, Bajenistes, ou suspectes de ces Erreur &c. A Bruxelles MDCCXLIV. & alibi, tanquam plura continens respectivè falsa, temeraria, Scholis, & Scriptoribus Catholicis, etiam Ecclesiastica dignitate eminentibus injuriosa, & Apostolicæ Sedis Decretis adversantia. Nemo itaque cujuscumque gradus, & conditionis præfatum Librum vel imprimat, vel legat, vel retineat. Siquis interim habuerit,*
In-

Inquisitoribus, seu locorum Ordinariis a presentis Decreti notitia tradat sub pœnis in Indice Librorum prohibitorum contentis. Quibus per me infra scriptum Secretarium Sanctissimo Domino Nostro BENEDICTO Papæ XIV. relatis, Sanctitas Sua Decretum Sacræ Congregationis approbavit, & publicari jussit. In quorum fidem &c. Romæ in Palatio Apostolico Quirinali die xx. Septembris MDCCXLIX. Fr. J. A. Cardinalis Guadagni. Tum vero sequitur: Fr. Tb. Augustinus Riccibinius Ordinis Prædicatorum S. C. Secretarius.

II. Rursus quod in hoc Decretum temere debacchatus fuisset anonymus Scriptor libelli famosi: cui Titulus. *Epistola Doctoris Sorbonici ad Amicum Belgam*, prodiit statim hoc aliud ejusdem Sacræ Indicis Congregationis Decretum die vi. Maji hujus anni MDCCCL. editum, quod in consuetis Urbis locis affixum legi, estque hujusmodi: *Sacræ Congregationis Decreto damnata, & prohibita suere Folia nonnulla sine loco impressionis edita sub hoc Titulo: Epistola Doctoris Sorbonici ad Amicum Belgam, Laine, & Gallice scripta, tanquam libellus famosus, continens propositiones falsas, temerarias, scandalosas, seditiosas, atque Apostolicæ Sedi injuriosas. Ea itaque Folia ubicumque, & quocumque idiomate impressa, seu, quod absit, imprimenda, Sacra eadem Congregatio vetat, nequis cujuscumque status, & conditionis apud se retinere, vel legere audeat, sed ipsa Ordinariis locorum, aut hereticæ pravitatis Inquisitoribus statim a presentis Decreti notitia tradat sub pœnis in Indice Librorum contentis. Quibus per me infra scriptum Secretarium Sanctissimo Domino Nostro BENEDICTO Papæ XIV. relatis, Sanctitas Sua Decretum approbavit, atque executioni mandari jussit. In quorum fidem &c. Romæ in Palatio Apostolico Quirinali die vi. Maji MDCCCL. Sequitur subscriptio: J. Cardinalis Spinelus. Deinde vero: Fr. Tb. Augustinus Riccibinius Ordinis Prædicatorum S. C. Secretarius. Porro Præfectus Sacræ Congregationis Indicis est Angelus Cardinalis Quirinus, sed ubi is abest, subscribere solet Cardinalis antiquior Con-*

gregationi præfens. Quamobrem impudentissime mentitur & Auctor illius libelli famosi, cui Titulus: *Sorbonici Doctoris ad Reverendissimum Ricchinium Sacræ Congregationis Indicis Secretarium gratiarum actio &c.* ubi inter alia non erubuit scribere, Epistolam ipsam Doctoris Sorbonici ad Amicum Belgam, damnatam fuisse, frustra relutante Cardinali Quirino.

III. Sed agendæ gratiæ eidem Cardinali Quirino, qui in Libro, cui Titulus *Injustæ secessionis &c.* Romæ edito hoc anno MDCCCL. pag. 200. Lectorem monet, *falso in quodam folio ante aliquot dies typis excuso*, cui Titulus, Sorbonici Doctoris ad Reverendissimum Ricchinium Sacræ Congregationis Indicis Secretarium gratiarum actio &c. *falso*, ait, *in eo folio iradi*, Sorbonicam Epistolam, nequidquam repugnante Eminentissimo Quirino Congregationis Indicis Præfecto, proscriptam fuisse: *Nam repugnavi tantum*, inquit citato loco Eminentissimus Scriptor, *ne Decreto de ejus proscriptione condito per Congregationem, cui ipse non interfueram, nomen meum apponerem, ac consultius esse affirmavi, si idem Decretum, senioris ex Purpuratis Patribus, qui præsentibus eidem Congregationi adfuerant, subscriptione firmaretur.* Tum subdit: *Aliam præterea causam, cur repugnarem, aperui Secretario Indicis, huncque rogavi, ut etiam seniori illi Cardinali declararet, aliisque etiam, quod a se fideliter præstitum fuisse, ipse mihi postea affirmavit. Eandem palam proponere Sacræ Congregationi non dubitarem, si ad illam accedere per pedum ægritudinem mihi licuisset.* Ita religiosissimus Cardinalis Quirinus. Inunc, & pleudodoctoris Sorbonici testimoniis fidas.

C A P. XVII.

*De munere Secretarii Indicis erga Consultores
ejusdem Congregationis.*

- I. **S**apientissime scribit S. Joannes Chrysostomus in sua Homilia de ferendis reprehensionibus, solius Dei pro-

proprium esse, nullius egere consilio. Hinc cum ceteri homines, ac ii præsertim, qui Reipublicæ præsunt, consiliis indigeant, merito Regum omnium Sapientissimus Salomon, Cap. xii. Proverbiorum, versiculo xv. ait, *cum esse sapientem, qui audit consilia*. Profecto hac sapientia præditi fuere Summi Romani Pontifices, qui institutis variis Cardinalium pro regimine Ecclesiæ, & multiplicium Ecclesiasticorum negotiorum expeditione, Congregationibus, expresse mandarunt, ut suos ipsæ haberent Consultores. Tria autem requiri in Consultoribus, prudentiam, probitatem, benevolentiam, notavit vel olim Aristoteles Lib. ii. Rhetoricorum, Cap. i. *Neque ob aliud, inquit, qui consulunt auditorem fallunt, nisi quod iis aliquid horum deest. Aut enim propter imprudentiam non recte opinantur; aut recte sentientes, propter improbitatem, non dicunt, ut sentiunt; aut quamvis recte sentiant, virtutisque sint, tamen cum benevoli non sint, facile creduntur sponte non optime consulere.*

II: Alienos esse ab hoc vitio Consultores Sacrarum Romanarum Congregationum, ac nominatim Indicis, pro certo haberi potest, summo hi enim studio, ac diligentia eligi solent. Nam quotiescumque agitur de Viro aliquo in Consultorem referendo, quod plerumque contingit, quoties tribus saltem in Congregationibus Censuram suam in aliquem Librum damnandum, vel corrigendum legerit, tunc si Dominis Cardinalibus Congregationis placuerit eundem inter Consultores admittere, Reverendissimo Secretario committitur, ut nomine Congregationis rem deferat ad Sanctissimum, quo benigne annuente, novus Consultor designatur, & per Epistolum ad ipsum transmissum ab eodem Secretario de collato sibi honore certior redditur. Porro, ut notat Cardinalis de Luca, Parte ii. Relationis Romanæ Curie Discursu xix. constituitur Sacra Indicis Congregatio non modo ex competenti Cardinalium numero, ac vario, prout placet Pontifici, & Secretario ex Ordine Prædicatorum, *qui in omnibus Cardinalitiis Congregationibus magnus est Minister, & Operarius, sed etiam*
in

in primarium, & fixum Consultorem habet præfatum Apostolici Palatii Magistrum, cujus antiquitas in Curia singularis ista cura fuit, prohibendi scilicet Libros perniciosos, & concedendi licentiam vetitos Libros legendi, de qua videri possunt quæ diximus nos in Opere nostro, De Magistro Sacri Palatii Apostolici; Lib. I. Cap. VIII.

III. Teste eodem Cardinale de Luca loco citato, habet & ipsa Sacra Congregatio Indicis magnum quoque numerum Theologiæ, aliarumque litterarum Professorum, qui frequentius omnes, vel pro majori parte, sunt Religiosi diversarum Religionum, sub nomine, seu vocabulo Consultorum, quorum partes sunt diligenter revidendi, ac examinandi Libros, quorum suspicio habeatur, juxta distributionem, quæ per Secretarium eis fieri solet, ad effectum referendi, & examinandi in plena Congregatione, quæ statutam diem habet, sed pro negotiorum numero, vel urgentia in aliquibus anni temporibus fieri solet, ita in ea determinando, an Liber debeat, necne prohiberi. Quod ait laudatus Auctor de Librorum distributione, qui revidendi, ac referendi sunt a Consultoribus in Congregatione, per Secretarium fieri eis solita, intelligi debet juxta electionem prius factam a Cardinalibus ejusdem Congregationis, & Secretario ipsi significatam. Secretarius siquidem semper Consultorum nomina in Congregationem deferret, ut ex iis seligantur a Dominis Cardinalibus, qui Censuram ferre debent in Libros denunciatos, vel jam relatos. Ceterum in nonnullis gravioribus, implexisque causis consuevit Consultorum Cœtus cogi, atque adunari apud Reverendissimum Secretarium, vel Magistrum Sacri Palatii Apostolici, eaque adunatio *Congregatio parva* appellari solet, ut auditis eorum suffragiis, atque consiliis, res maturius digesta, ac plenius excussa, ad plenam Cardinalium Congregationem referatur, ut ipsi nempe decident, suffragia enim Consultorum jam nunquam decisiva sunt, sed consultiva tantum.

IV. Consultores Romanarum Congregationum jam non alios eligi consuevisse, nisi Viros doctrinæ ac pietate,

tate, & prudentia præstantes, vel mihi plane constat, qui viginti sex, & supra annos commoratus sum Romæ, mirorque iccirco audaciam Poza, qui in supplici suo Libello ad Urbanum VIII. pro causa sui prohibiti Elucidarii perperam eos sigillat, ubi pag. 17. ita scribit: *Nunc venio ad ea, quæ sunt Illustrissimorum Dominorum Cardinalium. Certum est, non posse innumeris Ecclesiarum dissentis curis, ipso met esse Lectores, Censores, & Qualificatores Librorum prohibendorum, aut expurgandorum, sed eam curam ad alios (præ corporis, & humanarum virium tenuitate) esse deferendam. Non enim aliter in causis judicialibus fieri potest. Idcirco quamvis æquissime, & sanctissime suo muneri faciant satis, ex parte aliorum, qui hoc arcanum iudicium, ut delatores, vel testes, vel Fiscales, vel Secretarii, vel Censores circum obsident, plura timeri possint, ex quibus Catholici Scriptores injusta notentur infamia.*

V. Pergit Poza, ac magis magisque in ipsos Romanarum Congregationum Consultores invehitur, sic temere inquiens citata pag. 17. a tergo: *Accidere potest, ut docti videantur, nec tamen sint: in quibusdam rebus excellent, alias sibi traditas prorsus ignorent: cum aliis paciscantur, & clam conspirent, ut æquissima Tribunalia communi consensu decipiant: sint insensissimo genio, & ingenio, Auctori, ejus patriæ, cognationi, prosapiæ, Religioni, cujus est Auctor Orthodoxus: venales sint, & comparanda benevolentia causa, Catholici Scriptoris, gentis, vel familiæ inimicis omnem prodant causam, & nullum non moveant lapidem, ut illius nomen ignominia labe aspergatur. Nihil minus agant, quam expendere controversias, tum quia egent Librorum supellestiles, tum quia carent notione, quæ ad cognoscendum opus necessaria est &c.* Non contentus lacerasse Censores, sugillat mox etiam Secretarios, cæterosque Sacrarum Romanarum Congregationum Ministros, ita acrimoniam suam pag. 18. effundens: *Post sunt a Secretariis, Fiscalibus, Relatoribus causarum alia metui; nam cum hæc iudicia fiant sine parte, sine patrono, si ipsi, aut sint adversarii, aut elevatam, & depravatam*

nat-

narrationem referant, aut adjiciant, & nonnulla proprio Marte scribant, aut omittant referre, quæ Scriptorem Catholicum excusare poterant, aut alias tenebras effundant, nulla est via, qua tantæ injuriæ possis occurrir.

VI. Porro totus Poæ Liber refertus est acrimonia, non modo in ipsarum Congregationum Secretarios, ac Ministros, verum etiam ipsos earundem Congregationum Cardinales, ac Judices audacter, temereque perstringit. Non puto compotem sui illum fuisse, cum supplices Libellos ad Summum Pontificem in Librorum suorum defensionem scripsit, qui iccirco merito interdicti fuere. Sed omis- sis Poæ diæteriis, seliguntur semper a Cardinalibus Sacræ Congregationis Indicis Consultores, & quidem post probatam diu eorum fidem, ac doctrinam cum prudentia conjunctam. Nemini posse eorum vota, Censuras, & Consultationes communicari, cautum est quidem ex Decreto ejusdem Congregationis, & vivæ vocis Oraculo facto ab Innocentio Papa XI. Reverendissimo Patri F. Jacobo Ricci Secretario, de quo dicemus nos infra Lib. 11. suo loco, ut vitarentur scilicet discordiæ, apologiæ, & scripta adversus ipsas Consultorum Censuras. Sane constat ex Actis Reverendissimi Patris F. Hyacinthi Libelli pag. 214. in generali Sacra Congregatione Indicis, habita anno MDCLXIII. die xxvii. Februarii, decrevisse Cardinales, *ut in posterum ii, qui Consultores fiunt, præstent juramentum de bene se gerendo, & fideliter referendo Libros, omni humano respectu postposito &c.* itemque jussisse, *Secretarium formulam componere, sub qua jurent, cum prima vice Congregationem ingrediuntur.*

VII. Notandum hic demum est illud, quod tradit idem Cardinalis de Luca citato loco, commendabilem scilicet esse Sacræ Congregationis Indicis stylum, *omnia gratis peragendi, rigoroſe prohibita Consultoribus, ac Revisoribus cujuscunque mercedis recognitione, etiam sub prætextu magni laboris, vel expensarum, quas facere oporteret, pro eadem revisione. Omnes etenim Sacrarum Congregationum Operarii, præsertim istius, ac alterius supra*
enun-

enunciata Sancti Officii, necnon Rituum, mere gratuiti sunt, laborum mercedem a Sede Apostolica, cum Episcopatibus, vel Religiosis muneribus, pro eorum qualitate, ac temporum opportunitate, recipientes. Laudandus itaque summopere zelus Regnantis Summi Pontificis BENEDICTI XIV. qui in Reformatione expensarum pro Sanctorum Canonizationibus morem illum recens introductum sustulit, donandi scilicet Consultoribus Sacre Congregationis Rituum certam cocolatæ quantitatem. Quod Consultores Congregationis Indicis spectat, habent & hi sua privilegia, quorum unum est, donatum ipsis a Summis Pontificibus, Alexandro VII. & Clemente X. ut nimirum Regulares inservientes dictæ Congregationi Indicis in Officio Consultorum, non possint a Superioribus suis ab Urbe, atque Conventibus removeri, nisi causis ab eadem Cardinalium Congregatione, illiusque Secretario pro tempore existente examinatis.

VIII. Confirmavit quidem & hoc privilegium sanctæ memoriæ Benedictus XIII. qui tamen ne privilegium ipsum Consultoribus concessum, Conventibus, & Domibus Regularibus onerosum esset, eisque ab illa obedientia, quam professi sunt, se se subtrahendi stimuli adderentur, statuit, *ut in posterum unus dumtaxat ex Ordinibus Regularibus Congregationis prædictæ Consultor esse, ac ejusmodi privilegio frui possit &c.* Sed lubet integras laudati Pontificis Litteras describere die XXI. Augusti datas anno MDCCXXVII. quæ sunt hujusmodi.

BENEDICTUS

PAPA XIII.

Ad futuram rei memoriam.

Alias fel. rec. Clementi PP. X. Prædecessori nostro pro parte tunc existentium Consultorum Congregationis etiam tunc existentium S. R. E. Cardinalium Indicis Librorum prohibitorum, & expurgandorum præpositæ exposito, quod rec. mem. Alexander PP. VII. pariter Prædecessor noster, anno MDCLIX. decreverat, & declaraverat, non licere Superioribus Regularibus removeri ab Urbe, ac a

I

suis

suis Conventibus suos Subditos Regulares inservientes dictæ Congregationi in Officio Indicis Consultorum, quia talis remotio cedebat in præjudicium ipsius Congregationis, quæ alios Consultores inexpertos, veteranis, & expertis substituere constringebatur, hocque Decretum Superioribus eorundem Regularium a tunc itidem existente Congregationis prædictæ Secretario intimatum fuerat, dicti vero exponentes, quo quietius, majorique studio huic Sanctæ Sedi obsequium præstare valerent opportune sibi in præmissis a dicto Clemente Prædecessore provideri plurimum desiderabant; idem Clemens Prædecessor justis eorundem exponentium petitionibus favorabiliter annuere volens, supplicationibus etiam memoratorum Cardinalium nomine sibi super hoc humiliter porrectis inclinatus, ac supra expressum Alexandri Prædecessoris Decretum approbans, & confirmans, omnibus, & singulis tam nunc præsentibus, quam futuris Superioribus Generalibus, & Provincialibus, cujuscumque Ordinis, Congregationis, & Instituti, Auctoritate Apostolica præcepit, & mandavit, ut tunc, & pro tempore existentibus Consultoribus Regularibus Congregationis prædictæ, suis respective Subditis Conventualitatem in Collegiis, seu Domibus Regularibus in Urbe prædicta existentibus, in quibus literarum studia vigerent, quo commodius ejusmodi studiis, dictæque Sedis obsequiis incumbere valerent, si adessent, sin minus in aliis Monasteriis, Conventibus, seu Domibus Regularibus suorum respective Ordinum, Congregationum, & Institutorum in eadem Urbe positis, absque ulla mora, vel tergiversatione concederent, & assignarent; ipsos autem Consultores inde, nisi causis ab eadem Cardinalium Congregatione, illiusque Secretario pro tempore existente bene examinatis, amoveri nullo modo posse, auctoritate prædicta statuit, & ordinavit, & alias prout in prædicti Clementis Prædecessoris literis die v. Decembris MDCLXXIII. desuper in simili forma Brevis expeditis, quarum tenorem præsentibus pro expresso haberi volumus, uberius continetur. Hinc est, quod Nos præmissorum robori, & inviolabili observationi
 oppor-

opportune providere volentes, Motu proprio, & ex certa scientia, ac matura deliberatione nostra, deque Apostolica potestatis plenitudine, enarratas Clementis Prædecessoris litteras auctoritate prædicta, tenore præsentium confirmamus, & approbamus, ac quatenus etiam opus sit, innovamus. Præterea, ne privilegium hujusmodi Consultoribus dictæ Congregationis per supradictas litteras concessum, Conventibus, & Domibus Regularibus onerosum sit, eisque ab illa obedientia, quam professi sunt, sese subtrahendi stimuli addantur, Motu, scientia, & potestatis plenitudine paribus præcipimus, & mandamus, ut in posterum unus dumtaxat ex Ordinibus Regularibus Congregationis prædictæ Consultor esse, ac ejusmodi privilegio frui possit, illoque vivente, alii, qui ad Consultoris munus hujusmodi assumpti fuissent, eodem privilegio potiri nequeant, sed in eadem Urbe de Superiorum suorum licentia permanere volentes, Conventibus, ubi ab iisdem Superioribus collocabuntur, alimenta ad rationem duorum juliorum singulis diebus persolvere teneantur, & inde a suis Superioribus toties, quoties ipsis bene visum fuerit, etiam extra eandem Urbem mitti possint, nec isti privilegium prædictum etiam a Nobis, & Romanis Pontificibus Successoribus nostris absque speciali derogatione, & præsentium nostrarum litterarum mentione impetrare queant. Declarantes ulterius, quod ejusmodi privilegium Consultoribus prædictæ Congregationis dumtaxat concessum sit, & quod tam memorati Consultores privilegio hujusmodi gaudentes, quam pariter alii illo minime fruentes socium sibi addictum habere, nec postulare valeant, sed illum volentes, & a suis Superioribus permissum, alimenta pro eodem socio, sicut præmittitur, præstare debeant. Decernentes, easdem præsentis litteras semper firmas, validas, & efficaces existere, & fore, suosque plenarios, & integros effectus sortiri, & obtinere, ac prædictis Consultoribus Regularibus in omnibus, & per omnia plenissime suffragari, & ab illis, ad quos spectat, & pro tempore spectabit inviolabiliter, & inconcusse observari; sicque, & non aliter

in præmissis per quoscunque Judices Ordinarios, & Delegatos, etiam Causarum Palatii Apostolici Auditores, ac ejusdem S. R. E. Cardinales etiam de Latere Legatos, aliosve quoslibet quacunque præminencia, & potestate fungentes, & functuros, sublata eis, & eorum cuilibet quavis aliter judicandi, & interpretandi facultate, & auctoritate, judicari, & definiri debere, ac irritum, & inane, si secus super his a quoquam quavis auctoritate scienter, vel ignoranter contigerit attentari. Non obstan. Constitutionibus, & Ordinationibus Apostolicis, ac quatenus opus sit, quorumvis Ordinum, Congregationum, Institutorum, Provinciarum, Monasteriorum, Conventuum, Collegiorum, & Domorum Regularium, aliisve quibuscunque etiam juramento, confirmatione Apostolica, vel quavis firmitate alia roboratis Statutis, & consuetudinibus; privilegiis quoque, indultis, & litteris Apostolicis, eisdem Ordinibus, Congregationibus, Institutis, Monasteriis, Provinciis, Conventibus, Collegiis, & Domibus Regularibus, illorumque Superioribus Generalibus, & Provincialibus, aliisque Personis quibuscunque sub quibuscunque verborum tenoribus & formis, ac cum quibuscunque etiam derogatoriis derogatoriis, aliisque efficacioribus, efficacissimis, & insolitis clausulis, irritantibusque, & aliis Decretis in contrarium præmissorum quomodolibet concessis, ac pluries confirmatis, innovatis, & approbatis. Quibus omnibus, & singulis etiam si pro illorum sufficienti derogatione de illis, eorumque totis tenoribus specialis, specifica, expressa, & individua, & de verbo ad verbum, non autem per clausulas generales idem importantes mentio; seu quavis alia expressio habenda, aut aliqua alia exquisita forma ad hoc servanda foret, tenores hujusmodi, ac si de verbo ad verbum nihil penitus omisso, & forma in illis tradita observata exprimerentur, & infererentur, præsentibus pro plene, & sufficienter expressis, & insertis habentes, illis alias in suo robore permanens, ad præmissorum effectum hac vice dumtaxat specialiter, & expresse derogamus, cæterisque contrariis quibuscunque. Volumus autem, ut earundem præsentium

sentium litterarum transumptis, seu exemplis etiam impressis manu alicujus Notarii publici subscriptis, & sigillo personæ in Ecclesiastica dignitate constitutæ, vel Secretarii supradictæ Cardinalium Congregationis munitis, eadem prorsus fides in judicio, & extra illud habeatur, quæ ipsis præsentibus haberetur, si forent exhibitæ, vel ostensæ. Datum Romæ apud S. Mariam Majorem sub Annulo Piscatoris die xxj. Augusti MDCCXXVII. Pontificatus nostri anno quarto.

F. Card. Oliverius.

IX. Dictis hætenus adjungendum censeo quod legitur de ipsis Consultoribus adnotatum in Actis Sacræ Congregationis Indicis, Secretario P. Hyacintho Libello; & primum quidem, Consultores abesse, vel dimitti ab Urbe, inconsulta Sacra Congregatione, non posse. Secundo, jussisse Alexandrum Papam VII. ne, inaudita Congregatione, amoveantur ab Urbe iidem Consultores, & Congregatio nihil statuere possit, nisi habito verbo cum Sanctissimo; quod Decretum confirmatum deinde etiam fuit per Litteras in forma Brevis a Clemente X. anno MDCLXXIII. de quo facta est mentio in superius recitatis Litteris Benedicti XIII.

C A P. XVII.

De habitatione, ac Sociis, & emolumentis Secretarii Congregationis Indicis.

I. **S**ecretarium Indicis diu, & quidem a prima institutione suam habuisse habitationem una cum Sociis illius servitio addictis in Palatio Apostolico, constat ex supplex libello, & informatione exhibitis die iv. Decembris anni MDCLIV. Cardinalibus Congregationis Indicis ab eisdem Secretario illius temporis, qui erat Joannes Baptista de Marinis, postea Generalis Ordinis sui Prædicatorum Magister electus anno MDCL. quique, ut in ipso Libello inquit, jam decem, & novem annis munere illo perfunctus fuerat. Habitarunt deinde Secretarii Indicis in Collegio S. Atha-

S. Athanasii, quod est in Regione Campi Martii in via Paulina in loco, qui vulgo dicitur *Babuino* a deformis quadam figura Satyri fonti imposita, quodque Gregorius PP. XIII. ad Græcos juvenes erudiendos instituit anno MDLXXVI. Idibus Januarii, ut ex ejus Constitutione, quæ incipit, *In Apostolica Sedis &c.* docet Viſtorellus in ejusdem Pontificis Vita apud Ciaconium. Regimen hujus Collegii pertinuisse aliquando ad Dominicanos, innuit Echard Tomo II. Scriptorum Ordinis sui Prædicatorum ad annum MDCXXXI. pag. 473. ubi agens de Fr. Francisco Magdaleno Capiferreo, sic ait: *Collegii Græcorum jam Rector erat, Græcæque juventuti instituendæ, ac moderandæ incumberebat cum anno MDCXV. a Paulo V. Secretarius Congregationis Indicis adlectus est.* Concessum tandem regimen ejusdem Collegii fuit inclytæ Societati Jesu ab Urbano VIII. & quidem ante Pontificatum, dum scilicet Protector esset ipsius Collegii, ut inter alios tradit Felinus in Libro cui Titulus, *Delle cose maravigliose dell' alma Città di Roma*, editionis anni MDCXXV. pag. 66.

II. Sane puto, post datum Patribus Societatis Jesu regimen Collegii S. Athanasii, sedem suam suam fixisse Secretarios Sacræ Congregationis Indicis in Cœnobio S. Mariæ super Minervam, atque hinc est quod, ut in Actis ejusdem Congregationis legitur ab Alexandro Papa VII. electus in Magistrum Sacri Palatii F. Hyacinthus Libellus, qui Secretarius Indicis erat, *die xxij Septembris anni MDCLXIV. discessit e Conventu Minervæ Palatium Apostolicum deinde habitaturus, Patrique Secretario, Fratri nempe Vincentio Fano, qui in Secretarii munere Libello suffectus fuit, Claves Camerarum, quas habitaverat, consignavit.* Porro testatur idem Libellus, Alexandrum Papam VII. mandasse quidem, ut Cameras, in quibus ipse habitaverat, dum Secretarius Congregationis Indicis erat, in Conventu Minervitano, *sudradicto P. Magistro Fano per Patrem Generalem, Provincialem, aut Priorem assignari*, ut in fine Actorum Libelli habetur, pag. 257.

III. Extat penes & ipsum Secretarium in Conventu Mi-

Minervitano, ejus curæ commissum Archivum Congregationis, habetque idem Secretarius sub se Socium Sacerdotem, qui dispensandis licentiis Librorum vetitorum præest, itemque Laicum ejusdem Ordinis specialiter ejus ministerio addictum, ac nulli alii subiectum. Ceterum licet tum Secretarius, tum Socii exempti sint a variis religiosi oneribus, vivunt tamen sub regulari disciplina, festisque præsertim diebus Choro intersunt, ut alias pleraque religiosas observantias sileam, quarum tenaces omnes, quos novi, Secretarii Congregationis Indicis extiterunt, potissimum vero qui hodie eo munere fungitur Fr. Thomas Augustinus Ricchinus, quem quidem ob ejus doctrinam cum probitate, & prudentia conjunctam semper magni fecit Regnans Pontifex BENEDICTUS XIV.

IV. Ad emolumenta quod attinet Secretarii Indicis, ejusque Sociorum, teste eodem memorati supplicis Libelli Auctore, Clemens Papa VIII. Pontificio Diplomate dato die XIII. Junii MDXCIV. *consideratis*, ut ait, *multis expensis necessario faciendis per Secretarium dictæ Congregationis, motu proprio, & ex certa scientia, deque Apostolicæ potestates plenitudine*, assignavit Fratri Paulo Pico a Burgo S. Sepulchri tunc Sacræ Congregationis Secretario, ejusque in eo Officio successoribus in perpetuum, præter solitas ædes in Palatio Apostolico, quæ, uti dictum est, a prima institutione prædictæ Congregationis usui illius Secretario fuere, partem, ut vocant, pro ipso ac Socio ejusdem Ordinis, & uno Scriptore, itemque decem scuta in menses singulos solvenda eidem initio cujuscumque mensis a Camera Apostolica, quæ alias a Dataria solvi solita fuerant, ac præterea annuam ducentorum scutorum Camera pensionem.

V. Extant de hisce emolumentis Secretario Congregationis Indicis assignatis certa in Regestis ejusdem Congregationis monumenta, in quibus inter alia ad annum MDXCIV. ad diem XVIII. Junii legitur, Cardinalem Marcum Antonium Columnam Congregationis Præfectum retulisse in Congregatione, *Clementem VIII. ex benigna largitate*
decre-

decrevisse restituendam solitam provisionem, & portionem perpetuo duraturam Secretario Sacræ Congregationis Indicis, & Successoribus: Rursus ad diem xxvi. Julii Decretum refertur, quod executioni mandetur realiter provisio mensua decem scutorum a Sanctissimo assignata Secretario ad instantiam Congregationis, & Illustrissimus Cardinalis Columna a Sanctissimo portionem Palatii Apostolici pro eodem Secretario, & ejusdem Substituto, & Scriptore assignari curet. Præterea ut ad diem xxviii. Julii legitur, Vivæ vocis Oraculum ab Illustrissimo Cardinali Columna traditum fuit Secretario Sacræ Congregationis de annua provisione centum viginti scutorum a Sanctissimo Domino nostro eidem assignata.

VI. Sequitur mox laudati Cardinalis Columnæ de eare attestatio, quæ est hujusmodi: *Nos Marcus Antonius Episcopus Prænестinus Cardinalis Columna Sacræ Congregationis Indicis Præfectus, universis, & singulis præsentibus litteras inspecturis, & audituris salutem in Domino sempiternam, ac eisdem præsentibus fidem adhibere indubiam; notum facimus, ac in verbo veritatis attestamur, qualiter Sanctissimus in Christo Pater, & D. N. Clemens divina providentia Papa Octavus vivæ vocis oraculo nobis facto die xiiij. Junii MDXCIV. motu proprio, & ex certa scientia, consideratis multis expensis necessario faciendis per Secretarium Sacræ Congregationis Indicis, annuam provisionem, quæ per Datariam olim solvebatur, benigna largitate restituit, concedens, & assignans in perpetuum, & Apostolicæ Sedis autoritate, scuta decem ex nunc in principio cujuslibet mensis moderno Secretario Fratri Paulo Ficchio Magistro a Burgo S. Sepulchri Ordinis Prædicatorum, & Secretario pro tempore existenti solvenda a Reverenda Camera Apostolica. In quorum omnium, & singulorum fidem, ac testimonium ex Decreto Illustrissimorum, & Reverendissimorum Dominorum Cardinalium Sacræ Congregationis Indicis, præsentibus Litteras fieri fecimus, illasque manu propria subscripsimus, sigillique nostri impressione communiri mandavimus. Datum in Palatio nostro*

stræ solitæ residentie die xxiiij. Julii MDXCIV. Pontificatus ejusdem Sanctissimi Domini Nostri Clementis Octavi anno tertio. Ita est Marcus Antonius Episcopus Prænestinus Cardinalis Columna.

VII. Sed nec omittendum, quod legitur ad diem v. III. Octobris, decretum nempe ex omnium sententia fuisse, quod Cardinalis Toletus, qui unus erat e Cardinalibus memoratæ Congregationis Indicis, annuam pensionem ducatorum ducentorum quantocius assignari procuraret a Sanctissimo, Secretario Sacræ Congregationis, prout multisies ad instantiam Congregationis benigne Sanctitas sua premisit. Die tandem xxi. Octobris, ut ibidem legitur, Illustrissimus Cardinalis Toletus retulit, quomodo nomine Congregationis a Sanctissimo petierat, & benigne impetraverat pensionem ducatorum ducentorum quamprimum ex speciali ordine Sanctitatis suæ a Datario consignandam Secretario Congregationis. Porro in memoratis monumentis Cardinales non alio titulo, nisi Illustrissimi, & Reverendissimi donantur, quia scilicet titulum Eminentissimi Urbanus Papa VIII. Cardinalibus primus concessit, uti jam alibi diximus.

C A P. XVIII.

De absentia Secretarii Congregationis Indicis, & vicibus ejus suppleri solitis, jussu tamen Summi Pontificis, ab aliquo Religioso ejusdem Ordinis, præsertim vero a Magistro Sacri Palatii, ac de oratione initio Congregationis recitanda.

I. **P**Lura jam hanc in rem afferri possent exempla, quæ in Actis Sacræ Congregationis Indicis occurrunt; unumque illud commemorabo, quod in ejusdem Actis a Patre Fr. Hyacintho Libello descriptis legitur, pag. 204. Die xxv. Novembris MDCLXI. discessit ex Urbe P. Secretarius Sacræ Congregationis Indicis, & coactus est extra eam permanere undecim menses circiter, componendæ rei

K

fa-

familiaris causa. Rediit xxx. Octobris presentis anni MDCLXII. Tempore absentia Reverendissimus Pater Sacri Palatii Apostolici Magister de mandato Sanctissimi Domini nostri egit Prosecretarium, duasque Congregationes coegit, quibus iussus est duo Decreta prohibitionis Librorum evulgare, quorum primum edidit octava Martii MDCLXII. secundum xx. Julii ejusdem anni, nihilque aliud actum est. Libri autem prohibiti in illis Decretis leguntur. Omitto alia exempla, quibus docemur, absente Secretario Indicis, substitutos eidem fuisse a Summo Pontifice in ejus locum tempore absentia alios, sed semper tamen Religiosos Ordinis Prædicatorum, cui a prima institutione, ut compluries dictum est, constabatque luculentius Lib. 11. hujus Operis, ubi chronologicam Secretariorum singulorum seriem describemus, Secretarii Indicis munus affixum fuit.

II. Porro ut finem huic Capiti faciam, licet initio Congregationis Indicis recitare Orationem ad Magistrum Sacri Palatii spectet, uti notavimus in nostro Opere, *De Magistro Sacri Palatii Apostolici*, Lib. 1. Cap. vii. sciendum tamen, ubi ipse Magister abesset, eam recitationem fieri solitam esse a Secretario, uti Acta ejusdem Congregationis passim nos docent. Atque hic obiter nota utriusque officii connexionem, dum unus vices alterius supplet, & tum potissimum quod Summi Pontifices, vacante Sacri Palatii Magistro, sive per obitum, sive per promotionem ad altiore dignitatem, in defuncti, vel promoti locum Secretarium Indicis substituere consueverunt.

C A P. XIX.

Pontificium Diploma refertur, quo Secretarius Indicis institui solet.

- I. **D**UO sunt Diplomata, quibus novi Secretarii Indicis donari a Summis Pontificibus solent, cum primum ad eam dignitatem evecti sunt. Alterum, de quo in præ-

præfenti agimus, eorum institutionem fpectat, alterum vero, quod in Capite fequenti referemus, præcedentiam illoræ inter fui Ordinis Fratres. Utriuſque meminit Frater Vincentius Fanus, qui Secretarius Sacræ Congregationis Indicis inſtitutus fuit anno MDCXLIV. die IV. Septembris ab Alexandro Papa VII. ut idem Fanus teſtatur Tomo VI. Actorum ejuſdem Sacræ Congregationis pag. 260. ubi ita ſcribit: *Die XVII. ejuſdem menſis*, nempe Septembris prædicti anni MDCXLIV. *obtinuit Pater Secretarius ſolium Breve pro Indicis Secretaria, & alterum, in quo Sanctitas ſua concedit locum Patri Secretario immediate poſt Ordinis Generalem Procuratorem, tam in Choro, quam reſectorio, & reliquis locis, & functionibus, ſicut conceſſum fuerat ſuis prædeceſſoribus, Reverendiſſimo Secretario Capifucco, & Libello.* Nequid autem hoc loco omittamus, quod Secretarium Indicis ſpectat, cenſui Pontificium Benedicti XIII. Pontificis deſcribere, quo die XXVIII. Junii anno MDCCLXIV. inſtitutus fuit Indicis Secretarius præſtantiffimus Pater Fr. Aloyſius Nicolaus Ridolſius, eſtque huiusmodi.

BENEDICTUS PAPA XIII.

Dilecte Fili ſalutem, & Apoſtolicam Benedictionem. Cupientes, ut officium Secretariatus Congregationis noſtræ Indicis per idoneam Perſonam, & rerum, quæ ad huiusmodi officium pertinent, peritam, fideliter, ac diligenter, recteque exerceatur, ac ſperantes, quod tu officium prædictum certo, quem pro expreſſo haberi volumus modo vacans, omniaque, & ſingula, quæ ad huiusmodi officii exercitium ſpectant, digne, & juſte exequeris. Teque a quibuſvis excommunicationis, ſuſpenſionis, & Interdicti, aliisque Eccleſiaſticis ſententiis, cenſuris, & pœnis a jure, vel ab homine quavis occasione, vel cauſa latis, ſi quibus quomodolibet innodatus exiſtis, ad effectum præſentium dumtaxat conſequendum: Harum ſerie abſolventes, & abſolutum fore cenſentes, ſupplicationibus tuo nomine Nobis ſuper hoc humiliter porrectis inclinati: Te quoad vixeris in dictæ Congregationis Secre-

tarium, & Familiarem nostrum cum omnibus, & singulis privilegiis, honoribus, oneribus, immunitatibus, libertatibus, exemptionibus, prærogativis, favoribus, gratiis, & indultis, quibus alii, qui pro tempore fuerunt ejusdem Congregationis Secretarii, seu officium ipsum quomodolibet obtinuerunt, de jure, usu, privilegio, consuetudine, aut alias quomodolibet uti, potiri, & gaudere potuerunt, debuerunt, & consueverunt, Apostolica auctoritate, tenore præsentium constituimus, & deputamus. Mandantes propterea omnibus, & singulis, ad quos spectat, & spectabit in futurum, quatenus te ad Secretariatus hujusmodi officium admittant, ac in illo manuteneant. Non obstantibus constitutionibus, & ordinationibus Apostolicis, cæterisque contrariis quibuscumque. Datum Romæ apud S. Petrum sub Annulo Piscatoris, die xxviii. Junii mcccxxiv. Pontificatus Nostri anno primo.

Porro prædictæ Litteræ foris sic inscribuntur: *Dilecto Filio Aloyso Nicolao Ridolfo Ordinis FF. Prædicatorum Congregationis nostræ Indicis Secretario, ac Familiari nostro*; earumque prorsus tenore cæteri Secretarii instituuntur. Ex quibus observare licet, eosdem inter Familiares Summi Pontificis ab ipsa sui institutione accenseri.

C A P. XX.

Diploma alterum Pontificium, quo Indicis Secretarius intra Ordinem suum Prædicatorum locum post Procuratorem Generalem habere dicitur.

I. **E** Sse antiquum morem, ut novo Secretario Indicis præter Pontificium Diploma, quo in eo munere constituitur, aliud ei a Summo Pontifice præbeatur, in quo locus eidem conceditur immediate post Ordinis sui Procuratorem Generalem, jam supra notavimus in Capite præcedenti, constatque ex repetitis Litteris ipsorum Pontificum in forma Brevis, quarum exemplar hic illud subijcimus, quod Benedictus XIII. eidem Ridolfo dedit.

BENEDICTUS P P. XIII.

Dilecte Fili-salutem, & Apostolicam Benedictionem
Re-

Religionis zelus , sacrarum Litterarum scientia , aliaque probitatis, & virtutum merita, quibus te præditum esse etiam familiari experientia cognovimus, nos inducunt, ut te amplioris honoris prærogativa libenter decoremus . Itaque specialem tibi gratiam facere volentes, teque a quibuscunque excommunicationis, suspensionis, & interdicti, aliisque Ecclesiasticis sententiis, censuris, & pœnis a jure, vel ab homine quavis occasione, vel causa latis, si quibus quomodolibet innodatus existis, ad effectum præsentium dumtaxat consequendum : Harum serie absolventes, & absolutum fore censentes, motu proprio, ac ex certa scientia, & mera liberalitate nostris tibi, ut durante munere Secretarii Congregationis nostræ Indicis, quo fungeris ; tu tam in Choro, & Ecclesia, quam in Refectorio, Capitulis, & quibuscunque aliis congressibus publicis, & privatis proximum immediate post Procuratorem Generalem Ordinis Fratrum Prædicatorum, cujus Professor existis, locum, & sessionem in eodem ordine ubique habere, cætoresque omnes Fratres ejusdem Ordinis cujuscunque dignitatis, & qualitatis existant post eundem Procuratorem Generalem præcedere possis, & debeas, Apostolica auctoritate tenore præsentium concedimus, & indulgemus, ac ita volumus, & mandamus. Præcipientes propterea in virtute Sanctæ Obedientiæ dilecto Filio Magistro Generali, & aliis Superioribus ejusdem Ordinis ; ad quos spectat, & pro tempore spectabit, ut locum, & sessionem hujusmodi tibi juxta earumdem præsentium tenorem assignent, teque in illius pacifici possessione manuteneant, & hujus nostræ gratiæ commodo absque ulla contradictione frui, & gaudere faciant. Non obstantibus Constitutionibus, & Ordinationibus Apostolicis, ac dicti Ordinis Fratrum juramento, confirmatione Apostolica, vel quavis firmitate alia roboratis statutis, & consuetudinibus, privilegiis quoque, Indultis, & Litteris Apostolicis eidem Ordini, illiusque Magistro Generali, aliisque Superioribus, & personis in genere, vel in specie, aut alias quomodolibet concessis, confirmatis, & innovatis . Quibus omnibus, & singulis illorum tenores præsentibus,

tibus, pro plene, & sufficienter expressis, ac de verbo ad verbum insertis habentes, illis alias in suo robore permanfuris, ad præmissorum effectum hac vice duntaxat specialiter, & expresse derogamus, cæterisque contrariis quibuscumque. Datum Romæ apud S. Petrum sub Annulo Piscatoris, die xxviii. Junii MDCCXXIV. Pontificatus Nostri Anno Primo.

F. Cardinalis Oliverius.

II. Licet autem ex recitatis Litteris Secretarius Sacræ Congregationis Indicis intra Ordinem suum locum habeat immediate post Procuratorem Generalem ejusdem Ordinis; si tamen contingat, Secretarium ipsum adscriptum esse Consultoribus alicujus Congregationis, vel Examinatoribus Episcoporum, locum tunc immediate haberet post Generales actuales Ordinum Regularium, ex Decreto Clementis Papæ XII. sub die 1. mensis Februarii anni MDCCXXXI. dum inter Examinatores Episcoporum memoratum Ridolfum retulit, uti legimus Tomo II. Actorum pag. 696.

C A P. XXI.

De Secretarii Sacræ Congregationis Indicis Funere.

I. **J**Am non ut cæteri Fratres sepulturæ mandatur Secretarius Indicis, solemniore ei consueverunt celebrari exequiæ, posito illius cadavere in alto lecto culcitra aurea tecto, pendentibus gentilitiis stemmatibus, & imaginibus mortis, accensisque circa feretrum multis torticiis, ut fieri assolet Aulæ Romanæ Præsulibus. Recitari etiam in ejusdem Secretarii Funere post celebratam solemnem Missam solita fuit Oratio in ejus laudem, uti constat ex variis id genus Orationibus typis editis, quarum nonnullas memorabimus nos infra, Lib. II. in serie singulorum Fratrum, qui a Secretis prædictæ Congregationis Indicis fuere. Secretarii obitum solet Generalis Magister universo Ordini suo Prædicatorum nunciare, sicut aliorum Virorum illustrium ejusdem Ordinis, qualis inter alios semper

per habitus fuit ipse Secretarius Indicis . Poni quoque eidem consuevit marmorea inscriptio in Ecclesia , ubi sepultum fuit illius cadaver . Sed de his videri possunt quæ dicemus citato Libro II. in singulorum Secretariorum serie .

C A P. XXII.

Secretarii Sacræ Congregationis Indicis munus , sicut & alium duo , nempe Magistri Sacri Palatii , & Commissarii Sancti Officii , a Romanis Pontificibus Maximis prudenti providentia fuisse inclyto Ordini Prædicatorum affixa , ostenditur .

I. **N**ostri instituti ratio postulat , ut tandem peculiari Capite invidiam ac livorem quorundam perstringamus , qui Ordini Prædicatorum quammaxime infensi , mendacii & calumniis moliuntur , ut nempe ab Aula Romana omnino exulent Dominicani , & amoveantur ab officiis , quæ per quingentos & supra annos , quasi hæreditaria successione , servarunt . Hoc sane votum , & consilium est pseudodoctoris Sorbonici in sua epistola ad Amicum Belgam , ubi dolens , proscriptam nuper a Sacra Indicis Congregatione Bibliothecam Jansenisticam , in ejusdem Congregationis Secretarium Reverendissimum Patrem Ricchinium inductus , sic inter alia scripsit : *Nonne tibi videtur optime consultum esse Catholica Ecclesiæ in Libris corrigendis , ac proscribendis , Ricchinio Domino , ac moderatore ! Atqui præterea est , cur graviora metuamus , nisi tandem aliquando missi Fratribus , hujusmodi Curie Romanæ Munera ad graves , & doctos Prælatos devolvantur .* Vetus hoc votum , & consilium fuit , auctore Petro a Valle Clausa , quem egregie in suo Apologetico eruditissimus Vincentius Baronius confutavit .

II. Magisterium Sacri Palatii ab Honorio III. Pontifice primum Sanctissimo Patriarchæ Dominico traditum , ab eoque per manus Filiorum non interrupta serie pervenisse tandem ad Reverendissimum , atque doctissimum Patrem

trem Fr. Josephum Augustinum Orsi, luculentissime ostendimus in Opere nostro, *De Magistro Sacri Palatii Apostolici*, Lib. 1. & 11. Commissarii quoque Sancti Officii munus antiquum esse, atque hæreditarium esse Ordinis Fratrum Prædicatorum, peculiari Libro quantocius demonstrabimus, quem, *De Commissario Sanctæ Inquisitionis*, inscribemus. Nunc ut de munere Secretarii Congregationis Indicis dicamus, quod una cum aliis larvatus Doctor Sorbonicus ereptum Dominicanis vellet, licet illud recentius sit Magisterio Sacri Palatii, si tamen originem spectes, & merita eorum, quibus munus ipsum conceditum fuit, non minus jure quam Sacri Palatii Magisterium Dominicanis asseres. Jam superius non uno in loco scriptimus ejus institutionem factam fuisse auctoritate Œcumenici Tridentini Concilii, ejusque jussu præstantissimum Virum Dominicani Instituti alumnum, Franciscum Forerium Lusitanum leges condidisse a Concilio sancitas, atque a Summis Pontificibus confirmatas. Cæterum cum major esset Forerius Secretarii Congregationis titulo, qui primum illi collatus est, & ejus conditor, ac legifer appellari posset, visum est, ait laudatus Baronius, Summis ipsis Pontificibus Maximis, ut Ordini Dominicano, qui Forerium dederat, perpetuus hic titulus assereretur; atque illud Concilii, ac summorum Pontificum judicium, quasi lex hætenus valuit, nec etiam Ecclesiam pœnituit.

III. Varias causas curamovendi Dominicani a memoratis muneribus, ac præsertim a Secretarii Congregationis Indicis Officio, jam olim Petrus a Valle Clausa obtendit; ut consulatur scilicet Dominicanorum saluti, quæ periclitatur in Aula inter tot delicias & opes, quæ votum castitatis, & paupertatis laceßunt; inter tot pompas, & applausus, quibus humilitas dejicitur; in illa ad arbitrium vivendi licentia, obedientiæ jugo assuetis perniciofa; neque hac abrogatione officiorum, tantum pericula arcentur, quæ impendunt capiti illorum, qui a Claustro ad Aulam transeunt, sed a toto Ordine plura mala amoveantur, aut bona illi accedunt; extinguuntur siquidem in primis odia illo-

illorum, qui Ordinem ipsum execrantur, quod putent se læsos a suis, etiam dum officiorum partes fidelissime implent. Hæc & alia ille, qui tamen cum se rabie actum, furiisque agitatum in Dominicanos, jam non semel iterum iterumque in suis Libris probaverit, jam neminem adeo vesanum inveniet, qui ejus consilia vel non rideat, vel non abhorreat.

IV. Sed ut magis magisque videas, quanta sit Petri a Valle Clausa, inscitia, atque stultitia, toto suo Libello, quem, Dominicanos exagitans, scripsit de immunitate Cyriacorum, Pontificem, Cardinalesque primum traducit tanquam cæcos, stolidos, atque ignaros, qui sinant, se ab uno fraterculo decipi, & circumagi ad illius nutum, tum vero audet, nec erubescit eisdem consilium dare, ut amoveant Magistrum Sacri Palatii, Commissarium Sancti Officii, & Secretarium Sacræ Congregationis Indicis, eosque faciant ad suas cellas redire, ut exercitiis spiritualibus vacent, & sub disciplina, & paupertate religiosa vivant. Totum hoc consilium, & tantæ molis opus a privata vindictæ studio natum, quod Petrus ægerrime tulerit suos, *De Martyrio per pestem*, &, *De Communione pro mortuis*, Libros censura a Sacra Indicis Congregatione proscriptos, animadvertit jam Vincentius Baronius in suo Apologetico, Lib. v. Sectione ultima, Articulo II. §. 1. ubi etiam & illud notavit, Petrum ipsum, ut hanc injuriam ulcisceretur, non solum abdicandum esse Secretarium Indicis, qui Decreto proscriptionis subscripsit, sed ipsam etiam Congregationem prorsus evertendam, Rotamque substituendam, cui esset curæ judicium ferre de Libris, optavit. At quis non miretur hominis audaciam, qui velit omnia ad suum arbitrium constitui? Vult sibi licere effutire quæcumque in buccam venerint contra censuras, & contra Judices, idest nullum vult finem esse jurgiorum, & tumultuum, & ideo Rotam petit, quæ continuo volvatur, & nunquam conquiescat.

V. Longe nostro hoc ævo fuit profecto insolentior larvatus Doctor Sorbonicus in citata epistola ad Amicum

L

Bel-

Belgam, ubi iniquissime ferens proscriptam Bibliothecam Jansenianam Patris de Colonia, cupiensque & ipse, abdicandum Secretarium Indicis, Reverendissimum scilicet Patrem Ricchinium, quem ejus proscriptionis Auctorem dicit, imprudenter, stulte, impieque Romanum Summum Pontificem BENEDICTUM XIV. carpit. Hæc ejus verba: *P. Ricchinus, qui P. Ursio suffectus est nuper a Secretis Romanæ Indicis Congregationis sub ipsa gerendæ dignitatis suæ initia inclarescere, suorumque Fratrum nomini inustam notam ulcisci voluit. Quid igitur? Pontificis Maximi in Cardinalem Norisium studio usus est in rem suam quamcallidissime. Pontifici, ut illustre aliquod ederet erga Cardinalem illum doctissimos inter ætatis suæ Viros sine ulla dubitatione censendum, voluntatis suæ argumentum persuaderi nullo negotio potuit. Nam, quod nemo nostrum ignorat, elaboravit ipse maximopere, eisi frustra cessit conatus omnis, ut quo Theologica ejus Cardinalis Opera inter noxios vetitosque Librorum retererant solemne Decretum Hispani Quæsitores Fidei, abrogarent, atque delerent. Ricchinii igitur artibus effectum est, ut Pontifici suaderetur, damnata Patri de Colonia Bibliotheca, Decretum illud Hispanum injustitiæ convictum iri. Insidiis his irretitus est Pontifex; extorta est Bibliotheca proscriptio.*

VI. Hactenus Sorbonicus Doctor, cujus quidem quot verba, tot in Secretarium Sacræ Indicis Congregationis, & quod horrendum est, in ipsum Romanum Pontificem Maximum sunt maledicta. Sed agendæ gratiæ Romano Philalethi, qui in epistola sua, quam de justa Bibliothecæ Jansenianæ proscriptione ad Theologum Lovaniensem scripsit, egregie Pontificem non modo, sed & Ricchinium ab injuriis, & calumniis larvati Sorbonici vindicavit. Circumventus Pontifex dicitur. *Atqui Pontifex? Doctissimus ille quidem, ut observat laudatus Philalethes, ac solertissimus ingenti acie omnia pervadens, ac circumspiciens, & quo, ut ipsi fatentur hæretici, non ullus multis ab hinc annis omni genere doctrinarum ornatiore Sedem Apostolicam*

occu-

occupavit. Ab hoc Pontifice Ricchinii artibus, ait epistola Auctor, nempe pseudodoctor Sorbonicus, circumvenuto, atque insidiis irretito extorta est Bibliotheca Jansenistica proscriptio. Possum ego putare Virum esse Catholicum, qui Romanum Pontificem, sive ille sit, sive non sit doctus, cum Fidei, & Reipublicæ Christianæ negotia tractat, administri fraudibus dicere audeat circumveniri, decipi, circumduci? Quid speramus fore deinceps in Religione tutum, hac via improbis hominibus ad maledicendum, & Romæ Decreta contemnenda patefacta? Idem vero jactatum in BENEDICTUM XIV. quale tandem convicium est? quæ injuria? quæ contemptio? Hic tantus Pontifex tam exigue sapere visus est Scriptori maledicentissimo, ut quid contineretur in Bibliotheca Jansenistica ad diligentissimum Congregationis examen deducta ignoraret prorsus, neque posset, quin Ricchinii fraudibus caperetur, de ea re judicare. Hule Pontifici, quo e manibus imperitorum Librum eriperet exitiosum, necesse fuit, Ricchinium imponere, atque insidiari. Quid posset e grege Lutheranorum Scripser deterrere in Pontificem Romanum jactare? Addit & alia Philalethes, quæ videri possunt in citata epistola jam variis in locis edita, quæ tota est in confodiendæ epistola, seu potius libello famoso pseudodocoris Sorbonici.

VII. Certum profecto illud est, quod jam non semel notavimus, ægresferri a larvato Sorbonico Doctore Secretarii Indicis, Magistri Sacri Palatii, & Commissarii Sanctæ Inquisitionis munia a Dominicanis exerceri; temereque asserit, quod & olim perperam scripsit Petrus a Valle Claufa, graviora metuenda, nisi tandem aliquando missis Fratribus, hujusmodi Curie Romanæ Munera ad graves, & doctos Prælatos devolvantur. Arcendos monet Religiosos a memoratis Officiis, ut soli seculares Præfules admoveantur, quasi ipsi nullo partium studio laborent, & omni affectu humano sint intacti. Satis feliciter penetravit hos sensus, aperuitque malevoli animi morbum doctissimus Vincentius Baronius in suo Apologetico Lib. v. Sectione ultima, Articulo 1. ubi prædictum Petrum confu-

tans, ait, consilium illius a morbo veteri natum, quod nec parem, nec superiorem ullum pati posset, nisi illi omnino morem gereret. Dicit & adversum pseudodoctorem Sorbonicum possunt, quæ ibidem laudatus Baronius mox subjicit: *Ut Divi Basilii comparatione utar, cum Religiosos, & Dominicanos de te non vis quidquam statuere, & ad seculares appellas, videris mihi similis nauseam stomachi, & vomitum ex maris jactatione patientibus, qui ut morbum levent, identidem locum mutant, & a navi ad schapham descendunt, nullo solatio mali, cujus causæ in visceribus hæret.* Tum vero paulo post: *A Religiosis vis ad seculares ire, & ab istis statim velles redire ad Religiosos; aut quod verius est, mallet, tui esse arbitrii, & nulli subjei &c.*

VIII. Sævit potissimum larvatus Sorbonicus in Ricchinum Congregationis Indicis Secretarium ob damnatam ab ipsa Congregatione Bibliothecam Jansenianam artificio Ricchinii, imitarique visus iccirco est canes, qui lapidem appetunt, & mordent, dum projicientem nequeunt, aut non audent invadere. Quid enim Secretarius Indicis, quid Decretum ejus nomine subscriptum? Plane veluti lapis est, quo latratus compescat. At Sorbonicus vaser quasi totus in rabiem actus, cum nequeat aperte in Congregationem sævire, & in Eminentissimos Cardinales, tametsi nec illis, nec Summo Pontifici pepercerit, Secretarium lacerat, ac discerpit. Neque hæc est furoris ejus meta. Vult etiam totam gentem Dominicanorum perire, & Officia auferri ab illis, & Prælatis comitti. Sed vana est hæc declamatio, frustra sperat, Sapientissimos Romanos Pontifices sua mutaturos consilia, pseudosorbonico declamante in Dominicanos. Non certe magis, quam Luna a suo cursu deflectit ad canis latratus. Sciunt Romani Pontifices, primum Indicis Secretarium fuisse Franciscum Forerium Dominicanum, & ob tanti Viri celeberrimam memoriam dederunt illud Dominicanis Officium, sicut Magisterium Sacri Palatii ob merita S. Dominici, & aliud Commissarii Sanctæ Inquisitionis in gratiam S. Petri Marty-

tyris, & S. Pii V. qui eo munere primum donatus fuit, & deinde euectus ipse ad Petri Cathedram Palatium Sancti Officii extruxit, & Congregationem Sanctæ Inquisitionis ampliavit. Non facile mutant res mature sancitas, diu servatas, & præscriptas* tempore Romani Pontifices Sapientissimi ad unius hominis voces; nec patiuntur, relicto proprio iudicio, insanorum consiliis, ac votis adhærere.

IX. Puto equidem, Dei gratia, & Summorum Pontificum liberalitate factum, ne unquam hætenus munia ipsa a Dominicanis ad aliorum manus pervenerint, tametsi ante pseudoctorem Sorbonicum, adversus ipsos, & Joannes Baptista Poza, & Petrus a Valle Clausa, & alii declamarint. Quamvis enim, ut idem Baronius fatetur loco citato, §. II. summa sit Pontificum potestas in ea, quæ Jure Ecclesiastico Decessorum voluntate sancita sunt, ut legitima suppetat, cum libuerit illa immutandi, vel tollendi facultas, nec ullus foret de læso jure expostulandi locus, si concessa, & multis seculis ad nostrum usque servata Pontificum beneficio munia, in alios translaturus, Dominicanis abrogaret; hoc tamen maxime ipsorum Dominicanorum tum veterum, tum recentiorum virtutem, & fidem erga Apostolicam Sedem, atque Summorum Pontificum in eosdem effusam bonitatem commendat, quod munia ipsa, quorum penes ipsos Pontifices esset arbitrium, Dominicanæ Familiæ perpetuo asserta voluerint, quasi summo jure ad eos pertinerent, nec citra injuriam, ut ita dicam, possent auferri.

X. Ridiculum vero est illud, quod Petrus a Valle Clausa non contentus variis calumniis lacerasse Dominicanos, affectans ex summa charitate, & prudentia, illorum salutem, ac paci consulere, eosdem vellet sibi solis attendere; cum alias omnibus constet, a S. Patriarcha Dominico institutum fuisse Ordinem Prædicatorum, ut ejus nempe Alumni partes Mariæ, & Marthæ egregie peragant, & contemplationi actionem adjungant; ut studeant, & meditata populis tradant; ut noverint, non sibi, sed toti Ecclesiæ esse natos, & de toto genere humano bene me-

rean-

reantur . Neque solum institutione , & legibus , sed etiam suo exemplo Filiis suis prævit Patriarcha Sanctissimus . Ipse omnium primus , & post ipsum zelantissimi Filii in hæreticos inquisierunt . Primus ipse omnium Sacri Palatii Apostolici Magister , eodemque Munere ad hanc usque diem sapientissimi Alumni defuncti sunt , ex quibus etiam non paucos Romani Pontifices Maximi Cardinalitia Dignitate donarunt , uti jam diximus Lib. II. Operis nostri , quod nuper edidimus , *De Magistro Sacri Palatii Apostolici* . Quid mali , quid peccati est , Dominicanos recentiores Sedi Apostolicæ obsequentissimos , majorum suorum inhærere vestigiis , in eadem statione militare , eadem obire ministeria , quæ illi his veluti hæreditaria ex ejusdem Apostolicæ Sedis benignitate reliquere ? Vellent profecto adversarii Dominicanos a celebritate Urbium in Claustrum , & in solitudinem retrudere , uno verbo , vellent , ut essent Carthusiani .


XI. Sed hæc deliria adversariorum sunt ; nam alias Summi Pontifices , qui ipsa Munia Ordini Prædicatorum , ob ejus in Ecclesiam merita , ob sanam doctrinam , quam suum sequentes Angelicum Doctorem propugnarunt semper , ob Christianam Religionem , & Catholicam Fidem in Ethnicorum & Hæreticorum Provincias investam , ob vitam pro ejusdem Fidei Catholicæ dilatatione profusam , concediderunt , Deo adjuvante , numquam sinent , ut ipsi Dominici a memoratis Officiis amoveantur , humani generis hoste perperam adnitente . In una enim Familia tot seculis summis laboribus hæc ministeria comparata , quod ad alios pervenire debeant , nemo unquam sanæ mentis sibi persuaserit .

L I B E R II.

In quo Series eorum describitur, qui ad hanc
usque diem ex Prædicatorum Ordine Secre-
tarii Congregationis Indicis fuere.

C A P. I.

De F. Francisco Forerio Ulyssiponenſi.

I.  **R**IMUS omnium Secretarius Indicis jam recte fuisse dicitur Fr. Franciscus Forerius Lusitanus Ulyssiponenſis Ordinis Prædicatorum, quippe qui, uti Libro I. non uno in loco notavimus, a Sancta Œcumenica Tridentina Synodæ decretus fuit Secretarius Deputationis, quam Synodus ipsa instituit anno MDLXII. super conficiendo Indice Librorum prohibitorum. Sane Franciscus ipse, ut narrat Clarissimus Jacobus Echard in Tomo II. Scriptorum Ordinis Prædicatorum ad annum MDLXXXI. pag. 261. & seqq. natalibus clarus, sed litteris, & eruditione longe clarius in Orbe fulsit seculo XVI. Adolescens Ordinem Prædicatorum amplexus, in linguarum se a juventute optima cognitione exercuit, Latinamque, Græcam, & Hebraicam egregie sibi comparavit. Cunque acutissimi esset ingenii, judicii juxta & acerrimi, earundem linguarum beneficio, & auxilio, seu in Patria, seu Parisiis, quo studiorum causa a Joanne III. Lusitano Rege animi plane Regii, cum æqualibus suis quamplurimis missus fuit, Theologiæ dans operam, profundissimus evasit ille Theologus, qua Scholasticam illa partem attingit, qua & Positivam, Moralemque spectare posset.

II. In Patriam e Galliis redux Forerius circa annum MDXL. mox in Scholis, sacrisque Pulpitis doctrina, & sa-
cun-

cundia magnani sibi comparavit famam, quæ & Regis Aulam usque pervasit. Henrico Cardinali, & Ludovico Principibus Joannis III. Regis Fratribus germanis, ob egregias partes, animique dotes eximias, acceptissimus fuit, & ab altero delectus, qui Filium erudiret Antonium, Cratensem exinde Priorem, & Regnum ipsum aliquando affectantem. Sed & a Rege non longo post intervallo Concionator Ordinarius, & Regius Ecclesiastes ascitus fuit cum annuo 50000. Regalium, seu Turonensium librarum 300. honorario, datis in id Regiis Litteris die XXI. Decembris anni MDLV. quo etiam munere sub Sebastiano Rege, stipendioque fruebatur.

III. Cum autem anno MDLXI. ad Concilium Tridentinum, quod sub Pio Papa IV. continuabatur graviore ex omnibus Regnis mitterentur Theologi, laudatus Forerius a prædicto Sebastiano Rege in primis selectus est, qui suo nomine in ipso Concilio adesset Theologus. Quantum vero in eodem Concilio adlaborarit Forerius, commissæ ei a Patribus munia, & majoris momenti negotia testantur. Dominica I. Adventus anni MDLXI. ad Synodi Patres orationem habuit quidem Forerius, quæ deinde anno MDLXIII. Brixie edita fuit, mirumque videri debet, eam in collectionibus hujusmodi Orationum, seu Concionum Tridenti habitarum etiam in Parisiensi anni MDLXXII. Conciliorum editione fuisse omissam. Ac præterea referente Ludovico Munoz in Vita Bartholomæi de Martyribus Archiepiscopi Bracarensis Hispane scripta, pag. 225. cum ipsi Bartholomæo a Patribus Synodi commissæ fuisset Concionatores, qui identidem coram ipsis prædicarent, eligendi cura, ejusdem jussu Forerius Feria VI. post Dominicam II. Quadragesimæ *de vinea Domini* ex Suggestu publice oravit, & adeo partibus omnibus absolutus visus est Concionator, ut sequenti Quedragesima Conciones singulis septimanis eum habere voluerint.

IV. Deputatione conficiendi Indicis vetitorum Librorum instituta a Concilio Tridentino Sessione XIX. seu 24. sub Pio IV. die XXV. Februarii anni MDLXI. de qua diximus

ximus supra Lib. I. non uno in loco, Secretarius ejusdem Deputationis institutus fuit Forerius, quod ea in re summe esset versatus, quippe qui jam antea in Regno Lusitaniæ Censor publicus Librorum a Consilio Regio positus, & declaratus fuerat, ut ipse refert in Epistola nuncupatoriæ Commentariorum in Isaiani Prophetam ad Patres Tridentinos. Fuisse autem illum Secretarium memoratæ Tridentinæ Deputationis, constat vel ex Indice Librorum prohibitorum auctoritate Pii IV. primum edito Romæ e Typographia Camera Apostolicæ, anno MDLXIV. in quo legitur *Præfatio in Indicem Librorum prohibitorum confectum a Deputatione Tridentinæ Synodi R. P. F. Francisci Forerii Ord. Præd. S. T. Professoris, & ejusdem Deputationis Secretarii*. Idque etiam testatur Possevinus in sacro Apparatu, sic inquiens: *Unus ex Theologis nostris fuit ille F. Franciscus Forerius Lusitanus, qui Deputationi ad Censuram Librorum in eodem Concilio datus, Indicis Librorum ordinandi, & in eam formam, qua legitur, edendi Auctor fuit*.

IV. Præterea componendo, concinnandoque Catechismo jussu Tridentini Concilii, adhibitis insignibus ex Dominicana Familia Theologis, Leonardo Marino Archiepiscopo Lancianensi, & Ægidio Fuscarario Episcopo Mutinensi, de quo fusius dixi Lib. II. *De Magistro Sacri Palatii Apostolici*, Capite xxxviii. adjunctus fuit ejusdem Familiæ Dominicanæ Alumnus Franciscus Forerius, ut inter alios plures testatur S. Carolus Borromæus datis ad Lusitaniam Regem Sebastianum, & ad Henricum Cardinalem Lusitanum Novembris initio anno MDLXIV. litteris, quibus Forerium excusans, cur non illico a fine Concilii in patriam redierit, ejus operam scilicet Romæ necessariam fuisse in conscribendo Catechismo, tantisperque detineri, dum absolvatur Opus. Sed & id testantur alii plures, estque vulgo notum, uti observat Echard Tomo II. Scriptorum Ordinis Prædicatorum, anno MDLXXXI. pag. 263. ubi etiam tradit, Missale quoque, Breviarumque Romanum, recognoscenda, purganda, ac reformanda ipsi Forerio, duobusque

busque aliis insignioribus Prælati laudatis commissa fuisse a Concilii Tridentini Patribus primum, tum vero a Pio Papa IV. eaque tandem emaculata prodiisse sub Pio V. Romæ ex Typographia Reverendæ Cameræ Apostolicæ anno Domini MDLXVIII.

V. Quanta insuper fuerit Forerii æstimatio apud Tridentinos Patres, vel ex eo patet, quod cum quadam occurrissent cum Summo Pontifice ore ad os communicanda, ad idque homine opus esset fidissimo, hæc ipsi Forerio a Patribus Tridentinis provincia demandata fuerit, quam & ita exequutus est, ut & expectationi Patrum plane responderit, & maximam sui fecerit apud Pium Papam IV. existimationem. Sed tandem ad suos reversus est Sodales Ulyssiponenses anno MDLXVI. eoque munere Censoris publici Librorum, quo in Lusitaniz Regno anteaungebatur, post reditum fungi perrexit. Prior Conventus mox constitutus fuit, & deinde in Comitibus mense Septembris anno Christi MDLXVIII. in Provinciale electus; quo munere fungens Conventum in Almada non longe ab Urbe Regia erexit, in quem ut secretiorem locum munere expleto anno MDLXXI. secessit, studiis deinceps, unique salutis vacaturus, ubi obiit morbo correptus anno MDLXXXI. die x. Januarii, & in Aula Capitulari sepultus. Hinc evanescit quod fabulantur nonnulli, conspecta nempe ex monte Antonii Cratensis sui olim discipuli, & ad Regnum aspirantis clade, Albanique Ducis Hispanorum polemarchæ victoria, subito ex mœrore vehementi exanimem corruisse, & animam efflasse; prælium siquidem illud jam sex antea fere mensibus, die nempe xxv. Augusti commissum fuit. Forerii cum laude singulari meminere Sixtus Senensis in Bibliotheca Sancta, Lusitanus, Possévinus, Fernandez, ac præ ceteris a Jacobo Echard citatis Sousa in Historia Provinciæ Portugalliæ variis locis. Episcopatum sibi oblatum recusasse Forerium, testatur inter alios Vincentius Baronius Tomo II. Apologetici, Lib. IV. Sectione IV. Articulo I. §. 1.

VI. Varia scripta, ac edita a Forerio Opera memoratus Echard recenset citato superius loco, suntque hæc
1. *Isaiæ*

1. *Isaia Propheeta vetus, & nova ex Hebraico versio cum Commentario, in quo utriusque ratio redditur, vulgatus Interpres a plurimorum calumniis vindicatur, & loci omnes, quibus sana doctrina adversus haereticos, atque Judaeos confirmari potest, summo studio, ac diligentia explicantur, Venetiis anno MDLXIII. in fol. itemque Antuerpiæ MDLXV. in 8. In Epistola nuncupatoria ad Henricum Cardinalem Lusitanæ Principem Patres Societatis Jesu Collegio Eborense præfatos laudat, ut doctrina, & sanctitate præcellentes: qui velim, inquit, pro sua singulari probitate, ac maxima benevolentia, qua eorum Societatem propter Religionem, & vitæ rationem habui conjunctissimam, ut, siquæ fuerint obrectatorum calumniæ, me ab omnibus vindicent. In Præfatione ad Amicos sic habet: Coram Christo loquor, a quo eadem accepi, me quicquid est, quod, vel ipsi laudant, vel laudari intellexerunt, quicquid in meis concionibus populum tenet, atque afficit, quicquid est eloquentiæ, suavitatis, gravitatis, omnemque facultatem, quam mihi in dicendo tribuunt, hac ratione esse assequutum, quam in interpretando Isaia sequor. Sixtus Senensis de hoc Commentario sic censet: Nullum unquam Opus in hoc scribendi genere prodii in lucem, quod æquius possit cornucopiæ appellari.*

2. *Commentaria in omnes Libros Prophetarum, ac Job, Davidis, & Salomonis, prælo parata se habere testatur ipse in epistola nuncupatoria Operis superioris ad Patres Tridentinæ Synodi, in quibus, ait, germanam, Catholicamque sententiam summa diligentia, ac studio, singulis dictionibus examinatis, dicendique formulis Hebræorum observatis, elicui, ut promulgarem. Opus sane spissum est, operosum, quod etiam haud scio, an unquam unus homo præstare possit. In Commentario in reliquos Prophetas, ut dicit in Præfatione citata ad Amicos, tantummodo loci difficiles expli. antur. Commentarium vero in Job tanti, & præ omnibus habebat, ut cum aliquando cella sua conflagraret, igne fortuito erumpente, sedato igne, quæserit, an saltem Job salvus, & integer abiisset, cum-*

que salvum accepisset, cætera igne absunta patienter tulit. Sic refert Sousa in Historia Provinciæ Portugalliæ Parte III. pag. 494. addens extare etiamnum Opus illud Auditori carissimum, & in ejus potestate esse, qui nec diu lucem desiderare publicani promittebat.

3. *Lucubrationes in Evangelia, quæ per totum anni curriculum leguntur ab eo per viginti annos in Aula Regia, & apud Cives Ulyssiponenses pro suggestu in concionibus exposita*, etiam prælo paratæ erant, quas in Præfatione citata ad Amicos, *ab iis, qui adfuerant, vehementer laudari* asserit; & si ederentur, *multo plures fore, qui eos Libros legerent, suoque nomini melius consultum iri*. Vix ulli tempestate sua, inquit Vassæus in Chronico ad annum MDLXVII. fuit concionandi dexteritate secundus.

4. *Lexicum Hebraicum sibi confecerat maximis vigiliis*, ut ipse testatur in Præfatione citata ad Amicos, *non solum ex aliis Lexicis, sed & examinatis locis, quos citant ad verborum significationes comprobandas; quod*, inquit, *incredibile dictu est, quantum negotium mihi successerit*. Nec omittendum quod in eadem Præfatione addit, in addiscenda scilicet lingua Hebræa Præceptore usum esse Angelo Caninio Anglariensi, *qui ad linguas docendas natus esse videbatur, atque Hispali mortuus est*. Recenset & alia Forerii Opera Echard loco citato, de quibus jam nos mentionem superius fecimus; viderique possunt, quæ de eisdem inter alios scribit in sua *Galleria* eruditus Cavalierius Tomo II. pag. 101. num. 18.

C A P. II.

De F. Joanne Baptista Lancio Regienfi, postea Sacri Palatii Apostolici Magistro.

I. **D**Eputatione Concilii Tridentini pro conficiendo Librorum vetitorum Indice, cujus Secretarius fuit F. Franciscus Forerius in Congregatione erecta a Sancto Pio V. anno MDLXI. ut superius jam dictum fuit Lib. I. de-

designatus fuit quidem ipsi Sacræ Congregationi Secretarius F. Antonius Possius a Monte Alcino Ordinis Minorum Conventualium, qui Concilio Tridentino interfuerat; quique vix munus ipsum pauco tempore exercuit, siquidem, ut inter alios notavit Echard Tomo II. Scriptorum Ordinis Prædicatorum ad annum MDXCVIII. pag. 323. *F. Joannes Baptista Lancius Secretarius Congregationis Indicis Antonii Possii absentis vices una supplavit, ejusdemque postea anno MDLXXX. die xvij. Novembris suffectus est loco, a Gregorio XIII. institutus.* Semper deinde serie non interrupta usque ad hanc diem Secretarios Congregationis Indicis fuisse a Summis Pontificibus ex inclyto Prædicatorum Ordine assumptos, perperam malevolis, & invidis, calumniatoribusque obnitentibus, perspicue ostendemus per varia hujus Libri Capita, in quibus electionem, ac gesta illustria singulorum Secretariorum laudatæ Congregationis ex processu referemus.

II. Certum plane est, quod jam ante nos notavit doctissimus F. Hyacinthus Libellus Ordinis Prædicatorum, Secretarius & ipse aliquando ejusdem Congregationis, in sua ad Lectorem Admonitione, quam legere est in Indice Librorum prohibitorum Alexandri VII. Pontificis Maximi jussu edito Romæ anno MDLXIV. pag. 227. & sequenti, ubi sic inter alia inquit: *Hanc postea Deputationem in Indicis Congregationem Pius V. erexit, Secretario eidem assignato Antonio Possio: ad quod munus deinceps Summi Pontifices Viros ex Ordine Prædicatorum assumerunt. Unde sequentes ex eadem Familia nusquam interrupta serie usque ad præsentem diem numerantur.* Recenset mox singulos Secretarios, ac se etiam ipsum, qui eo munere donatus fuit ab Alexandro Papa VII. anno MDCLXV. Sunt autem illi: *Joannes Baptista Lancius Regiensis ad Sacri Palatii Magisterium postea evectus. Vincentius Bonardus, postmodum ejusdem Sacri Palatii Apostolici Magister, ac demum Episcopus Hieracensis, cujus honorabilem mentionem facit Baronius anno Christi LVIII. Paulus Picus de Burgo Sancti Sepulchri, post Episcopus Vulturariensis. Thomas Pallavici-*

vicinus Bononiensis. Franciscus Magdalenus Capisferreus Romanus. Joannes Baptista de Marinis, nunc Ordinis Magister Generalis. Raymundus Capisuccus Romanus, nunc Magister Sacri Palatii. Hyacinthus Libellus Typhernas. Hactenus ille, qui tunc temporis Secretarius erat prædictæ Congregationis, cui deinde & alii ex eodem Prædicatorum Ordine in eo munere successerunt.

III. His non obscure notatis, Joannes Baptista Lancius, de quo agimus in hoc Capite, Regii Lepidi in Lombardia natus est, Ordinemque Prædicatorum ibidem professus, factusque in Scholasticis Disciplinis, atque Fidei Catholicæ negotiis pertractandis versatissimus, in multis sæpe Provinciæ locis, ac præferim Januæ Inquisitionis munus summa cum laude obivit, tum vero a F. Paulo Constabili Sacri Palatii Apostolici Magistro in Socium ascitus, Secretarii Congregationis Indicis Fr. Antonii Possii Ordinis Conventualium absentis vices una supplavit, ejusdemque postea anno MDLXXX. die XVII. Novembris suffectus est loco a Gregorio XIII. institutus. Fuit deinde Sacri Palatii Magister creatus a Clemente Papa VIII. anno MDXCVI. eoque munere functus est ad annum usque sequentem, quo vivere desiit. Vide quæ de ipso diximus in Opere nostro, *De Magistro Sacri Palatii Apostolici*, Lib. II. suo loco, unumque illud hoc loco adnotabimus, plures deinde alios Sacri Palatii Magistrorum Socios in Secretarios Sacræ Congregationis Indicis a Summis Pontificibus fuisse adlectos, ex Secretariis quoque ipsis non paucos ab ejisdem Pontificibus renunciatos fuisse Magistros Sacri Palatii, ut ex sequentibus Capitibus patebit.

C A P. III.

De F. Vincentio Bonardo Romano, postea Magistro Sacri Palatii, ac demum Episcopo Hieracensi.

I. **I**N Lancii locum Secretarius Sacræ Congregationis Indicis suffectus est quidem a Gregorio XII. Pontifice

ce anno MDLXXXIII. die III. Junii F. Vincentius Bonardus ortu , professioneque Romanus , Conventus S. Mariæ suæ Minervam alumnus , Vir tum eruditione , tum & morum integritate conspicuus , Concionator egregius , ac Sacræ Theologiæ Magister . Præfuit variis suæ Romanæ Provinciæ Cœnobiis , Prioremque memorati Conventus Sanctæ Mariæ ad Minervam , cujus erat Filius , cum laude egit , & incremento Regularis Disciplinæ . Hunc sibi munerisque sui Socium ascivit Sacri Palatii Apostolici Magister F. Thomas Zobbius , eumque deinde laudatus Gregorius XIII. die III. Junii , uti dictum est , anno MDLXXXIII. Sacræ Congregationis Indicis Secretarium instituit ; ereptoque e vivis Zobbio anno MDLXXXIX. mox ipsum Bonardum Secretarii Indicis munere fungentem Sixtus Papa V. in illius locum Sacri Palatii Magistrum substituit ; atque ex eo munere , quo biennium functus est , summa omnium approbatione ad Hieracensem in ulteriori Calabria Rhegienis suffraganeam Ecclesiam promovit Gregorius XIV. die xx. Martii anno MDXCI. quam decem Præsul ipse optimus , & vigilantissimus administravit annis , atque ibidem in pace quievit die XI. Martii anno MDXI. in sua Cathedrali sepultus . Vide quæ de eodem Bonardo diximus nos in nostro Opere , *De Magistro Sacri Palatii Apostolici* Lib. II. Cap. XLVI. Videri & de eodem Bonardo potest quod sua *Gallectia* scribit Cavalierius , ut alios omittam Scriptores , qui Bonardi cum laude meminere .

C A P. IV.

De F. Paulo Pico a Burgo Sancti Sepulchri , postea Episcopo Vulturariensi.

I. **P**romoto ad Sacri Palatii Magisterium F. Vincentio Bonardo , anno , uti dictum est in Capite præcedenti , MDXCI. elegit mox Gregorius XIV. eodem anno , & quidem die xxx. Martii in Secretarium Indicis Fr. Paulum Picum a Burgo Sancti Sepulchri , & Cœnobii S. Mariæ ad Mi-

Minervam Alumnum. Fuit Sacræ Theologiæ Magister, & Vir plane egregius, Socius quoque Magistri Sacri Palatii, & exinde Indicis Secretarius. Quo in munere cum Summis Pontificibus laudato Gregorio XIV. Clementi VIII. ac Paulo V. utilem se, ac fidum Ministrum probasset, ab ultimo, nempe a Paulo V. ad Ecclesias Vulturariensem, & Montis Corvini sub Archiepiscopatu Beneventano simul adunatas promotus est anno MDCXIII. die xv. Julii, uti videre est in Regestis Cancellariæ Apostolicæ, & apud varios Scriptores, quos recenset doctissimus Bremond Tomo v. Bullarii Dominicani, in Appendice ad Constitutiones Pauli V. pag. 724. Porro Pastoris vigilantissimi officio novem circiter annis perfunctus Pico sancte obiit anno MDCXXII. Ejus cum laude meminit inter alios Cavalierius in sua *Galleria*, Tomo I. pag. 557. Num. xxiv. ubi etiam notat, oblitum fuisse Ughellum recensere Tomo VIII. suæ Italiæ Sacræ hunc Episcopum. Porro, ut adnotavit Echard Tom. II. Scriptorum Ordinis Prædicatorum, ad annum MDCXXII. pag. 428. col. II. Pici curis prodiit, cum esset scilicet Secretarius Indicis, *Index Librorum prohibitorum cum Regulis confectis per Patres a Tridentina Synodo delectos, auctoritate Pii IV. primum editus, postea vero a Sixto V. auctus, & nunc demum auctoritate Clementis VIII. recognitus, & publicatus; instructione adjecta de exequendo prohibitionis Decreto, atque sincere emendandi, & imprimendi Libros ratione.* Romæ typis Camera MDCX. in 8.

C A P. V.

De F. Thoma Pallavicino Bononiensi.

I. **A**D Episcopatum promotus Paulo Pico a Paulo V. anno MDCXIII. ab eodem Pontifice in ejus locum eodem anno Secretarius Sacræ Congregationis Indicis suffectus fuit Thomas Pallavicinus Bononiensis, uti idem testatur in Actis Congregationis ad annum MDCXIII. pag. 48. a tergo, ubi ita scribit: *Ad laudem, & gloriam Omnipoten-*

tentis Dei, Beateque Virginis Mariae, & Sanctorum Petri & Pauli, & B. Dominici Patris nostri, Ego Fr. Thomas Pallavicinus Bononiensis Magister Romanae Provinciae Ordinis Praedicatorum, jam pridem annuente Sanctissimo, a Sacra Congregatione Secretarius designatus, & admissus Officium Secretarii nunc exercere capi, nempe die xx. Julii anni MDCXIII. ob assumptionem factam ad Episcopatum Vulturarensis R. A. P. Magistri Fr. Pauli Pici ejusdem Ordinis, & Provinciae, & Deo favente, quae potero diligentia, & fide injunctum Munus adimplere curabo. Porro dum novum Indicem moliretur Pallavicinus post editionem Indicis promulgati anno MDCXVI. quem collegisse se dicit partim ex Edictis Magistrorum Sacri Palatii, partim ex Decretis Sacrarum Congregationum Sancti Officii & Indicis nondum impressis, aliisque Libris ex speciali mandato Summorum Pontificum prohibitis, pie obiit Romae in Palatio Apostolico, ejusque cum laude meminit inter alios Fontana in Libro, *De Romana Provincia*, Titulo ix. qui inscriptus est: *De Sacrae Congregationis Indicis Secretariis*, pag. 349.

II. Teste eodem Fontana in Monumentis Dominicanis, Parte iv. Cap. xvi. pag. 585. *Pater Thomas Pallavicinus constituitur a Paulo V. Pontifice Sacrae Congregationis Indicis Secretarius post Picum; quo in munere Apostolicae Sedi inservivit annos duos, post quos debitum humanae fragilitatis persolvit in Palatio Vaticano, ex Regestis ejusdem Congregationis.* Atque hic nota, quod alias Lib. i. Cap. xix. diximus, Secretarium Indicis suam primum habuisse habitationem in Palatio Pontificio; ex recitato autem testimonio illud constat anno MDCXV. quo Pallavicinus obiit, ipsum Indicis Secretarium adhuc in Palatio Pontificio habitasse. Praeter memoratum Fontanam jam & alii quoque Scriptores Praedicatorum summa cum laude meminere praestantissimi hujus Viri; fuit enim doctus aequae ac pius, & Constitutionum observantissimus, ideoque a suis, ac etiam ab exteris magni habitus, praesertim vero a Summo Pontifice Paulo V.

C A P. VI.

De Fr. Francisco Magdaleno Capiferreo Romano.

I. **P**OST obitum Pallavicini, ad Secretarii Indicis munus subeundum delectus a Paulo V. Pontifice fuit die xxvii. Januarii anno mdcxv. Fr. Franciscus Magdalenus Capiferreus Romanus ex antiqua & nobili Magdalenorum Familia Urfinis conjuncta & affini oriundus. Adolescens Ordinem Prædicatorum præclaris dotibus ornatus amplexus est Romæ in Conventu S. Mariæ ad Minervam. Teste inter alios Jacobo Echard Tomo II. Scriptorum sui Dominicanæ Ordinis anno mdcxxxii. pag. 473. mox ille veræ pietati, litterisque operam adeo navavit egregie, ut nondum Sacerdotii ætatem adeptus artes apud suos & Theologiam profectus fuerit, & docuerit. Tanta sanctimonia, & eruditione enituit, ut ad publica, & privata munia assumptus nusquam vacandi locum habuerit. Collegii Græcorum jam Rector erat, Græcæque juventuti instituendæ, ac moderandæ incumbibat, cum anno mdcxv. a memorato Paulo Papa V. Secretarius Congregationis Indicis adlectus est, eodemque anno a Cardinalium Sanctæ Romanæ Inquisitionis, jussu Pontificis, Magisterii laurea donatus, eoque titulo acceptatus, ut ajunt, in Capitulo Generali Bononiæ eodem anno celebrato.

II. Prior etiam suo nativo Conventui præfuit, & tandem Provinciæ Romanæ Prior Provincialis, dimisso Secretarii Indicis munere, electus, eo titulo Capitulo Generali Romæ habito anno mdcxxxix. interfuit; eoque in munere auctoritate Urbani Papæ VIII. ultra statutum tempus perseverans, in eodem, benignitate, humilitate, vigilantia erga alios clarus, rigidus autem erga seipsum, Legumque Ordinis observantissimus, pridie Idus Sextiles maximo omnium luctu extinctus est Perusii an. mccxxxiii. Augusto mense, ut in Monumentis Dominicanis scribit Fontana, pag. 588. Solemniter ei parentarunt Conventus omnes Provinciæ, in primis vero Tiphernas, in quo &
ora-

orationem funebrem habuit Henricus Gienfionius Societatis Jesu, quam prælo mandavit Fr. Michael Rainutius ibidem Supprior, Perusiæ typis Petri Thomasi, ac Fr. Nicolao Magdaleno Capiferreo Francisci germano fratri Sacræ Theologiæ Magistro, & Conventus ad Gradus Viterbii Priori nuncupavit. Porro ejusdem Francisci cum laude meminere Allatius in apibus Urbanis, Fontana in Theatro pag. 403. & in Monumentis, pag. 588. atque in Provincia Romana, pag. 86. Acta demum Capituli Generalis Romæ habiti anno MDCL. pag. 100. Franciscum inter eos recensent, qui cum fama sanctitatis obierunt. Ejus nomine editus est *Elenchus Librorum omnium, tum in Tridentino, Clementinoque Indice, tum in aliis omnibus Sacræ Indicis Congregationis particularibus Decretis hactenus prohibitorum ordine uno alphabetico digestus*, Urbano VIII. nuncupatus, Romæ typis Camera Apostolicæ MDCXXXII.

C A P. VII.

De Fr. Joanne Baptista de Marinis Januensi, postea Ordinis Prædicatorum Generali Magistro.

I. **C**apiferreo in Secretarii Indicis munus substitutus est ab Urbano Papa VIII. anno MDCXXVII. Joannes Baptista de Marinis, Patria, nativitateque Romanus, gente vero Januensi e Marina Ligurum Patricia Familia, natus die xxviii. mensis Novembris anni MDXCVII. cui a sacro Fonte Ferdinandi nomen impositum fuit. Is a puero pietatem hausit a parentibus, Joanne Baptista Viro pietate litterisque ac moribus longe, quam natalibus etiam spectabili, & Theodora Justiniana femina illustri; liberalibusque disciplinis eruditus, adolescens annorum sexdecim Prædicatorum Ordinem amplexus, e manibus Magistri ejusdem Ordinis Fr. Seraphini Sicci Papiensis Romæ in Conventu Sanctæ Mariæ ad Minervam habitum sumisit die xxv. Martii anni MDCXIII. nomine sibi Joannis Baptistæ imposito; sequentique anno MDCXIV. eadem die xxv.

Martii solemnem professionem emisit. Mox studiorum causa in Hispaniam missus Salmanticæ, complutique Philosophiæ, Teologiæque studuit. Inde in Italiam reversus, Theologiam apud suos Romæ in Cœnobio S. Mariæ ad Minervam docuit, laurea que Magisterii donatus, Sacræ Congregationis Indicis Secretarius a memorato Pontifice Urbano VIII. delectus est anno MDCXXVIII. uti post alios tradit Jacobus Echard Tomo II. Scriptorum Ordinis Prædicatorum anno MDCL. pag. 361.

II. In eo Secretarii Congregationis Indicis munere plurimas atque eximias ostendit mox ille ingenii, religionis, & animi sui partes, infruntorum nonnullorum Auctorum in se provocavit innocens Religiosus invidiam, quorum ab ipso Pontifice, vel a Sacra Congregatione prohibiti fuissent Libri, ut non inde mirum videri debeat, in eum ita sævisse, & insaniisse Petrum a Valle Clausa, seu potius Theophilum Raynaudum, cūsum olim a se Librum, *De martyrio per pestem*, aliaque Opera proscripta dolentem, & sentientem. Lacerat passim, carpitque atrociter Petrus ipse Joannem Baptistam, quem etiam præ aliis titulis summa non nisi temeritate *Opilonem Arcadiæ* appellat, sed ab hujus male seriatum hominis injuriis calumnisque egregie Virum eximium vindicavit inter alios doctissimus, religiosissimusque Vincentius Baronius, Lib. 1. sui Apologetici in Argumento totius Operis, Articulo IV. pag. 15. ubi inter alia ita scribit: *An quo cares, Natalium ejus splendorem spernis, & totis viribus is maculatum? & qui inter tuos majores non nisi bajulos, & fossore numeros, placuit tibi conviciis prosequi eum, qui citra jactantiam posset de Imperatorum prosapia gloriari: & quem virtus, & merita, & vita innocenter acta, ad Magisterium Ordinis per Electorum vota, ipso Summo Pontifice Innocentio X. approbante, evexerunt, maligne, & falso, immeritum, & intrusum calumniaris Generalem, qui his gradibus ad Ordinis Magisterium conscendit. Qua fronte etiam obtrudis ignorantiam Grammatices, & Theologiæ illi, qui Salmanticæ per octo annos decurrit Philosophiæ,*
& Theo-

& Theologia spatia, & supra viginti defunctus cum summa laude munere Congregationis Indicis Secretarii, Summos Pontifices, & Cardinales habuit suae virtutis, & scientiae testes, & praecones? Notanda quae mox idem Baronius subjicit: *Sed ut video, infausti ominis tibi est Marini nomen, & ad illud toto corpore cohorrescis, quod subscriptum videas Decretis, quibus Libri tui configuntur. Sed quid propterea commeruit, qui ne quidem suffragio tibi nocere potuit, & prolata ab aliis sententia Secretarii nomine subscripserit?*

III. Pergit Baronius, causamque odii Petri a Valle Clausa in Dominicanos eam esse notavit, quod Officia occupent, & exercent, quae sibi scilicet Petrus vellet: *Hinc dolor, inquit, hinc lacrymae. Hanc demonstrationem de intimo animi tui sensu confirmat callatio ipsa scriptionis, & causa, quae te ad scribendum impulit. A duodecim annis assumptus ad Magisterium Ordinis, a negotiis Congregationis Indicis omnino abstinuit Pater Generalis; examen, ac damnatio Librorum tuorum pluribus annis ejus electionum praecesserat: injuria, quae non fuit illata, sensus apud Religiosum, & Christianum nullus esse debebat; aut si omnino evitari non poterat praefirmitate, ante solis occasum ex praeepto Evangelico extinguere oportebat.* Addit & alia Baronius, quibus magis magisque demonstrat Petri a Valle Clausa virus in Virum fama, eruditione, & integritate conspicuum, quae certe Romae sic spectata semper, probataque fuit, ut Urbanus VIII. eum Sacrae Congregationis Indicis Secretarium instituerit, & Vita functo Magistro Ordinis Praedicatorum Fr. Thoma Turco die 1. Decembris anni MDCXLIX. coactisque extra ordinem ratione anni Jubilaei auctoritate Apostolica ad Successoris electionem Romae generalibus anno MDCL. Comitibus, communibus Electorum suffragiis, ipso probante, laudanteque cum sacro Purpuratorum, & Romanae Aulae Praefulum coetu, Summo Pontifice Innocentio X. die 14. Junii delectus fuerit ejusdem Ordinis Generalis Magister, quem idem Pontifex, dato ad eum Diplomate die 11. Julii ejusdem anni

anni MDCL. quod legitur Tomo VI. Bullarii Dominicani, amplissima facultate ornavit.

IV. Vix ad regimen assumptus, visitationem Ordinis suscepit, uti ex laudato Diplomate addiscimus; munusque suum ea semper animi moderatione, zelo, vigilantia, paternoque gessit annis prope decem & novem solidis affectu, ut ab omnibus non modo suis, sed etiam ab alienis, quique cum eo tractassent aliquando, summopere coleretur, & amaretur. Plura ille in commune totius Ordinis sui bonum, & Disciplinæ Regularis incrementum, atque in Catholicæ Ecclesiæ utilitatem præstitit, præsertim vero postquam supremus electus fuit sui Prædicatorum inclyti Ordinis Præsul; calumniatusque est illum impudentissimus Scriptor Petrus a Valle Clausa, nbi inter alia execranda mendacia, mentionem de litteris facit ab ipso docto æque ac pio Generali Magistro Joanne Baptista de Marinis scriptis in gratiam Jansenistarum ad Dominicanos Theologos Parisienses. Sed & hanc calumniam egregie confutavit Baronius in suo Apologetico Lib. 1. Sectione 1. Articulo 1. §. 1. pag. 32. sic inquit: *Quis enim nesciat, causam Jansenistarum victam opera Patris Nicolai Theologi Parisiensis Dominicani, qui magna, qua voluit nominis auctoritate, reliquos ex Ordine Doctores, & plures alios diversarum Familiarum adjunxit parti, quæ illius aucta copiis & suffragiis, Jansenianis viribus, & numero superior evasis, & hujus rei totam habeo Galliam, & fere Europam consciam, & testem. Quid ergo comministeris Patris Marini Epistolas in gratiam Jansenistarum, quos facto agmine omnes ejus filii impugnarunt? Sed id a te quero, cur sine teste loquaris?* Addit tum alia Baronius, quibus magis magisque ostendit impudentissimi Auctoris odium adversus Ordinem Prædicatorum, & Angelici Doctoris doctrinam, quam ille merito profitetur.

V. Joannis Baptistæ de Marinis summa cum laude nemit Fontana in Monumentis Dominicanis, pag. 656. ubi inter alia ait, sub ejusdem Generalatu Studia Litterarum erectis hinc inde pluribus novis continuorum exercitiorum

Col-

Collegiis, magna fuisse incrementa, & ultra centum Doctorum Patrum eruditas elucubrationes typorum beneficio prodiisse in lucem. Confraternitates Sanctissimi Rosarii, Nominis Jesu, & Augustissimi Sacramenti, studio ac promptitudine singulari usque adeo propagasse, ut in diversis locis hujusmodi pia Sodalitia circiter mille, & septuaginta ipsius auctoritate, & zelo fuisse Canonice instituta. Ipso Ordinem gubernante S. Rosam Limensem a Clemente IX. solemniter in Album Virginum Beatarum relatam fuisse. Addit & alia Fontana, ac tandem docet, Missiones Apostolicas præsertim in partibus Orientis, & Septentrionis indefessa diligentia promovisse semper, ac crebris tum inclitis Litteris, tum subsidiis, ac Ministrorum idoneis supplementis animare satagisse. Eodem tandem teste Fontana anno MDCLXIX. pridie nonas Maji, laboribus, ac ætate fractus, inter Fratrum suorum gemitus, & lacrymas ingenti pietatis exemplo spiritum reddidit Creatori.

C A P. VIII.

De Fr. Raymundo Capisucco Romano, postea bis Magistro Sacri Palatii, & deinde S. R. E. Cardinali.

I. **A**ssumpto ad supremum Prædicatorum Ordinis regimen anno MDCL. Fr. Joanne Baptista de Marinis, elegit mox Innocentius X. in ejus locum in Secretarium Sacræ Congregationis Indicis Patrem Sacræ Theologiæ Magistrum F. Raymundum Capisuccum, nobilem Romanum, Virum summæ pietatis, atque doctrinæ, de quo loquuti sumus in nostro Opere, *De Magistro Sacri Palatii Apostolici*, Lib. II. Cap. LX. & LXII. loquemurque iterum fufius in alio Opere, quod Deo dante propediem edituri sumus in lucem de Summis Pontificibus, & S. R. E. Cardinalibus ex eo Ordine Prædicatorum assumtis, una cum veris eorum imaginibus ære incisis; fuit enim hic Capisuccus non modo Sacri Palatii Magister, sed S. R. E. Cardinalis ab Innocentio XI. die 1. Septembris anno MDCLXXXI. crea-

creatus, uti jam diximus in citato Opere nostro, *De Magistro Sacri Palatii Apostolici*, viderique inter alios potest eruditissimus Bremond in Bullario Ordinis Prædicatorum in Appendice ad Constitutiones laudati Pontificis.

II. Sed ut de tanto Viro, quem ineptus scurra Petrus a Valle Clausa *Caput Cucurbitæ* per ludibrium vocat, aliquid hoc loco dicamus, jam nemo nescit, quod alias notavit doctissimus Vincentius Baronius in suo Apologetico, Lib. v. Sectione ultima, Articulo 11. §. 11. prope finem, Familiam Capisuccorum Romæ pervetustam, atque Heroum feracissimam, Insulis, armis, & Litteris illustrum, qui domi, forisque rem Christianam tutati sunt, Ecclesiæ Romanæ Cardinales, Sedis Apostolicæ Legati, Senatores Romani, Exercituum Præfecti, qui Fidem Catholicam adversus hæreticos in Gallia, adversus Turcas in Hungaria propugnarunt. Hos majores pietate, bello, aliisque bonis artibus celebres sortitus est Raymundus, qui vix exacta pueritia Sacro Prædicatorum Ordini nomen dedit, eaque ubertate solidam doctrinam Angelici Doctoris hausit, ut Philosophiæ, ac Theologiæ Professoris functus officio in alios profuderit, & habile ad præclara quæque ingenium gravioribus negotiis aptarit per viginti fere annos exercitum. Nam primum Vincentii Candidi Magistri Sacri Palatii Socius, deinde a Secretis Sacræ Congregationis Indicis, postmodum examini Episcoporum præfectus, bis ad Sacri Palatii Magisterium, ac tandem ad Cardinalatum promotus, ubique animum integerrimum ab omni ambitu alienum omnibus approbavit, maxime vero Innocentio XI. acerrimi, & æquissimi judicii Pontifici, a quo fuit Cardinalitia dignitate donatus. Quanta vero fuerit doctrina præditus Capisuccus, eximia ejus Opera testantur relata a Viro clarissimo Jacobo Echard Tomo 11. Scriptorum Ordinis Prædicatorum ad annum MDCXCI. pag. 729. & quidem hæc ab eo prodierunt, antequam fuisset ad Cardinalatum promotus.

1. *Controversiæ Theologicæ selectæ Scholasticæ, Morales, Dogmaticæ Scripturales ad mentem D. Thomæ*, in fol.

2. *Ap-*

2. *Appendices ad easdem Controversias Theologicas*, Romæ MDCLXXI. quas omnes deinde a se recognitas, & auctas ibidem edidit anno MDCLXXVIII. in fol.

3. *Vita B. Joannis Chiffi Senensis Ordinis Eremitarum S. Augustini a Patribus ejusdem Ordinis Colonia Agrippina primum scripta, & typis Plantinians edita anno MDCXLI. nunc denuo Romæ aucta, & accuratius prælo expressa*, Romæ anno MDCLV. in 8. *Beata Angela Vita Synopsis, & Breviarum Vitarum nonnullorum Ordinis S. Augustini* adjiciuntur.

4. *Censura, seu votum ad Librum de cultu & veneratione Sanctorum Veteris Testamenti*.

5. *Oratio Panegyrica in laudem S. Thomæ Aquinatis die vii. Martii coram S.R.E. Cardinalium Collegio in Æde S. Mariæ super Minervam ab ipso recitata, & eodem anno Romæ typis edita, & magno Duci Etruriæ nuncupata*.

6. *Discursus de gradu virtutum in Sanctis canonizandis requisito*.

7. *Sacri Sermones in Sacello Pontificio a variis habiti, & a Capisucco collecti, & prælo dati*, Romæ typis Jacobi Dragondelli MDCLXII. in 4.

III. Prodierunt tandem ab eodem Capisucco Purpura donato *Quæstiones Theologicae selectæ Morales & Dogmaticæ*, quibus ad calcem subjecta est *Dissertatio historico-theologica de hæreticis Prædestinationis, & illorum erroribus*, Romæ typis Camerae MDCLXXXIV. in fol. Opus Innocentio X. nuncupatum. Teste Mandosio in Bibliotheca Romana, hæc prælo parata apud ipsum Capisuccum, antequam ad Cardinalatum eveheretur, servabantur Opera.

1. *Tractatus de relatione operum in Deum*.

2. *Disputatio de contritione, & attritione*.

3. *Controversia Theologica ad Sacrum Fidei tribunal spectantes*.

4. *Quæstiones Morales variæ*.

5. *Veritates Theologicae per eartum definitiones explicatæ*.

6. *Tractatus de opinione probabili*.

7. *Historia familiæ Capisuccæ*.

8. *Conciones multæ, quas per 20. annos in Palatio Apostolico pro muneri ratione habuit.*

IV. Itaque doctissimum fuisse Capisuccum; ex relatis Operibus constat, docentque etiam Scriptores, qui de hoc Cardinale, ejusque Operibus scripsere, ridiculusque censendus est Petrus a Valle Clausa, ubi illum per ludibrium *caput cucurbitæ* appellat. Multa in ejusdem Cardinalis laudem videri possunt dicta a nobis in citato Opere, *De Magistro Sacri Palatii Apostolici*, Libro II. Cap. LX. & LXII. ubi ipsum Capisuccum ab injuriis, & calumniis improbi scurræ Petri a Valle Clausa vindicavimus. Plurimi siquidem fecit Capisuccum inter alios Clemens X. & Innocentius XI. a quo, pensatis non tam ejus familiæ insignibus, quam egregiis tanti Viri erga Ecclesiam meritis, die 1. mensis Septembris anni MDCLXXXI. in Sacrum Cardinalium Collegium cooptatus est, ac Presbyter Cardinalis declaratus Tituli primum S. Mariæ de Angelis, quem paulo post in S. Stephani in monte Coelio immutavit.

V. Novem annis, ac septem circiter mensibus ea in dignitate vixit, Innocentio XI. & Alexandro VIII. acceptissimus supremarum omnium Congregationum collega, ac in arduis omnibus Ecclesiæ negotiis occupatus, diem vero tandem obiit suum Dominica in Albis xx. Aprilis anni MDCXCI. Romæ, dum actu in Comitibus essent Cardinales adunati. Capisucci cum laude meminere Auctores varii, quos recenset Echard loco citato. Sed inter alios legendus Fr. Joannes Michael Cavalierius in sua *Galleria &c.* Tomo II pag. 132. & seqq. ubi etiam tradit, coactum fuisse Capisuccum Magisterio Sacri Palatii renunciare, ob editionem scilicet ejus Libri, qui inscriptus est, *Candor Lilii &c.* sed monet mox etiam Cavalierius, suffecto in Capisucci locum F. Hyacintho Libello, quem Alexander Papa VII. summopere diligebat, exiisse per Urbem tunc eam vocem, *non propter librum, sed propter Libellum*, quia scilicet ejus nonnulli erant opinionis, Alexandrum editionis illius Libri occasionem captasse, ut amoto a Sacri Palatii Magisterio Capisucco, in ejus locum Hyacinthum

thum Libellum substitueret. Quicquid sit, fuit certe Capisuccus ab ea culpa immunis, ut se quiores Pontifices satis superque ostenderunt.

VI. Sepulturam elegit Capisuccus in Gentilitio Capisuccorum sepulchro in Ecclesia S. Mariæ in Porticu, sed voluit tamen, ut cor ejus, & viscera in Æde S. Mariæ super Minervam in Sacello S. Dominici conderentur, ut testatur marmorea inscriptio, quæ ante instaurationem ejusdem Sacelli factam a sanctæ memoriæ Benedicto XIII. anno Jubilæi MDCCXXV. prope Altare ipsius Sacelli extabat a parte Epistolæ, & refertur a Viro diligentissimo, Reverendissimo Patre Fr. Antonino Bremond Tomo VIII. Bullarii Dominici, pag. 520. estque hujusmodi.

D. O. M.

RAYMVNDVS TIT. S. MARIÆ ANGELORVM
AD THERMAS

S. R. E. CARDINALIS CAPISVCCVS
ORD. PRÆD.

PIO ERGA SVVM ORDINEM AFFECTV
EX HAC VITA DECEDENS

IN HOC TEMPLO

IN QVO CVM PRIMO RELIGIOSÆ VITÆ SPIRITV

DIDICIT NIHIL HABERE CORDI POTIVS

QVAM PIETATEM

SVA VOLVIT TVMVLARI PRÆCORDIA

OBIIT XX. APRILIS MDCLXXXI.

VII. Sublata hac inscriptione ob novam Sacelli instaurationem, posita non ita pridem fuit alia inscriptio marmoreo lapidi incisa in ipsa Ecclesia S. Mariæ super Minervam, sed extra tamen ipsum Sacellum, estque tenoris, qui sequitur in sequenti pagina. Sed monendus interim Lector, me quidem eo consilio repetere quæ de laudato Capisucco scripsi in Libro, *De Magistro Sacri Palatii Apostoli*, ne videar quempiam cogere sibi prædictum Librum comparare; & ut in hoc præsentis Opere, quod, *De Secretario Sacræ Congregationis Indictis*, inscripsimus, nihil desideretur, quod ejusdem Secretarios spectat.

O 2

D. O. M.

D. O. M.
 RAYMVND O . CAPISVCCO
 PAVLI . MARCHIONIS . PODII CATINI
 ET HORTENSIAE . MARESCOTTAE . F.
 ROMANO . ORD. PRAED.
 PIETATE . DOCTRINA . MVLTISQVE . LIBRIS
 VVLGATIS CLARISSIMO
 S. INDIC. CONGREGATIONIS . A. SECRETIS
 ET . S. PALATII . APOSTOLICI . MAGISTRO
 ALIISQVE . MAGNIS . HONORIBVS . PERFVNCTO
 AB . INNOCENTIO . XI. P. M. AN. MDCLXXXI.
 . IN . COLLEGIVM . S. R. E. CARDINALIVM . ADLECTO
 QVI . SINGVLARI . IN . EOS . CVM . QVIBVS . DIV . VIXIT
 AMORE
 SVA . PRAECORDIA . HIC . CONDI . VOLVIT
 FF. PRAEDICATORES . COENOBII . S. M. S. M.
 OB . EGREGIA . BENEFICIA . IN . SE . CONLATA
 ALVMNO . BENEMERENTI
 M. P. P.
 Sequitur Stemma Ordinis Prædic. & deinde hæc verba .
 VIXIT . ANN. LXXV.
 OBIIT . AN. CHR. MDCXCI. X. KAL. MAIAS

C A P. IX.

*De Fr. Hyacintho Libello Tiphernate, postea Magistro
 Sacri Palatii, ac demum Archiepiscopo Avenionensi.*

I. **C**apifucco ad Sacri Palatii Magisterium assumpto,
 Secretarii Congregationis Indicis munere dona-
 tus est ab Alexandro Papa VII. anno MDCLV. die xxv. Apri-
 lis Fr. Hyacinthus Libellus Typhernus, de quo jam dixi-
 mus in Opere nostro, *De Magistro Sacri Palatii Apostoli-
 ci*, Lib. II. Cap. LXI. Anno ætatis XII. Romæ in Conven-
 tu Minervitano e manibus religiosissimi Viri Fr. Vincentii
 Candidi tum Prioris, de quo diximus in recitato Opere,
 Lib. I. Cap. LIX. habitum induit, & ut acutioris erat ado-
 lescens

lescens ingenii, brevi adeo in studiis profecit, ut XVI. ætatis anno Conclusiones de universa Philosophia publice sustinuerit cum ingenti plausu. Vigesimo quintum annum agens institutus est Prædicator Generalis, Philosophiam Perusii, tum iterum Romæ docuit in Cœnobio Minervitano, ubi etiam Theologiam publice professus, in Comitibus Ordinis generalissimis anno MDCXLIV. coactis Lauream Magisterii pro meritis accepit.

II. Ad superiora deinde Ordinis sui, & Ecclesiæ munera eVectus, Provinciæ Romanæ bis Prior Provincialis fuit & in Collegio *de propaganda Fide* pluribus annis Studiorum Præfectus. Sacræ Indicis Congregationis Secretarius institutus, dici nequit, quanta diligentia & fide munus illud per decem annos exercuerit, ut Acta illius testantur, & Index vetitorum Librorum, qui ab eodem summo studio confectus, ac variis Præfationibus auctus, Alexandri VII. Pontificis Maximi jussu editus fuit Romæ typis Cameræ Apostolicæ anno MDCXLIV. in 4. Teste Fontana in sua Romana Provincia, scripsit Libellus Opus, *De concursu Dei ad operationes liberas*, cujus etiam meminit Echard, Tomo II. Scriptorum Ordinis Prædicatorum ad annum MDCCLXXXIV. pag. 701. col. 1. Est quidem, ut idem ait, Opus ipsum manu exaratum, sed partem tamen eorum recenset, quæ in primam Partem S. Thomæ discipulis suis legebat. Sic enim Caramuel in sua fundamentalis Theologia pag. 30. inquit: *Ut ergo Angelici Doctoris mentem bene intelligas, & ejusdem discipulorum sententias bene capias, proderit legere quæ de hac materia RR. & eximius P. M. Hyacinthus Libelli, Vir eruditissimus, & ingeniosissimus, & inter ceteros Theologos Dominicanos Thomista severissimus Romæ dictavit. Inquiris ergo Dubio 4. Utrum cum scientia futurorum in Decreto Thomistico cohereat libertas humana voluntatis.* Ubi Caramuel ex Libelli scriptis quinque, aut sex columnas refert. Quæ quidem laudati Libelli Tractatum de Attributis magni habitum, & ejus exempla passim distracta, & multiplicata ostendunt.

III. Por-

III. Porro præter Indicem vetitorum Librorum Libelli curis editum, cujus supra meminimus, prodire etiam in lucem Romæ typis Manelphii anno MDCXLIV. *Theses ex cunctis Occumenicis Conciliis, quæ ad Theologiam Scholasticam, Dogmaticam, & Moralem, necnon ad Philosophiam tam speculativam, quam moralem, & historiam pertinent, excerptæ, Urbano VIII. dicatæ in Comitibus generalissimis Ordinis Prædicatorum, pro Romana Provincia propugnatæ a F. Hyacinto Libelli Theologiæ Lectore, ac Prædicatore generali.* His addendum ejusdem *Votum de indemonstrabilitate immortalitatis animorum, scilicet non debuisse prohiberi impressionem thesibus Scholasticæ, quod immortalitas animæ humanæ sit indemonstrabilis lumine naturæ.* Extat Romæ in celeberrima Casanatensi Bibliotheca cum Antonii Naldi tractatibus practicis ad varia Juris Pontificii loca, Romæ MDCXXXI. in 4. Inter Libelli Opera recensetur etiam a laudato Echard, *Catalogus Scriptorum Ordinis summa diligentia accuratus*, cujus meminit Fontana, quemque Abbas Michael Justiniani sibi commendatum, recogniturum se, & editurum promiserat.

IV. Fuit haud dubie Libellus Vir summe doctus, nec in Theologia solum, sed in omni quoque scientiarum genere versatissimus, magnique iccirco habitus ab Alexandro Papa VII. a quo non modo institutus fuit Secretarius Sacræ Congregationis Indicis, verum etiam Magister Sacri Palatii, anno scilicet MDCLXIII. post Capisucci abdicationem, functusque est eo munere ad annum MDCLXXIII. quo Avenionensis Antistes renunciatus, eam Ecclesiam rexit ad annum usque MDCLXXXIV. quibusdam etiam annis Vicelegati ibidem munere functus. Libelli cum laude meminit inter alios Cavalierius in sua *Galleria*, Tomo 1. pag. 645. Num. 169. ubi etiam ait, electum ipsum fuisse Archiepiscopum Avenionensem a laudato Clemente X. die xxx. Januarii prædicti anni MDCLXXIII. Teste Dionysio Sammarthano Tomo 1. Galliæ Christianæ possessionem Ecclesiæ accepit Libellus die xxi. Februarii MDCLXXI. Eo Antistite Clemens ipse X. concessit Canonicis illius Ecclesiæ usum
lineæ

linæ tunicæ brevioris, quæ appellatur Rocchettum, & Cappæ magnæ coloris rubei per totum annum, quam antea in hyeme tantum gestabant a tempore quo Canonici statuti Regularem deseruerunt. Anno MDCLXXIV. transtulit Corpus S. Benedicti, quo auctore pons extructus est super Rhodanum. Post XI. annos & menses VII. obiit Avenione XXI. Octobris MDCLXXXIV. sepultusque fuit in Sacello a se extructo propriis, & magnis sumtibus, dicato Christo Domino resurgenti.

C A P. X.

De Fr. Vincentio Fano Viterbiensi.

I. **P**romoto F. Hyacintho Libello ad Sacri Palatii Magisterium, cui adversa sub Alexandro Papa VII. passus Fr. Raymundus Capisuccus, æmulorum ut iræ locum daret, sponte & grandi animo cesserat anno MDCLXIII. electus fuit ab eodem Alexandro Papa loco Libelli in Secretarium Congregationis Indicis anno MDCLXIV. die 1v. Septembris Fr. Vincentius Fanus Viterbii natus, ibidemque in Conventu S. Mariæ ad gradus Prædicatorum Ordinem professus. Deinceps vero per solitos Scholæ agones Lauream Magisterii adeptus, quæ ipsi concessa fuit in Actis Capituli Generalis sui Ordinis Romæ anno MDCL. habitis. Allectus postea a Magistro Sacri Palatii F. Vincentio Candido in Socium, non exiguam ipsi operam navavit in hujus Officii negotiorum multitudine, uti scribit Echard Tomo II. Scriptorum Ordinis sui Prædicatorum anno MDCLXX. pag. 638.

II. Sed audiamus quid in ms. antiquo Chronico Cœnobii Viterbiensis S. Mariæ ad Gradus a Fr. Hyacintho de Nobilibus ex aliis antiquioribus scripto usque ad annum MDXV. atque a Patribus succedentibus continuato de ipso P. Vincentio Fano habetur: *F. Vincentius Fanus in seculo Petrus, nobilis genere, incunte vix adolescentia Prædicatorum Institutum appetit, & voti compos est factus, anno*

anno namque MDCXXX. *Nonis sextil. per R. Ad P. F. Ignatium Alberici Cœnobii Præsidentem habitum Clericorum induit. Annum tunc agebat tertium supra decimum, quæ ratione factum, ut triennio ferme peractis solemnia in professione vota emitteret xliij. Kal. Jun. MDCXXXIII. R. A. P. Sac. Theol. Mag. F. Thoma Mancino Bledano, tunc Vicario Cœnobii, ut ajunt, in capite. Peractis Religiosi Instituti tyrocinio adeo solertem operam in addiscendis humanis sacrisque litteris adhibuit, ut brevi cursu docendi munus acceperis, in quo mirum est, quantum & suo, & aliorum profectui studuerit. Quadragesimo ætatis anno vix expleto Præses in Cœnobio Gradenſi electus Fratres suos per biennium tanta sui nominis laude rexit, ut æternum perseveret: grassante namque ferme per cunctas Italiæ Urbes dirissima lue, atque hoc Cœnobio ad ægrotantium curam Xenodochio conscripto, recedentibus in diversa Fratribus ad tantam declinandam calamitatem, solus Vincencius Fanus ibidem stetit imperterritus, diu noctuque sacris exhortationibus ægrotantium firmabat animos, atque ceteris Ecclesiæ Sacramentis, & virtutum omnium exemplo ita reficiebat, ut omnibus omnia factus, animam pro suis proximis velle ponere videretur.*

III. Pergit Auctor continuationis prædicti Chronici, aitque, Fani religiosæ vitæ exercitationibus, atque eximie sapientiæ fama permotum Alexandrum Papam VII. acceptissimum illum habuisse, ejusque studio, & diligentia copiosissimi Indicis editionem commisisse. Ait præterea, ab eodem Pontifice Romam accersitum Fanum, motu proprio Sacræ Theologiæ Magistrum ultra numerum declaratum fuisse, quum eo tempore viginti tantum essent in Romana Provincia Magistri; deinde vero adlectum fuisse Sacræ Congregationis Indicis Secretarium. Porro die IV. Septembris anni MDCLXIV. ut dictum est, a laudato Alexandro fuisse Fanum eo honore insignitum, testatur memoratus Libellus in Actis Sacræ Congregationis Indicis a se exaratis, pag. 256. ubi ad annum MDCLXIV. sic inter alia scripsit: *Feria quinta, die quarta Septembris MDCLXV.*

(le-

(legendum MDCLXIV.) *Osculatus sum pedes Sanctissimi, eique gratias reddidi, quod me fecerit Magistrum Sacri Palatii Apostolici, traditumque mihi fuerit Breve expeditum 3. hujus. Tum vero ita statim subjicit: Sanctissimus Dominus mandavit primo publicari, se novum Secretarium Congregationis instituisse, eumque esse Reverendum admodum P. Magistrum Fratrem Vincentium Fanum Viterbiensem nostri Ordinis, Filium Conventus S. Mariæ ad Gradus de Viterbio, mihi que jussit, ut ad eum scriberem, ut quamcitus Romam veniat, ni tamen calores nondum exactos pertimuerit. Mandatum Pontificis ubi accipit Fanus, statim Viterbio profectum Romam fuisse, testantur eadem Acta, pag. 260. ubi ita legitur: Incipiunt Acta Sacræ Indicis Congregationis Patre Magistro Fratre Vincentio Fano Secretario, qui die iv. Septemb. MDCLXIV. declaratus fuit a Sanctissimo Domino nostro Alexandro VII. Secretarius hujus Sacræ Congregationis. Cumque ad præfatum P. Vincentium Fanum ex ordine Sanctissimi scripsisset Reverendissimus Pater Magister Frater Hiacinthus Libellus, ut statim Romam peteret, obtemperans Sanctissimi Domini nostri mandato, die vi. ejusdem mensis, & anni fuit Romæ.*

IV. Post hæc, ut in eisdem Actis legitur, citata pag. 260. idem Fanus, qui certe hæc scripsit, die viij. Nativitatis Sanctissimæ Deiparæ sacra accessit ad beatorum oscula pedum, & a Sanctitate sua benignissime acceptus est. Tum mox: Die xii. ejusdem mensis, & anni Reverendissimus Pater Magister Frater Hiacinthus Libellus discessit e Conventu Minervæ Palatium Apostolicum dein habitaturus, Patrique Secretario claves camerarum, quas habitaverat, consignavit. Tandem vero ita Scriptor subdit: Die xvii. ejusdem mensis obtinuit Pater Secretarius solitum Breve pro Indicis Secretaria, & alterum, in quo Sanctitas sua concedit locum Patri Secretario immediate post Ordinis Generalem Procuratorem tam in Choro, quam in Refectorio, & reliquis locis, & functionibus, sicut concessum fuerat suis Prædecessoribus Reverendissimo Ca-

pisucco, & Reverendissimo Libello. Videri possunt memoratorum Brevium formulæ supra Lib. 1. Cap. xix. & xx.

V. Secretarium Congregationis Indicis agente Fanotum ab eo typis datus est, novaque forma, nempe alphabetica non servata, quæ alias, classium distinctione, Index Librorum prohibitorum Romæ ex typographia Vaticana anno MDCLXV. in 8. iterumque ibidem auctus anno MDCLXX. etiam in 8. Cæterum, ut ex Regesto Sacræ Congregationis Indicis habetur, cum die II. Julii MDCLXXII. Idem Fanus *humiliter supplicaverit Santissimo Domino Nostro Clementi Papæ X. ut posset dimittere munus Secretarii, Sanctissimus benigne annuit, & nihilominus concessit, ac voluit, ut omnibus deinceps grâtiis, ac privilegiis gauderet, quibus potiri solent Secretarii, tam quoad locum in ordine, quam quoad socium, & remaneret cum prerogativa Familiaris Sedis Apostolicæ, ac si Officio Secretarii adhuc fungeretur.*

C A P. XI.

De Fr. Thoma Camotto Pedemontano.

RELICTO, & quidem sponte, anno MDCLXXII. ut præcedenti Capite dictum est, a Fr. Vincentio Fano Secretarii Congregationis Indicis munere, suffectus mox in ejus est locum a Clemente Papæ X. eodem anno die VI. Julii, Pater Magister Fr. Thomas Camottus Pedemontanus Minervitani Cœnobii alumnus, ubi peractis Philosophiæ, & Theologiæ studiis, Philosophiam ibidem multos per annos legit, officium Magistri studentium, ut ajunt, exercuit, publicas theses in Capitulo generali Ordinis sui propugnavit, & Verbum Dei in præcipuis Ecclesiis multorum annorum spatio, summo audientium plausu prædicavit. Horum meritorum intuitu primo Prædicator Generalis cum suffragio perpetuo in Capitulis provincialibus institutus est, tum Magisterii in Sacra Theologia gradu in Capitulo Generali Ordinis anno MDCLXIV. celebrato decor-

coratus fuit, & Inquisitor Generalis contra hæreticam pravitatem Augustæ Taurinorum auctoritate Apostolica deputatus, per tredecim annos in eo munere strenue laboravit. Tandem a Clemente X. die vi. Julii anno MDCLXXII. Secretarius Sacræ Congregationis Indicis institutus, munus illud per quatuor annos summa fide ac diligentia exercuit, obiitque Romæ die xix. Maji anno MDCLXXVI.

II. Porro quum Secretarii Indicis munere fungeretur Camottus, ut ipse testatur in Actis Congregationis Indicis die xix. mensis Decembris MDCLXXIII. obtinuit a Clemente X. *Breve in favorem Regularium inservientium eidem Congregationi in Officio Consultorum; virtute cujus Brevis corroboratur, & confirmatur Decretum olim emanatum ab Alexandro VII. in favorem eorundem Consultorum, quo Decreto ordinatum fuerat, quod Superiores Regulares non possent removere ab Urbe Consultores hujus Congregationis, nisi eorum potestati alias subiectos, absque licentia expressa ejusdem Congregationis.* Docent mox eadem Acta, ea re audita, Eminentissimos Patres commendasse diligentiam prædicti Secretarii, cui imposuerunt, ut omnia in dicto Brevis contenta executioni demandari sagat, nec permittat eisdem Consultoribus ab Urbe discedere, extra illam diu commoraturi, etiamsi non invitati, sed sponte hoc facere velint, absque eo quod prius petant, & obtineant licentiam ab eadem Congregatione. Sed de hac re extat novum Decretum editum a sanctæ memoriæ Benedicto Papa XIII. quod nos supra Lib. I. descripsimus, Cap. xvi. quod quidem multa continet, quæ ipsos Consultores Sacræ Congregationis Indicis spectat, ac Privilegia eisdem a superioribus Pontificibus concessa.

III. Doctrina æque ac prudentia eximia præditum fuisse Camottum, eadem Acta nos docent, nam cum nova instauranda esset editio Indicis Librorum vetitorum, Cardinales Congregationis eidem hanc provinciam dederunt, ejusque consilium probarunt, omittendi scilicet in hac editione trinam illam classium distinctionem, quæ jam in postremis editionibus prætermissa fuerat tanquam inutilis.

C A P. XII.

*De Fr. Jacobo Riccio Romano, postea Procuratore
Generali Ordinis Prædicatorum.*

I. **V**Ita functo Fr. Thoma Camotto die xix. Maji anni MDCLXXVI. Clemens X. die xxi. Maji ejusdem anni Secretarium Congregationis Indicis creavit P. Magistrum F. Jacobum Riccium nobilem Romanum, ac Virum pietate, doctrina, disciplina Regulari, rerum agenda- rum peritia, morumque suavitate commendatissimum. Docendi munere diu recteque perfunctus, & Magisterii laurea a Reverendissimo Patre Joanne Baptista de Marinis Generali Ordinis Præfule decoratus, Examiner Cleri in Urbe a Cardinali Genetto Urbis Vicario designatus est anno MDCLXVIII. Tum rogante Francisco Cardinale Barberino, ab eodem Generali Magistro jussus est Theologiam tradere juvenibus Clericis Congregationis Oratorii Sanctæ Mariæ in Vallicella, quod quidem naviter, & egregie præstitit, eandemque Congregationem eximio semper studio profectus est. Viget & hodie hic mos, ut ipsius Oratorii adolescentes Sacram Theologiam Dominicanus Lector doceat ab Ordinis Magistro electus.

II. Teste Jacobo Echard Tomo II. Scriptorum Ordinis Prædicatorum anno MDCCIII. pag. 762. *electus Romane sue Provincia Prior Provincialis auctoritate Summi Pontificis Innocentii XI. quadriennium contra morem istud Officium gessit ab anno MDCLXXIX. ad MDCLXXXIII.* Ad- dit tum etiam laudatus Auctor, anno demum MDCLXXXIV. Procuratorem Generalem Ordinis in Aula Romæ a Magistro Ordinis Antonio de Monroy positum fuisse memora- tum Riccium, in eaque provincia mortuum esse anno MDCCIII. Sed forte labitur Echard, legi etenim in ms. Co- dice, qui Secretarios Congregationis Indicis recenset, creatum fuisse Riccium Procuratorem Ordinis sui Gene- ralem a laudato sanctæ memoriæ Pontifice Innocentio XI. per Pontificium Breve datum die xxi. mensis Aprilis anno MDCLXXXIV.

MDCLXXXIV. Promoto siquidem ad Metropolitanam Ecclesiam Barensem Fr. Thoma Maria Ruffo Neapolitano, qui Procurator erat Generalis memorati Ordinis, laudatus Innocentius Riccium in illius locum & munus motu proprio, ut ajunt, constituit, ac suffecit. Annis xvi. publici Theologiae Professoris munus in Romana Sapiientia per se ipsum exercuit, tandemque ætate, ac laboribus confectus, Vir candidi & antiqui moris, simplicitatis Evangelicæ, ac severioris observantiæ amantissimus, magna cum opinione virtutis Romæ decessit in Coenobio Minervitano, cujus erat filius, anno MDCCIII. die ix. mensis Augusti.

III. Fuit Riccius Vir summæ pietatis, eumque inter alios laudat Cavalierius in sua *Galleria* ob recusatum ab eo Episcopatum Vigiliensem in Apulia, quem illi ultro obtulerat anno MDCLXIV. Alexander Papa VII. Procuratoris Generalis officio fungens, cum Fratres Ordinis sui Prædicatorum, qui in suis Conventibus juxta antiquam ejusdem Ordinis consuetudinem plures campanas habebant, litibus, atque contentionibus vexarentur, & in variis mundi partibus ad varia Tribunalia distraherentur, Pontificium Diploma a laudato Innocentio XI. obtinuit, quo plures campanas in Ecclesiis Fratrum Prædicatorum esse posse declaravit. Datum est Breve die xii. mensis Februarii anno MDCLXXXI. legiturque in Bullario Dominicano Tom. vi. pag. 367. & seq. Varia Riccii Opera recensent Cavalierius citato loco, Prosper Mandosius in Bibliotheca Romana, & Oldoinus in Athenæo Romano. Teste clarissimo Jacobo Echard hæc ejus Opera.

1. *Vita di S. Filippo Neri Fiorentino Fondatore della Congregazione dell'Oratorio, scritta già dal P. Pietro Bacci, hor' accresciuta di molti fatti, e delli dell'istesso Santo, con l'aggiunta d'una breve notizia di alcuni suoi Compagni*, Romæ MDLXXI. in 4. Laudant & hanc Vitam Editores Actorum Sanctorum Tomo vi. Maji ad diem xxvi.

2. *Epitome singularium gestorum S. Ludovici Bertrandi Valentini Ordinis Prædicatorum*, suppresso nomine Auctoris, Romæ MDCLXXI. in 4.

3. Bre-

3. *Brevis instructio pro iis, qui promovendi sunt ad animarum curam ex jure Canonico, Concilio Tridentino, Catechismo, Rituali Romano, D. Thoma, & præcipue antiquioribus Theologis.* Opus exaratum prælo paratum ms. vidit memoratus Mandosius apud Auctorem.

4. *Index Librorum prohibitorum auctior, & accuratior.* Romæ typis Camera MDCLXXXI. in 8.

IV. Quanta diligentia Indicem ipsum exaraverit Riccius, jam ipse satis declaravit in Præfatione sua ad Lectorem, ubi ita ait: *Cum Librorum prohibitorum numerus Auctorum, id exigente malitia, vel negligentia, multum excreverit, visum est novum Indicem edere auctiorem, & accuratiorem; quoniam nimirum Libri omnes hucusque confixi & vetiti contineantur, & facta collatione cum Apostolicis Decretis, Auctorum ipsis vera nomina, vel cognomina pluribus in locis restituuntur. Quæ Deo dante, non levi labore præstitimus. Nunc vero Sanctissimi Nostri Papæ Innocentii XI. jussu Indicem absolutum damus; hoc tantummodo monentes, Auctoribus primæ Classis, qui, aut hæretici, aut hæresis nota suspecti fuerunt, eorumque scripta non edita solum, sed etiam edenda interdiciuntur; notam primæ Classis apponi tuæ, Lector, commoditati, studiosis quoque multis idem operantibus. Vale.*

C A P. XIII.

De P. Julio Maria Bianchi Veneto.

I. **P**romoto in Generalem Ordinis sui Procuratorem P. Jacobo Riccio, creatus est mox ab Innocentio Papa XI. anno MDCLXXXIV. die xv. Aprilis Pater Magister F. Julius Maria Bianchi ex prænobili in Regno Boxinæ Familia, quæ a Turcis capto eodem Regno Venetias migravit, Patre Veneto, qui apud Poloniæ Regem pro Serenissima Venetorum Republica Consulem agebat, Cracoviæ natus est, uti nos docent mss. monumenta illius Familix, quæ in Cœnobio Minervitano servantur, non vero Ve-

Venetis, ut scribit Echard Tomo II. Scriptorum sui Ordinis anno MDCCL. pag. 776. Adolescens in Cœnobio Sanctorum Joannis & Pauli Ordinem Prædicatorum professus, in Hispaniam studiorum causa missus est, ut ejus Vitæ seriem enarrat Echard loco citato. Ergo Salmantica, & Compluti exactis Philosophiæ, Theologiæque studiis, nondum in Sacris constitutus, a Magistro Ordinis datus est Magister artium, quas triennium docuit.

II. Ad suos reversus Venetos, tale dedit eruditionis apud Hispanos a se comparatæ specimen, ut a Superioribus selectus fuerit, qui Romæ in Comitibus Ordinis generalibus anni MDCCL. pro sua Venetiarum Provincia universæ doctrinæ Thomisticæ conclusiones propugnaret. Id vero cum egregie præstitisset, nondum trigésimum ætatis suæ annum assequutus, Magister promotus est, & Neapolitani S. Thomæ Gymnasii Regens institutus. At ob grassantem tum in Regno pestem, eo accedere prohibitus, Romam revocatus est, ubi in Cœnobio Minervitano Baccalaureum egit octennium solidum. Hinc Summis Pontificibus gratus & acceptus, ab eisdem familiaris adscitus est, ac Sacrarum Congregationum Consultor positus, a Clemente IX. Congregationis Indicis, a Clemente X. Sacrorum Rituum, & Reliquiarum, ac Indulgentiarum, ab Innocentio XI. Sapientiæ, quæ Gymnasium est Romanum publicum, Professor; de quo, sicut & de aliis multis ex inclyto Prædicatorum Ordine insignibus Theologis ad ipsius Universitatis Cathedras promotis fusc & erudite disserit Amicus noster Vir Clarissimus Josephus Carafa in celebri Opere a nullo hætenus tentato, quod inscripsit, *De Gymnasio Romano ab Urbe condita ad hæc usque tempora*, ubi varios ejusdem Professores recenset, quodque nos, mandante Reverendissimo Patre Sacri Palatii Apostolici Magistro, atente legimus, probavimusque.

III. Denique post recusatos pluries Episcopatus sibi a Summis Pontificibus Alexandro VII. & Innocentio XI. oblatos, ab eorum altero Secretarius Sacræ Congregationis Indicis Jacobo Riccio Procuratori Ordinis Generali in-

instituto suffectus est anno MDCLXXXIV. eoque munere cum summa omnium approbatione functus est ad mortem usque, quam longævus venientem latus aspexit anno MDCCVII. non vero MDCCX. uti per errorem scripsit Echard loco citato: Videri & de eodem potest Cavalierius in *Galleria Tomo 11. pag. 142. Num. 25.* ubi inter alia Episcopatum ab ipso recusatorum mentionem facit. Obiter dicam hoc loco, tametsi multi apud Scriptores recenseantur Antistites ex Ordine Prædicatorum assumti, longe plures eos numero esse, qui sibi oblatos Episcopatus præ humilitate constantissime recusarunt, ut vel hinc addiscere liceat, quam alienus ab ambitu sit laudatus Ordo Prædicatorum.

C A P. XIV.

De *F. Gregorio Selleri Perusino, postea Sacri Palatii Magistro, & deinde S. R. E. Cardinali.*

I. **D**Efuncto in bona senectute anno MDCCVII. Julio Maria Bianchi, eodem anno die xii. Februarii institutus est Secretarius Sacræ Congregationis Indicis a Clemente Papa XI. Pater Magister F. Gregorius Selleri. Eximias Religiosissimi hujus Viri dotes expertus laudatus Pontifex, illum dum in Cœnobio Minervitano Catedratici Casanatensis munereungebatur, Sacræ Congregationis Indicis Secretarium instituit, ac deinde anno MDCCXI. Sacri Palatii Magistrum renunciavit, quodque majoris æstimationis indicium est, eundem conscientia suæ Rectorem sibi adscivit, & usque ad extremam vitæ suæ periodum habere voluit, ut jam notavimus in Opere nostro, *De Magistro Sacri Palatii Apostolici*, Lib. 11. Cap. LXVI. ex quo lubet & alia describere, ne quid in præsentī Opere desideretur de eodem Virō, qui Sacræ Indicis Congregationis Secretarius fuit.

III. Scripsit Gregorius varios Tomos in celeberrimam Constitutionem, *Unigenitus*, quam laudatus Pontifex edidit; tum vero tandem, ut notavit doctissimus Bre-

Bre-

Bremond Tomo vi. Bullarii Dominicani in Appendice ad Constitutiones Benedicti Papæ XIII. pag. 704. ab eodem Pontifice *ex Magistro Sacri Palatii Apostolici S.R.E. Cardinalis Tituli S. Augustini renunciatus est die xxx. Aprilis MDCCXXVII. Unus fuit ex illis septem, quos Summus Pontifex in pectore reservaverat anno MDCCXXVI. die ix. Decembris.* Legenda apud eundem Bremond Concio a memorato Pontifice habita in Consistorio secreto, ubi septem ipsos Cardinales creavit, sed operæ pretium duxi encyclicam epistolam describere, quam de ejus obitu scripsit ad universum Prædicatorum Ordinem Reverendissimus Pater Fr. Thomas Ripoll ejusdem Ordinis Generalis Magister, in qua in compendio virtutes, ac gesta insignia ipsius Cardinalis recenset, qui quidem, ut idem laudatus Bremond citato loco pag. 705. adnotavit, *mortuus est anno MDCCXXIX. die xxxi. Maii, hora iv. hinc in ipsius Epitaphio, quod nos inferius referemus, mortuus dicitur die xxx. Maii.* Cæterum memorata encyclica Epistola est hujus tenoris.

In Dei Filio sibi dilectis R.R. Patribus, ac Fratribus Ordinis Prædicatorum Fr. Thomas Ripoll Sacræ Theologiæ Professor, ac ejusdem totius Ordinis Prædicatorum humilis Magister Generalis, & Servus.

Salutem, pias lacrymas,

& salutare mortis recordationem.

Ingentem dolorem, quem vos nobiscum suscepisse non dubitamus, ubi primum, vel ipso rumore publico nunciante, Eminentissimum, ac Reverendissimum S.R.E. Presbyterum Cardinalem Fratrem Gregorium Selli decessisse audivistis, acerbius hodie renovare cogimur, Fratres in Christo dilectissimi, cum hanc ipsum luctuosissimum nuncium vobis per præsentem de more communicamus. Nec sane parum nobis dolendum est, quod talem ac tantum amiserimus Virum, qui suarum fulgere virtutum, universum Ordinem nostrum, quem professus fuerat, feliciter illustrabat, quodque lucernam istam splendidissimam anno proxime præterito super Candelabrum, ut omnibus præluce-

Q

ret,

ret, collatam, tam brevi tempore, & nimia profecto celeritate penitus extinctam suspiciamus. Novissis vos, noverunt omnes, quibus ipse dotibus ornabatur, qua pietate, qua doctrina, qua denique humanitate præfulgebat. Eximias has Religiosissimi Viri dotes, quibus omnium animos, & corda in sui amorem, ac venerationem rapiebat, satis superque perspectas, longoque experimento probatas habuit Sanctissimus D. felicitis recordationis Clemens Papa XI. quomobrem iisdem permotus, illum, dum in hoc nostro Conventu S. Mariæ super Minervam Cathedralici Casanatensis munere summa cum laude fungebatur, Sacræ Congregationis Indicis Secretarium instituit. Dein vero Sacri Palatii Apostolici Magistrum renunciavit, quodque majoris æstimationis indicium est, eundem conscientie Rectorem sibi adscivit, & usque ad extremam vitæ suæ periodum habere voluit. In his omnibus, & quidem gravibus muneribus, quæ per plures annos laudabiliter exercuit, pulcherrima semper iustitiæ, prudentiæ, & dexteritatis præbuit argumenta, dignitatem cum modestia, benignitatem cum æquitate ita conjungens, ut ad omnem virtutis rationem efformatus videretur. Tot itaque meritis cumulatam, atque omnium sermone celebratum SS. D. N. Benedictus XIII. Ordinis nostri, quem proficitur, amantissimus, Sacro Cardinalium Collegio cooptavit, ut scilicet virtutes ejus in eminentiori loco constitutæ clarius eniterent. Verum invida mors nobis eum statim eripuit, & quidem dum plures adhuc annos victurum, prout in votis erat, pro certo haberemus. Nondum siquidem expleto anno, quo palam evulgatus, & declaratus fuerat Cardinalis, gravi morbo correptus, eodemque per duos integros menses vexatus, perceptis Ecclesiæ Sacramentis, tota mærente Urbe, animam Deo reddidit die trigesima Maji proxime elapsi, annos natus septuaginta quatuor, menses decem, dies decem, & novem.

Gravissimam hanc nostri Ordinis jacturam impensissime descendam esse, nemo non agnoscit, Fratres dilectissimi. Verum quia juxta monitum Apostoli, non debemus contristari de

de dormientibus, sicut & ceteri, qui spem non habent, ea consideratione mæror noster levandus est, qua Cælo donatum esse speremus. Id profecto sperare nos jubet defuncti Cardinalis pietas, ac morum integritas, quam nulla seræ posteritatis exstinguet oblivio; jubet mira ejus constantia, qua tanta morbi acerbitate, & ætuturnitate affictus serena fronte mortem adspexit; jubet denique heroicus illius verum omnium humanarum contemptus, quem jam mortî proximus nobis explicuit, dum verba illa Job sapius repetens, Nudus egressus sum de utero matris meæ, & nudus revertar, professionis suæ non immemor, quidquid domesticæ suppellectilis reliquum esse posset, totum arbitrio nostro disponendum commisit. Quamvis autem fiduciam hanc maximam nobis faciant tot egregiæ virtutes, quas ipse dum viveret diligenter excolere non prætermisit, nihilominus si qua adhuc superesset macula piacularibus flammis eluenda, æquum est, ut suffragiis nostris eidem æterna gaudia quantocius comparemus.

II. Hinc mox mandat omnibus & singulis Conventuum Superioribus, ut pro ipso Cardinale defuncto solemnes exequias cum Missa, & Officio Defunctorum absque cunctatione persolvant; & insuper, ut per universum Ordinem quilibet Sacerdos pro ejusdem animæ unam Missam celebrare, ceteri vero Fratres unam partem Rosarii recitare teneantur; id quod etiam Monialibus curæ suæ subiectis injungit. Est plane antiquus, & laudabilis mos in Ordine Prædicatorum servatus, ut Generales ejusdem Magistri non modo obitum illustrium Religiosorum, & summorum Principum de ipso Ordine optime meritorum subditis nuncient, verum & alia, quæ decorem Religionis spectant. Sed his omisissis, legitur ipsa encyclica Epistola de obitu Religiosissimi S.R.E. Cardinalis Selli in citato Bullario pag. 704. & seqq. ubi etiam Auctor notat sepultum ipsum Cardinalem Selli in Choro Cœnobii S. Mariæ supra Minervam, ubi hoc Epitaphium extat marmoreo lapidi incisum, quod & nos, ut de aliis fecimus, nostra manu descripsimus, estque hujusmodi.

D. O. M.

FR. GREGORII SELLERI PERVSINI ORD. PRÆD.

CASANATENSIS CATHREDATICI

SAC. CONGR. INDICIS SECRETARII

PALATII APOSTOLICI MAGISTRI

CLEMENTI XI. A CONFESSIONIBVS

INNOCENTIO XIII. ACCEPTISSIMI

BENEDICTO XIII.

EIVSDEM ORDINIS PROMOVENTE

TIT. S. AVGVSTINI PRÆSBYTERI CARDINALIS

MORIBVS ET DOCTRINA SPECTABILIS

CINERIBVS

RESSVRRECTIONEM FVTVRAM IVSTORVM

EXSPECTANTIBVS

PATRES CONVENTVS S. DOMINICI DE PERVSIO

MOERENTES ET GRATI PP.

VIXIT ANN. LXXIV. NENS. X. DI. XIX.

OBIIT XXX. MAII MDCCXXIX.

C A P. XV.

*De Fr. Augustino Pipia Sardo, postea Magistro Generali
Ordinis Prædicatorum, & deinde S.R.E. Cardinali.*

I. **A**D Magisterium Sacri Palatii evecto Fratre Gregorio Selleri anno MDCCXI. a Clemente Papa XI. ab eodem Pontifice in Secretarii Indicis locum, quo Gregorius fungebatur, successus est eodem anno die XII. Maji Fr. Augustinus Pipia natione Sardu, Alumnus Majoricensis Coenobii, de quo sic, ubi obiit, inter alia scripsit in sua encyclica Epistola ad universum Ordinem Generalis ejusdem Magister Fr. Thomas Ripoll: *Effulserat quidem probitate morum, & doctrina præstantia Vir iste omni seculo commendabilis, dum primo Regens fuerat hujus nostri Collegii Minervitani, postea Theologus Casanatensis, deinde Sacræ Congregationis Indicis Secretarius, postremo totius Ordinis Magister Generalis. In obseundis namque hu-*

*hujusmodi muneribus non modicam sibi, Provinciæ suæ Aragoniæ, atque universo Ordini gloriam comparavit. Certe summa illa fuit Pipiæ gloria, quum, dum esset Collegii Casanatensis Theologus, a Clemente XI. Pontifice sapientissimo delectus fuit inter cæteros Viros doctrina præstantes, ut denunciatas ab Episcopis Galliarum centum & unam propositiones Paschali Quæsnelli ad examen vocaret, in easque censuram Theologicam ferret, quod ille præstitit summa fide, doctrina, & diligentia, meruitque idcirco, ut ab eodem Pontifice ad Secretarii Congregationis Indicis munus assumeretur. Ejus quoque judicio subjectum fuit insigne Opus Theologicum P. Le Fontaine Societatis Jesu in Constitutionem *Unigenitus*, ut constat ex ipsius approbatione, & censura eidem Operi præfixa, dum Secretarii Indicis munere fungeretur.*

II. Ex Secretario Indicis promotus Pipia ad supremum sui Ordinis Magisterium, summo zelo, ac prudentia Ordinem rexit, justitiæque cultor eximius, illos dumtaxat ad ejusdem Ordinis gradus promovit, qui vere docti erant, adeoque in eam rem rigidus fuit, ut etiam qui doctrina pollerent, examini, cui ille præerat, se se exponere timerent. Multos novi, qui, licet diu in Cœnobiis insignioribus magno cum plausu Theologiam docuissent, noluerint tamen Romam venire, & examen pro obtinendis gradibus subire. Regulares Ordines, ac præsertim inclitam Societatem Jesu dilexit semper Pipia quamaxime, curavitque diligentissime, decessorum suorum morem sequutus, ne inter sui Ordinis, ac ipsius Societatis alumnos ulla esset dissensio, aut discordiæ occasio. Atque hanc regulam tenuit S. Ignatius Jesuitarum Parens amplissimus, quippe qui, ut scribit elegantissimus Maffei in illius Vita Lib. 111. Cap. 1x. *pacem & concordiam (quoad officium, & Dei gloriam pateretur) non modo cum suis, verum etiam cum alienis omni cura studioque retinuit semper, & cavuit, ne, aut per se, aut per suos factis dictove quemquam offenderet.* Dignum plane notatu est illud quod mox idem Maffei subdit: *Cum Martinus Olavius, inquit, qui* Col-

Collegio Romano annos aliquot magna cum laude præfuit, excellenti Vir ingenio, doctrinaque, thesæ aliquot de more proposuisset, in quibus erat caput de Immaculato, ut appellant, Conceptu Beatæ Virginis, licet ea de re Ignatius pro sua egregia in Deum, & Virginem pietate minime dubitaret, tamen ne Fratres Dominicani, qui ad disputationem invitabantur, id egre ferrent, seque nominati provocari putarent (contrariam enim sententiam auctore D. Thoma tuerentur eorum plerique) eam thesæ, quamquam ingemiscente Olavio, induci, tollique omnino imperavit.

III. Sed ut ad Pipiam redeamus, felix certe fuit illius fors, ubi in supremo Ordinis Prædicatorum Magisterio constitutus vidit unum ex alumnis ejusdem Ordinis Fr. Vincentium Mariam Cardinalem Ursinum ad Summi Pontificatus apicem evectum, qui fuit Benedictus XIII. qui etiam tanti fecit Pipiam, ut suis ad omnes Fratres Ordinis Prædicatorum datis Litteris die vi. mensis Novembris anno MDCCXXIV. adversus calumnias Doctrinæ SS. Augustini, & Thomæ perperam intentatas, quæ legi possunt Tomo vi. Bullarii Dominicani, pag. 545. & seq. Augustinum Pipiam Ordinis Prædicatorum Magistrum Generalem appellavit *religiosæ vitæ exemplis, ac doctrina, prudentiaque commendatissimum*. Sed audienda potissimum est ejusdem Pontificis Alloquutio ad Cardinales, ubi xx. Decembris anno MDCCXXIV. laudatum Pipiam ad Cardinalatum promovit: *Æquum insuper censemus, inquit, Venerabiles Fratres, ut Ordini Fratrum Prædicatorum de Apostolica Sede, & Catholica Fide luculentissime merito, quem non expresse, Domino miserante, professi sumus, gratum etiam animum congruo aliquo Pontificiæ largitatis argumento exhibeamus. Cum enim ipsi tantum sacræ Religioni ut alias ingenuè vobis restati sumus, acceptam referamus Cardinalatus dignitatem, quia nullis nostris, sed præclaræ Matris ornati meritis, & vestibis decorati fuimus restitutioni quodammodo jure obstricti, prædictæ Religioni Magistrum Generalem eadem dignitate donare cogitamus*

mus

mus: vestro quoque decori prospicere hoc pacto existimantes ut scilicet qui præclarum hunc, ac sublimem obtinebit locum, eum vestro gradui, meritum splendore, scientiarum præsertim Theologicarum condimento, ac religiosarum virtutum odore conciliet honorem, quem defectuum nostrorum multitudine a planta pedis usque ad verticem capitis operiri tribuere non potuimus; imo, utinam verum non loqueremur, nimium obscuravimus. Ad maiorem &c. Hactenus Benedicti XIII. Pontificis Maximi Alloquutio ad Cardinales, ubi Pipiam ipsorum Collegio cooptavit, in qua non modo Pipiæ doctrina, aliæque religiosæ virtutes elucet, verum etiam summa laudati Pontificis humilitas, qui quum esset omnium virtutum genere præditus, & Sacro Cardinalium Collegio multum decoris, & ornamenti attulisset, asserere palam omnibus voluit, se eam dignitatem obscurasse, quam alias reluctans, & Pontificio Clementis X. præcepto adactus suscepit. Quamobrem de eodem Benedicto XIII. qui & ad ipsum Summi Pontificatus apicem præ humilitate, quam & in ipso Pontificatu semper retinuit, & variis argumentis notam omnibus fecit, reluctans evehctus est, dici illud elogium potest, quod legitur apud Claudianum Poetam his versibus.

. Cui se Purpura supplex
Obtulit, & solus meruit regnare rogatus.

IV. Eximias Augustini Pipiæ virtutes tunc potissimum emicare cœpisse, cum a laudato Pontifice Benedicto XIII. in eminenti loco constitutæ fuerunt, notavit jam in memorata encyclica epistola, quam de illius obitu ad universum Prædicatorum Ordinem scripsit, religiosus Generalis ejusdem Magister Fr. Thomas Ripoll, sic inter alia de eo inquit: *Sacro Cardinalium Collegio cooptatus, mirum est, quanto in pretio fuerit apud omnes, & quam merito ab omnibus amaretur. Honesti, relique tenax, atque animum gerens a qualibet assentatione alienissimum, sive in ferendis judiciis, sive in tractandis gravioribus Sanctæ Sedis negotiis, quanto polleret ingenio, dexteritate, atque prudentia, quantoque arderet zelo justitiæ,*

non obscuris indicis comprobavit. Carus proinde, & acceptissimus summis æque, ac infimis, ab omnibus uno ore commendabatur. Porro, ut alios omittam, plurimi Cardinalem Pipiam fecit sapientissimus Sardinæ Rex, qui eidem, quod summa prudentia, & fide, atque integritate præditus esset, ardua Regni sui negotia apud Apostolicam Sedem tractanda commisit. Multum ei debet Ordo Prædicatorum, cujus aliquando, uti superius dictum est, supremus Moderator fuit. Ipse etenim Litteras Apostolicas a Benedicto XIII. Pontifice obtinuit in commendationem Doctrinæ duorum insignium Ecclesiæ Doctorum Augustini & Thomæ Aquinatis adversus calumnias malevolorum, qui prætextu confodiendi Janfenianos errores, Doctrinam ipsam perperam convellebant.

V. Obiit tandem Pipia die XXI. Mensis Februarii anno MDCCXXX. vixitque annos LXIX. Menses IV. dies XX. ut videre est in Tomo VI. Bullarii Dominicani in Appendice ad Constitutiones Benedicti XIII. pag. 702. ubi etiam extat citata Epistola encyclica de ejus obitu, & epitaphium marmoreo lapidi incisum ad gradus Sacelli S. Dominici in Ecclesia S. Mariæ ad Minervam, ubi fuit sepultus, & est hujusmodi.

D. O. M.

FR. AUGUSTINO PIPIA NATIONE SARDO ORD. PRÆD.
S. CONG. INDICIS SECRET. TOT. ORD. MAGISTRO GEN.

S. R. E. HVIUS TEMPLI TIT. PRESB. CARD.

ET AVXIMANÆ ECCLESIAE ANTISTITI.

QVI EA DIMISSA ROMÆ OBIIT

XXI. FEBRUAR. MDCCXXX. ÆT. SVÆ LXIX.

ET IN PROX. COMMVNI FR. SEPVLCHRO

TVMVLARI VOLVIT

NE TANTI VIRI IN THEOLOGICA SCIA

VERSATISS. RELIGIONE PRVDENTIA

CÆTERISQVE VIRTVTIBVS PRÆCLARI

MEMORIA PERIRET

FR. HVIUS CONVENTVS. S. DOMINICI

MAIORIGEN. S. MARTINI

ARBOREN HÆREDES P.P.

CAP.

C A P. XVI.

De Fr. Dominico Perez Matritensi.

I. **A**ugustino Pipia promotus ad supremum sui Prædicatorum Ordinis regimen anno MDCCXXI. eodem anno die IV. Julii ab Innocentio XIII. electus fuit in Secretarium Sacræ Congregationis Indicis P. Magister F. Dominicus Perez Hispanus, Conventus S. Thomæ Matriti alumnus. Fuit Perez Vir ingenii plane admirabilis, & eximie eruditionis cum singulari pietate, ac religione conjunctæ. Absoluto in Salmanticensi Universitate studiorum curriculo, in insignioribus Hispaniæ Scholis diu Philosophiæ, ac Theologiæ Cathedras, primariam vero Complutensem quindecim & amplius annos moderatus est. Mentis acumine, memoriæ felicitate, ac disserendi vi adeo præstabat, ut de ipso dicere soleret Pater Ramirez Societatis Jesu: *Nos omnes vel junctim Patri Perez, licet foret se minor, impares longe sumus*. Matriti autem vulgo, atque antonomastice appellabatur *espanta Madrid*, idest, *teror Matriti*. Vehementer enim tonabat, fulgurabat, fulminabatque, sive e sacro suggestu concionem ad populum ad eum audiendum confluentem haberet, sive in litteraria Palestra disputaret.

II. A Carolo II. Hispaniarum Rege, quamvis per ætatem immaturus jam tunc videretur, in Aulam Regiam vocatus, Regius Concionator institutus est. Mortuo Carolo II. excitato bello, sequutus partes Caroli VI. Austriaci Imperatoris ex Hispania Viennam Austriæ profectus, eidem a sacris Concionibus fuit, magnoque omnium plausu auditus est. Rara, & ingenua fuit erga amicos fides; sermo illi candidus, & ab omni fuco, ac simulatione alienus; summa in publicis privatisque rebus dexteritas, ac prudentia, quibus egregiis animi dotibus in memorati Catholici Regis Caroli II. & Imperatoris Caroli VI. Aulis omnium Optimatum animos ita sibi conciliavit, ut ejus sententiæ & consilia velut oracula exciperentur. Hinc oblatis illi non

R

semel

semel Episcopatus quos tamen semper constantissime recusavit; perhorrescebat enim onus ipsum Episcopale, quod sciret onus esse vel Angelicis humeris formidandum.

II. Aulæ pertæsus, ac Vienna discedens in Italiam venit, munusque Fidei quæstitoris, quod Religiosi sui Dominicani Instituti proprium esset, in Civitate, & ditione Firmana non invitatus admisit, & summo zelo, vigilantia, prudentiaque aliquando exercuit. Sed paulo post a Clemente XI. æquissimo virtutis æstimatore ad Urbem accersitus, atque humanissime exceptus in Examinatorum Synodali cœtum cooptatus est; ab Innocentio vero XIII. Sacræ Indicis Congregationis Secretarius renunciatus, anno scilicet MDCXXI. die IV. Julii. Eo in munere constitutus Perez etſi chiragra, ac podagra acerrime conflictaretur, magnam sibi apud omnes absolutissimi Viri existimationem comparavit, ad eumque consiliorum causa, quæ plurimi apud omnes fiebant, Præsules, & Cardinales ipsi confluebant. Testatur id quidem eruditus Augustinus Quiros ejusdem Dominicani Instituti alumnus in Oratione Funebris, quam in ipsius Perezii laudem in Templo S. Mariæ super Minervam habuit: *At quis, inquit, referre unquam potest, quam ingens omnium animos cupido incesſerat videndi cominus, & ingenium cognoscendi, de quo tam multa, tam præclara omnium sermone afferebantur. Dominicus autem Perez, sive in privatis eruditorum colloquiis de re litteraria sermo esset, sive in Scholasticorum arenam descenderetur, sive in Congregationibus de Librorum judicio, seu de aliis rebus agendum erat, magna ubique ejus doctrina, admirabile ingenii acumen, alta in consiliis dirigendis prudentia, eminebat. Quapropter his ille ornamentiſque sibi bonorum, ac eruditorum omnium animos, voluntatesque devinxerat, ut licet ex ejus temperatione corporis sperare baud possent diu se illius virtute fruituros, cuperent tamen omnes annis suis illius vitam prorogare. Quin & sæpius Eminentiſſimi Cardinales ipsum adibant, præſentia dignabantur, & opportuna, quæ ipsis suppediabat in rebus gerendis consilia avide excipiebant; quam*

quam
ban
fig
I
ros
Vol
fig
dis
die
fol
D
m
bi
q
r
a
c
M
n

quam egre tanti Viri jacituram, quam proximam praevidebant, ferrent, plurimis, ac luculentissimis benevolentiae significationibus demonstrarunt.

III. Dignum plane notatu & illud est quod idem Quiros mox subdit in citata funebri Oratione, sic inquit: *Voluit etiam Summus Pontifex Innocentius XIII. palam significare, quanto in honore, & pretio haberet Reverendissimum Patrem Dominicum Perez, dum ad illum propediem moriturum, Nuntium misit, qui ipse nomine eum solaretur, & benedictione in articulo mortis donaret.* Demum, arthidrite invalescente, aliisque accedentibus morbis patientissime ab eo toleratis, obiit Romae in Cœnobio Minervitano die 11. Martii anno MDCCXXIV. celebratisque solemnibus pompis exequiis, ut fieri assolet in Secretariorum Indicis Funere, Orationem in ejus laudem habuit memoratus F. Augustinus de Quiros Ordinis Prædicatorum, quæ eodem anno ex Typographia Komarek prodiit. Sepultus autem fuit in Ecclesia S. Mariæ super Minervam ubi etiam in mentoriâ tanti Viri posita fuit marmorea inscriptio, quæ est hujus tenoris.

D. O. M.

F. DOMINICO . PERESIO . MATRITENSI

ORD. PRAED.

THEOLOGO . COMPLUTENSI

CATHOLICI . REGIS . HISPANIARVM . ET . IMP. AVG.

A . CONCIONIBVS

FIRMI . IN . PICAENO . CAVSARVM . RELIGIONIS . CATHOLICAE

QVAESITORI

QVI . A . CLEMENTE . XI. PONT. MAX. ROMAM

ACCERSITVS

ET . SACRAE . INDICIS . CONGREGAT. A SECRETIS . DICTVS

MAGNVM . SIBI . NOMEN . COMPARAVIT

FF. PRAEDICATORES

SODALI . SAPIENTISSIMO . ATQVE . OPTIMO

POSVERVNT.

OBIIT . VI. NON. MART. ANN. MDCCXXIV.

C A P. XVII.

*De Fr. Aloysio Nicolao Ridolfi Florentino, postea
Sacri Palatii Magistro.*

I. **M**ortuo Perez die 11. Martii anno MDCCXXIV. ut in superiori Capite dictum est, quod paulo post, nempe die VII. ejusdem mensis, & anni mors contigerit Innocentii XIII. vacavit munus Secretarii Indicis ad electionem usque novi Pontificis, electoque die XXIX. Maii prædicti anni MDCCXXIV. Benedicto XIII. ab eodem institutus est Secretarius Indicis Pater Magister Fr. Aloysius Nicolaus Ridolfi Florentinus nobili genere natus, Minervitani Cœnobii alumnus, cujus eximias virtutes, ac gesta egregia narravimus jam in Opere nostro, *De Magistro Sacri Palatii Apostolici* Lib. II. Cap. LXVIII. Fuit enim deinde Ridolfius ad Magisterium Sacri Palatii a Clemente XII. renunciatus, & in locum Fratris Joannis Benedicti Zuanelli in eo officio defuncti suffectus. Etsi autem de ipso Ridolfio fufe dixerimus citato loco, ubi & epistolam encyclicam Generalis Magistri ad universum suum Prædicatorum Ordinem de ejus obitu, & marmoream inscriptionem in Templo Minervitano positam, & Orationem funebrem in illius exequiis recitatam, & insigne privilegium eidem a Regnante Summo Pontifice BENEDICTO XIV. concessum descripserimus, operæ tamen pretium ducimus, si non omnia, aliqua tamen ibi dicta, in præsentī repetere, ne quid in hoc Opere, quod Secretarios Sacræ Congregationis Indicis spectat, desideretur.

II. Natus itaque est Romæ Nicolaus Ridolfius anno MDCLXXIV. ex Florentina gente Ridolfiorum, quam & antiquitas generis, & armorum, togæque splendor, & primariæ Ecclesiæ dignitates, & affinitates cum principibus familiis, ac præcipue iteratæ cum Corsinis, & Mediceis præstantissimam efficiunt, & præclarissimam. Adolescens Romæ in Cœnobio Minervitano Prædicatorum Ordini nomen dedit, solemniq; emissâ professione, studiorum causa

ad

ad Salmanticam celeberrimam Hispaniæ Academiam missus est; ubi quantum profecerit, satis illud declarat, quod reducem in Italiam idoneum jam, maturumque ad omnia Ordinis ministeria Superiores judicarint. Philosophiam, & Theologiam primum Florentiæ tradidit, æque magno auditorum concursu, atque progressu. Tum Romæ Moralem Theologiam, deinde veluti per gradus doctrina fultus, & ornatus conscendit; nunc Studiorum Præses renunciatus, nunc, ut dicunt, Baccalaureus, nunc secundus Theologiæ Lector, ac tandem Regens, qui supremus gradus est, apexque litterariæ dignitatis.

III. Huic tali tantoque Viro, cum assumptus ad Summi Pontificatus fastigium Benedictus XIII. Lauretanam Ecclesiam regendam destinasset, constantissime eam ipse recusavit, promotusque ab eodem Pontifice, qui Ridolfum summopere diligebat, ad Secretarii Sacræ Indicis Congregationis munus, explicari satis nequit, quanta diligentia munus ipsum exercuerit Ridolfus. Constat id plane ex variis mss. Codicibus manu illius summo labore, atque judicio descriptis, quibus Index generalis alphabeticus continetur omnium censurarum ac prohibitionum Librorum. In hoc Indice exhibentur primo omnes & singuli Libri prohibiti in Indicem relati, aut referendi; secundo omnes & singuli quoque Libri, qui proscripti fuerunt a Sede Apostolica ante annum MDXV. tertio denique Libri omnes qui denunciati, vel accusati fuerunt, vel aliqua censura affecti, tametsi damnati non fuerint. Opus sane spissum, ac laboriosum in VII. Tomos distributum, ac propria ejus manu, ut dictum est, scriptum, Secretariis omnibus Sacræ Congregationis Indicis usui & adjumento futurum nos ipsi vidimus apud modernum Secretarium ejusdem Sacræ Congregationis Reverendissimum P. Ricchinium.

IV. Teste eruditissimo P. Antonino Bremond in Præfatione ad Bullarium Ordinis Prædicatorum pag. LXIV. Opus ipsum jam ante illum Ridolfus susceperat, variaque Diplomata conscribenda curaverat, verum quod variis atque laboriosis negotiis Sacræ Congregationis Indicis, cujus,

jus, ut dixi, constitutus fuerat Secretarius, esset immerfus, curam illam deponere coactus fuit, testatur idem Bremond ubi ita inquit: *Opus istud, Bullarium nempe Dominicanum, edendum suscepit, & qua est diligentia, successu prospero maturabat, sed immerfus Sacræ Congregationis negotiis, tot alia cingebant, premebant, urgebant ipsum, ut istius curam apud me deposuerit. Hinc eo Magistro sapius usus sum, & tot hac de re beneficiis ipsi sum devinctus, ut nec enunciare quantum debeam, nec filere, quod ipsi plurimum debeam, possim.* Ita plane Vir ingenuus, ac profundæ doctrinæ, & spectatæ fidei Antoninus Bremond in citata ad Dominicanum Bullarium Præfatione, ut vel ex recitato tanti Viri testimonio intelligat quisque, ubi alia deessent elogia, quis & qualis fuerit Ridolfus.

V. Suas ob egregias dotes jam non modo Ridolfus acceptissimus fuit Benedicto XIII. qui eum Secretarium Congregationis Indicis creavit, verum etiam Clementi Papæ XII. qui eundem promovit ad Magisterium Sacri Palatii Apostolici; quod quidem munus cum summa semper fide, diligentia, ac prudentia ~~exercuisset~~. Regnans feliciter Pontifex BENEDICTUS XIV. Ridolfum ipsum & magni fecit, & insigni privilegio donavit, quod descripsimus nos in citato Opere, *De Magistro Sacri Palatii Apostolici*, Lib. II. Cap. LXVIII. pag. 218. & seqq. Obiit tandem præstantissimus Vir VI I. Kal. Maji MDCCXLIX. solennique funere sepultus fuit in Templo Cœnobii S. Mariæ super Minervam, cujus erat alumnus, & amantissimus, ut testantur insignia beneficia Cœnobio ipsi, & Ecclesiæ ab eodem collata; unde non mirum, si ejus collegæ marmoræam inscriptionem in perenne grati animi sui monumentum in eadem Ecclesia poni curarunt, quam in fine hujus Capituli referemus.

VI. Quis & qualis fuerit Fr. Aloysius Nicolaus Ridolfus, seu Rodulfus Sacri Palatii Apostolici Magister, ab unde nos docet Oratio funebris de ejus vita religiosa, & rebus egregie gestis habita in Ecclesia S. Mariæ super Minervam, ubi in alto feretro Ridolfii cadaver jacebat sexto
Kal.

Kal. mensis Maji anno MDCCXIX. a Viro erudito P. Bernardo a S. Gulielmo Clerico Regulari Scholarum Piarum, quam nos operæ pretium duximus citato loco describere, ne lapsu temporis earum rerum memoria, quas prudenter gessit Ridolfius, sicut non paucis ejus prædecessoribus accidit, in oblivionem abiret. Redargui negligentia Dominicanorum posset, sed excusandi hi tamen, cum tot, ac tanti sint Prædicatorum Ordinis Viri illustres, ut ad scribenda illorum gesta vix multi Libri sufficerent. Sed hoc obiter dicto, lubet hic describere encyclicam Epistolam quam de ejus obitu scripsit ad universum Ordinem Prædicatorum Generalis Magister, quæ est hujus tenoris.

*In Dei Filio sibi dilectis Patribus, Fratribus,
ac Sororibus Ordinis Prædicatorum.*

FR. ANTONINUS BREMOND
*Sacra Theologiæ Professor, ejusdemque Ordinis universi
humilis Magister Generalis, & Servus.*

Salutem, & mortis recordationem.

Et si de dormientibus in Christo Patribus contristari nos minime deceat, sicut ceteros, qui spem non habent, justus tamen est luctus, quem capimus sane ingentem ex illustrium Virorum interitu, qui cum sint nobis jure societatis, atque Instituti conjuncti, sublimi etiam, editoque in loco positi, latius quam in Ordinem, solum effundunt splendorem vitæ, lucemque virtutum. Quo quidem casu sumus non ita pridem perculsi, cum die vigesima quinta hujus mensis post diurnam cum tabifico, lentoque morbo colluctationem ereptus tandem est nobis Reverendiss. P. F. Nicolaus Aloysius Ridolfi Sacri Palatii Apostolici Magister. Et si ætate, nam annum agebat septuagesimum quintum, laboribusque confectus videretur, faciebat tamen Viri integritas, scientia non mediocris, moresque ad omnem legumstrarum disciplinam compositi, ut diutius eum vivere cuperemus, quod amplissimo muneri gerendo non impar, eximio esset Familiæ nostræ ornamento, & splendori. Is illustri genere ortus, quo affinitate Medicæas, atque Corsinias Familias attingebat, præterquam quod fuerat libe-

liberaliter, pieque educatus, habebat etiam inter Majores nostros insignem, & perenni memoria dignum ex sua Familia Virum, quo posset ad præclara quæque agenda veementius incitari, clarissimum nempe Nicolaum Ridsium Ordinis nostri Generalem Magistrum. Hunc adolescens ad imitandum sibi proposuit, pressamque ab illo mature arripuit virtutis viam; quæ etenim liberaliter a Deo acceperat fortunæ; ac naturæ beneficia, eadem virili contemptu posthabuit, ut ab humanæ militiæ stipendiis ad Christi vexilla in nostris se se castris traduceret. Romæ itaque cum natus esset, in Ordinem cooptatus est, atque in Minervitano Canobio religiosæ vitæ tyrocinium posuit, quo rite absoluto, votisque Deo nuncupatis, ad celeberrimam Salmanticensem Academiam in Hispaniam studiorum causâ missus est, ubi Philosophiæ, ac Theologiæ operam dedit magna contentione, ac diligentia. In Italiam reversus impositum suscepit docendi munus, coque Florentiæ primum, deinde Romæ ad supremam usque Regentis hujus nostri S. Thomæ Collegii gradum summa cum laude functus est. In eo vero, cum in cæteris muneribus ita doctrinam cum pietate conjunxit, ut studiorum ardor eum ab amore virtutum, ac religiosæ vitæ exercitationibus, distraxerit nunquam, vel abduxerit. Magisterii Lauream consequutus, in Sacra Indicis Congregatione Consultor fuit; sed paulo post cum ejus merita singularem apud omnes cives estimationem conciliaissent, valere in primis apud Principes Viros Vincentium Mariam Ursinium Ordinis nostri, & Laurentium Corsinium S. R. E. Cardinales, quorum uterque P. M. fuit, virtutisque æstimator æquissimus. Itaque a Benedicto XIII. primum ejusdem Sacræ Indicis Congregationis a Secretis, mox Recinetensis, ac Lauretani Episcopus renunciatus est. Sed priorem ille dignitatem veluti domi partam, & a vitæ religiosæ consuetudine minime alienam non invitatus accepit: Episcopalem ut acciperet, ne ab ipso quidem Promotore Pontifice, eodemque hortatore suaderi potuit, quod a suscepto vitæ instituto avelli non pateretur. At vero Johanne Benedicto Zuanelio

Illo Sacri Palatii Apostolici Magistro vita functo, summa omnium gratulatione eidem successor in amplissima dignitate a Clemente XII. designatus est. Utroque autem in munere præconceptæ de se expectationi apprime respondit, ac tanta fide, diligentia, zelo, integritate utrumque gessit, quam qui optime absoluteque gerere potuisset. Quicumque eo usi sunt, sensere candidum, sine fuco, relictum, verique amatorem, ex uno æquitatis arbitrio omnia metientem, aperientemque sine simulatione animi sui sententiam. Eo autem ab omnibus, cum primis vero a Sanctissimo eodemque sapientissimo Pontifice BENEDICTO XIV. commendatissimus fuit, quod in Apostolico Palatio ita versaretur, ut in domestico Cænobio, nihil in victu, & vestitu, & omni reliquo vitæ apparatu unquam admittens, quod non religiosam exhiberet modestiam, temperantiam, paupertatem. Fuit enim semper severioris disciplina amantissimus servator, & cullos, atque in omni vitæ perfectissimam ejus formam expressit. Cum ea vero severitate summam adjunxit morum facilitatem, & contra æspecies exterior subaustera polliceretur, religiosam in omnes comitatem, ut externis juxta ac domesticis hoc nomine probatissimus foret. Jam vero in supremo morbo nullum prætermisit Christianæ pietatis officium, quo se ad æternitatis iter religiosissime compararet. Nam omnibus Ecclesiæ Mysteriis semel iterumque, cum brevi convaluisse videretur, magno Fidei, & Charitatis ardore petitis, iisdemque rite initiatus, divinæ se se prorsus voluntati, suæque omnia, de quibus ex Pontificio Indulto Testamentum scribere potuisset, Magistri Generalis arbitrio permittens, quantum ex antea vitæ cursu conjicere licet, ad laborum, virtutumque suarum præmia placidissima morte migravit. Reliquum est, ut qui ob egregia in Ordinem nostrum merita maximum reliquit desiderium sui, eidem, quod unum superest, mutui amoris, pietatisque subsidiis opitulemur. A vobis itaque ea Sacrificia, & preces, quæ more, institutoque Ordinis nostri denatis Magistris Sacri Palatii impendi debent, enixe pro ejus anima flagitamus, ut elu-

S

tis,

*tis, si quæ illi haſerint, mundani pulveris ſordibus, perennis viſæ beatitatem quamprimum aſſequatur. Jam vero domeſticis eraditi caſibus, ac funeribus moniti, recogitate Fratres, quod præterit figura huius Mundi, appropinquat autem, ac laſenter feſtinas dies illa, quæ cum ad-
venerit, vanitatis arguentur præterita. Cavete, ne incautos vos occupet, atque imparatos. Vivite ergo quaſi quotidie morituri; tanto enim ſecurius extremam horam videbitis, quanto diligentius eam timendo prævenietis. Valete Noſtri, Sociorumque memores in Sacrificiis, & præcationibus veſtris.*

Datum Romæ ex noſtris Minervitanis Edibus die 27. Aprilis 1749.

VII. Obiit Ridolfus VII. Kal. Maji anno MDCCXLIX. ſolemniſque funere ſepultus fuit in Templo S. Mariæ ſuper Minervam, cujus erat alumnus, & amantiſſimus, ut teſtantur inſignia beneficia Cœnobio ipſi, ac præſertim Bibliothecæ, & Eccleſiæ ab eodem religioſiſſimo Viro collata. Unde non mirum, ſi ejus Collegæ marmoream inſcriptionem in perenne grati animi monumentum, in eadem Eccleſia poni curarunt, quam nos & hoc loco deſcribimus, eſtque ſequentis tenoris.

D. O. M.

FR. ALOYSIO . NICOLAO . RODULPHIO
FLORENTINO
ORDINIS . PRAEDICATORUM

SACRAE . INDICIS . CONGREGAT. A . SECRETIS
ET . SAGRI . PALATII . APOSTOLICI . MAGISTRO
VIRO . OB . EGREGIAM . VIRTUTEM
REM . QVE . IN . VTROQUE . MVNERE . FVNGENDO
BENE . GESTAM

BENED. XIII. CLEM. XII. ET BENED. XIV.
PONTIFICIBVS . MAXIMIS . ACCEPTISSIMO
FF. PRAEDIC. COENOBII . S. MAR. SVP. MINER.
COLLEGAE . BENEMERENTI . FECERVNT
OBIIT . VII. KAL. MAII
AN. MDCCXLIX. AETATIS . LXXV.

CAP.

C A P. XVIII.

*De Reverendissimo Patre Fr. Josepho Augustino Orsi
Florentino, nunc Magistro Sacri Palatii Apostolici.*

I. **A** Ssumto ad Magisterium Sacri Palatii P. Magistro Fr. Aloysio Nicolao Ridolfio, die 1. Decembris anni MDCCXXXVIII. a Clemente Papa XII. renunciatus est Secretarius Indicis Pater Magister Fr. Josephus Augustinus Orsi Florentinus Congregationis S. Marci alumnus, de quo jam diximus in Opere nostro, *De Magistro Sacri Palatii Apostolici*, Lib. II. Cap. LXIX. Ob eandem rationem superius non uno in loco allatam censuimus & hoc loco repetere, quæ de tanto Viro in citato Opere scripsimus. Ergo Orsius postquam Florentiæ Grammaticam, Rhetoricam, Philosophiam didicisset, adolescens nomen Ordini Prædicatorum dedit Fesulis in Cœnobio S. Dominici, quod ad Florentinam S. Marci Congregationem pertinet, anno MDCCIX. Confecto studiorum curriculo biennio Philosophiam, & deinde plures annos Theologiam summa cum laude, atque ingenti discipulorum progressu docuit in celeberrimo S. Marci Cœnobio, ubi viget ejusdem Congregationis Studium, quod Generale appellant.

II. Quum anno MDCCXXX. eidem Cœnobio præset, multos præstantes ingenio juvenes in Ordinem cooptavit; eodemque ferme tempore cum Pontifex Maximus electus esset Cardinalis Laurentius Corsinius, qui Clemens Papa XII. dictus est, ejus Nepos Nerus Cardinalis Corsinius Orsium Romam adscivit, suumque Theologum dixit. Degebat autem in Conventu S. Mariæ super Minervam ubi anno MDCCXXXII. Cathedricus Casanatensis est factus, Summamque Theologicam S. Thomæ in eo Collegio docte atque erudite explicavit ad annum usque MDCCXXXVIII quo Nicolaus Ridolfius, qui Secretarius Sacræ Congregationis Indicis erat, ab eodem Clemente creatus Sacri Palatii Apostolici Magister fuit, & Orsius eidem jussus est in Indicis Congregatione succedere. In eo munere perseveravit

ravit ad annum usque MDCXCLIX. quo, mortuo Ridolfo, a Papa BENEDICTO XIV. qui feliciter regnat, factus est Magister Apostolici Palatii.

III. Inter has occupationes, & munera, nunquam a scribendo cessavit. Nam primo edidit Librum inscriptum: *Dissertazione Dommatica e Morale contro l'uso materiale delle parole*. Romæ MDCCLXXVII.

Dissertationem Apologeticam pro SS. Perpetuæ Felicitatis, & Sociorum Martyrum Orthodoxia contra Samuelen Basnagium, qui in suis Annalibus hos Martyres Montanistarum partibus addictos fuisse contenderat. Eandem Sententiam secuti fuerant Auctores Actorum Eruditorum Lipsiæ, qui nihilominus hujus Dissertationis optimum specimen in suis Actis ediderunt. 4. Florentiæ MDCCLXXVIII.

Post cum Anonymi quidam opinionem Caroli Ambrosii Cattanei, *De usu Materiali verborum*, defendendam suscepissent, Orsius superiorem Dissertationem defendit, alteramque edidit hoc Titulo: *La causa della Verità sostenuta contro l'Anonimo Apologista del P. Carlo Cattaneo*. 4. Mediolani. Descripsit quoque Librum, cui Titulus: *Dimostrazione Teologica &c.* 4. Mediolani MDCCLXXIX.

Sunt aliæ quatuor ab eo scriptæ Dissertationes, quarum prima inscribitur: *De capitalium criminum Absolutione per tria priora Ecclesiæ sæcula*. Cujus mentionem faciunt Acta Eruditorum Lipsiæ. 4. Mediolani MDCCLXXX. Altera: *De invocatione Spiritus Sancti in Liturgiis Græcorum, & Orientalium*. 4. Mediolani MDCCLXXXI. Tertia: *De Baptismo in Nomine Christi, & de hæreticis, qui Baptismi formam adulterarunt*. 4. Mediolani MDCCLXXXIII. Hanc defendit scripto Libro, cui Titulus: *Vindiciæ Dissertationis de Baptismo in Nomine Christi a Sorbonici Doctoris objectis*. 4. Florentiæ MDCCLXXXV. Quarta est: *De Chrismate Confirmatorio*. 4. Mediolani MDCCLXXXIII.

Scripsit deinde *de Petri a Soto, & Judoci Ravesteyn de Concordia gratiæ, & liberi Arbitrii cum Ruardo Tappero Epistolari disputatione Librum Apologeticum, quo Soti doctrina a recensitis historici censuris vindicatur*. 4. Romæ

De

De Irreformabili Romani Pontificis in definiendis Fidei Controversiis Auctoritate, volumina tria edidit Romæ anno MDCCXXXIX. itemque alia duo, *De Romani Pontificis in Synodos Oecumenicas, earamque Canones potestate*. Ibidem MDCCXL.

Hujus Operis compendium concinnavit, atque edidit hoc Titulo: *Dell'Infallibilit , e dell'Autorit  del Romano Pontefice sopra i Concilij Ecumenici*. Tomo II. in 12. Rom  MDCCXLIX.

Huic accessit: *Dell'origine del Dominio, e della Sovranit  temporale de' Romani Pontefici*. 12. Rom  MDCCXLII.

Scribit nunc idem doctissimus Auctor varios Tomos, quibus Ecclesiasticam Historiam a primordiis Christian  Religionis ad h c usque tempora Italico Idiomate enarrat, editique sunt jam Tomi VII. in 4. summo plausu excepti, ut iccirco opus fuerit aliam ejusdem egregii Operis editionem adornare in 12. quo multorum desiderio fiat satis, qui Historiam ipsam eruditione mirabili, atque insigni pietate, & Christiana un ctione refertam expetunt.

C A P. XIV.

De Reverendissimo Patre Fr. Thoma Augustino Ricchinio Cremonensi.

I. **R**everendissimo Patre Fr. Josepho Augustino Orsi ex Secretario Sacr  Congregationis Indicis in Magistrum Sacri Palatii a BENEDICTO XIV. Pontifice feliciter regnante, ut in Capite pr cedenti dictum est, electo, idem Pontifex eadem die in ejus locum suffecit, ac Secretarium pr dict  Congregationis creavit Reverendissimum Patrem Fr. Thomam Augustinum Ricchinium Cremonensem, qui ab ipsa pueritia politoribus litteris egregie excultus in Ordinem Pr dicatorum quindennis admisus est anno MDCCX. Solemni emissa professione tametsi adolescens, graviora studia semper cum eloquentia, & eruditione conjunxit, quorum varia adhuc juvenis specimina evul-

evulgavit recensita a Viro Clarissimo Francisco Arisio Historico Cremonensi Tom. III. *Cremonæ literariæ* pag. 3 12. ex quo pleraque hausimus, quæ de illo scribimus. Plures habuit varii argumenti cum sacras, tum Academicas orationes Litteratorum plausu exceptas, & Cremonensis Arcadum Coloniz unus e fundatoribus fuit, cum jam Romanæ foret antea Arcadiæ adscriptus sub pastoralis nomine *Gesultis Scandey*.

II. Poeticis involucris jam non adeo fuit addictus Ricchinus, ut vel adolescens solidiora studia negligeret. Tantum enim in iis profecit, ut Philosophiam, Theologianque in clarioribus Provinciæ utriusque Lombardiæ Cœnobiis ad plures annos perlegerit, ac Generalis sui Ordinis Studii Bononiensis Moderator Baccalaureus institutus fuerit, non exiguo juventutis sibi disciplinæ traditæ emolumento. Nam relicta sterili, ac pure Scholastica docendi methodo, uberiores purioresque eruditæ Theologiæ fontes eidem referavit, atque utilissima de Theologiæ studio recte instituendo didascalica indicavit, ac docuit, quibus prædiis instructum esse deceat, quem Auctorum delectum facere, quam viam insistere, quid cavere debeat is, qui ad veram, suisque numeris omnibus absolutam Theologiam contendit.

III. Magisterii Theologiæ lauream consequutus, quod profunda eruditione rerum præsertim Ecclesiasticarum polleret, Patri F. Josepho Ludovico de Andujar ejusdem sui Dominicanæ Instituti insigni Theologo, & Viro undequaque docto, nunc Episcopo Derthonensi adjunctus est, ut una cum eo esset a Studiis Benedicti XIII. In Pontificium Palatium adscitus, ita ibi commoratus est, ac in Cœnobiis religiosioribus mansisset, uni intentus studio, ac notitiis Ecclesiasticis præparandis, aliisve rebus peragendis juxta præscriptum Pontificis. Quanti autem Ricchinum fecerit Benedictus, vel ex eo addiscimus, quod adhuc juvenis ab eodem approbatus fuerit ad gradum Regentis Generalis Studii Bononiensis, uti videre est in Constitutione cxxx. laudati Pontificis, quæ incipit, *Accedente*, data die

die xxviii. Januarii mdcxxx. legiturque Tomo vi. Bullarii Dominici, pag. 799.

IV. Mortuo Benedicto XIII. delectus fuit Ricchinus a Sacro Cardinalium Collegio, ut in Vaticana Basilica, ubi solemnnes tanti Pontificis exequiæ celebratæ fuerunt, funebrem laudationem haberet, quæ mox edita fuit Romæ anno mdcxxx. tum Ferrariæ, & alibi, ejusque cum laude meminerunt Joannes Baptista Pittonius in Vita Benedicti Papæ XIII. Italice edita Venetiis, & inter alios Alexander Borgia Archiepiscopus Firmanus in ejusdem Pontificis Vita Latine scripta, ac Romæ impressa anno mdcxli. Alteram quoque non minus elegantem Latinam orationem habuit in funere Victorii Amedei II. Sardinia Regis, quæ prodiiit Cremonæ anno mdcxxxii. de qua, aliisque ejus opusculis editis, vel edendis, videri potest Arisius in superius laudato Opere.

V. A Magistro Generali Ordinis sui Prædicatorum Patre Fr. Thoma Ripoll, dum ille Patrio Cœnobio præesset, Romam evocatus anno mdcxli. institutus Socius, seu Assistens Generalis pro Italia Provinciis, summa fide, ac diligentia, munus illud exercuit, meruitque, ut mox Collegii Casanatensis Theologus crearetur. Dum utroque munere naviter, ac diligenter fungeretur, multa scripsit eleganter, & erudite, atque in primis Venerabilis Moneta Cremonensis e primis S. Dominici Ordinis Prædicatorum Institutoris alumnis Libros quinque adversus Catharos, & Valdenses ex mss. Codicibus erutos, atque a se doctissima Præfatione, ac Notis illustratos Romæ edidit ex Typographia Palladis anno mdcxliii. Quod quidem Opus non sine animi voluptate totum mandante Sacri Palatii Magistro percurrimus, probavimusque, admiratique sumus immensam, omnigenamque Scriptoris eruditionem.

VI. Scripsit & alia opera Ricchinus ediditque, nempe Commentarium de vita & studiis Cardinalis F. Vincentii Ludovici Gotti; itemque Dissertationem de S. Alberto Confessore Bergomeni tertio Ordini S. Dominici adjudicando, & Commentarium de ejusdem Vita & cultu. Plures

res

res demum Latinas easdemque graves epistolas scripsit nomine Magistri, aut Vicarii Generalis ad universum Ordinem variis temporibus, varique argumenti, singulari elegantia, nitore, pietate, ac doctrina refertas. Unde non mirum si Regnans feliciter Pontifex Maximus Sanctissimus Dominus Noster BENEDICTUS XIV. qui Ricchinii opera, & studio jam pridem usus fuerat, Virique ingenium, diligentiam, ac fidem probaverat, assumpto ad Magisterium Sacri Palatii Apostolici Secretario Sacræ Congregationis Indicis Reverendissimo Patre Fr. Josepho Augustino Orsi, in ejus locum Reverendissimum Ricchinium suffecerit, & Secretarium prædictæ Congregationis ultro designaverit, plaudente Urbe, & Litteraria Republica, cui perspecta semper fuit solida Ricchinii doctrina cum summa prudentia, & pietate conjuncta.

VII. Secretarius Congregationis Indicis constitutus Ricchinus, morem prædecessorum suorum sequutus, omnem mox operam suam, ac diligentiam adhibuit, ut munus ipsum pro dignitate exerceret, summaque fide exequeretur quæ Cardinales Sacræ Indicis Congregationi præpositi illi mandarent. Verum quod ipsi Cardinales pro sua, quam in Libros perniciosos habent, auctoritate, Bibliothecam Jansenianam proscripsissent, Decretumque de ea re edidissent, quod pro suo munere subscripsit Ricchinus: larvatus quidam Doctor Sorbonicus ægreferens hujusmodi Decretum, epistolam, seu potius Libellum famosum scripsit, Ricchiniumque non modo perperam sugillavit, sed etiam Cardinales dictæ Congregationi præpositos, atque ipsum, pro nefas! Romanum Pontificem Maximum. Sed agenda gratiæ Romano Philalethi, qui in epistola sua quam ad Theologum Lovaniensem scripsit de justa Bibliothecæ Jansenianæ proscriptione, a Sorbonici Pseudodotoris calumniis Ricchinium, Cardinales, atque Pontificem egregie vindicavit.

F I N I S.

252754
ANT 441744



810

